




Addysg Heddwch

Comisiynwyd gan Academi Heddwch Cymru

Paratowyd gan Dr Sarah Morse

Medi 2024

Academi
Heddwch
Cymru

Cynnwys

Crynodeb Gweithredol	4
Talfyriadau	5
Argymhellion	6
Academi Heddwch Cymru	6
Cynllun Ysgolion Heddwch.....	6
Cwricwlwm a Chymwysterau.....	7
Addysg a Hyfforddiant Ôl-orfodol.....	8
Llywodraeth	9
Cyflwyniad	10
Adnoddau a Dull Gweithredu	11
Adolygiad Llenyddiaeth	11
Dadansoddiad o gyd-destun polisi yng Nghymru a throsolwg o bolisiau addysg	11
Ymchwil Ansoddol	11
Cynnal cyfweiliadau.....	12
Defnyddio data cyfworld	12
Beth yw heddwch?	13
Beth yw addysg heddwch?	15
Manteision addysg heddwch ar gyfer cymunedau dysgu	17
Addysg Heddwch a Safbwyntiau Byd-eang.....	18
Diffiniad	19
Addysg Heddwch mewn cyd-destun Cymreig	21
Cynllun Ysgolion Heddwch Cymru	23
Perthnasedd o fewn y Cwricwlwm i Gymru.....	26
Cwmpas	28
Effaith.....	30
Adolygu'r cyfleoedd a'r heriau:	31
Profiad Ysgol Heddwch Ysgol Gynradd	33
Addysg Uwchradd - Cymwysterau Gwneud-i-Gymru	36
Cyfres Sgiliau: Sgiliau Byw	38

Addysg Gychwynnol i Athrawon (AGA) a Dysgu Proffesiynol	39
Perthnasoedd rhyngpersonol, empathi a llesiant emosiynol.....	40
Heriau Posibl.....	42
Ymgysylltu a Dysgu a Proffesiynol.....	43
Addysg Bellach.....	44
Addysg Uwch	47
Dysgu Gydol Oes - Addysg Oedolion ac Addysg a Hyfforddiant Galwedigaethol	54
Addysg Oedolion yng Nghymru	57
Cynllun Peilot Addysg Heddwch Cwricwlwm Dinasyddion.....	58
Datblygiadau eraill y dyfodol	59
Casgliad.....	62
Llyfryddiaeth.....	63

Crynodeb Gweithredol

Mae gan Academi Heddwch Cymru, fel sefydliad heddwch cenedlaethol Cymru, gryn botensial i hyrwyddo mentrau addysg heddwch. Gan wneud yn fawr o'i henw da, ei chysylltiadau a'i phŵer cynnull, gall wella ymwybyddiaeth a dealltwriaeth o addysg heddwch ymhlith llunwyr polisi a dylanwadyr.

Mae'r adroddiad hwn yn ystyried diffiniadau o addysg heddwch, datblygiadau o fewn y maes ac yn dadansoddi mentrau addysg heddwch yng Nghymru. Mae hefyd yn edrych ar y cyfleoedd posibl i ddatblygu addysg heddwch, ac yn ystyried esiamplau rhyngwladol sy'n cynnig modelau posibl y gellid eu mabwysiadu.

At ddibenion yr adroddiad hwn, diffinnir addysg heddwch fel dull addysgol trawsgwricwlaidd sydd â'r nod o hyrwyddo diwylliant a dealltwriaeth gyfannol o heddwch drwy gyflwyno gwybodaeth, sgiliau, agweddau, a gwerthoedd sy'n angenrheidiol er mwyn atal gwrthdaro a chreu cymdeithas heddychlon. Mae hefyd yn ddull gweithredu addas i'w ddilyn o fewn Addysg ar gyfer Datblygu Cynaliadwy a Dinasyddiaeth Fyd-eang (ADCDF), sydd â'r nod o roi'r wybodaeth, sgiliau, gwerthoedd a gallu i ddysgwyr o bob oed fynd i'r afael â'r heriau byd-eang cydgyssylltiedig sy'n ein hwynebu, megis newid yn yr hinsawdd, colli bioamrywiaeth, ac anghydraddoldeb cymdeithasol. Mae'r diwygiadau diweddar yn y sector addysg yng Nghymru, ac ymrwymiad y genedl i gynaliadwyedd a chyfiawnder cymdeithasol yn darparu cyfleoedd i addysg heddwch adeiladu ar y sylfeini sydd wedi bod yn rhan o'r dull o gyflwyno addysg yng Nghymru ers bron i genhedlaeth.

Os yw ADCDF yn cael ei ddatblygu ymhellach i gwmpasu dull gweithredu mwy cyfannol, mae potensial i ddatblygu enw da Cymru ymhellach fel arweinydd ym maes datblygu cynaliadwy ac adeiladu ar yr ymrwymadau a wnaed yn Neddff Llesiant Cenedlaethau'r Dyfodol (Cymru) 2015. Mae gan Gymru hanes hir o fod yn rhan o feithrin a hyrwyddo heddwch, a chan ddefnyddio'r traddodiad hwn i lywio ac ymgorffori dirnadaeth foesegol a dinasyddiaeth fyd-eang ymgysylltiedig yn ei system addysg drwyddi draw ar bob lefel, mae cyfle i Gymru gyfrannu at ddatblygu cymwyseddau yn ei dinasyddion sy'n cefnogi heddwch, datrys gwrthdaro a chymunedau cydlynus gartref a thramor, ac i gryfhau'r agwedd hon ar enw da Cymru fel cenedl sy'n gyfrifol yn fyd-eang.

Talfyriadau

MDaPh	Maes Dysgu a Phrofiad
CADY	Comisiwn Addysg Drydyddol ac Ymchwil
ADC	Addysg ar gyfer Datblygu Cynaliadwy
ADCDF	Addysg ar gyfer Datblygu Cynaliadwy a Dinasyddiaeth Fyd-eang
ABC	Addysg Blynyddoedd Cynnar
AB	Addysg Bellach
ADF	Addysg Dinasyddiaeth Fyd-eang
AU	Addysg Uwch
HEFCW	Cyngor Cyllido Addysg Uwch Cymru
AHD	Addysg Hawliau Dynol
AGA	Addysg Gychwynnol i Athrawon
CA	Corff Anllywodraethol
AHO	Addysg a Hyfforddiant Ôl-orfodol
ACRh	Addysg Cydberthynas a Rhywioldeb
CGM	Crefydd, Gwerthoedd a Moeseg
NDC	Nodau Datblygu Cynaliadwy
YSD	Ysgolion fel Sefydliadau sy'n Dysgu
WCIA	Canolfan Materion Rhyngwladol Cymru

Argymhellion

Academi Heddwch Cymru

1. Gall Academi Heddwch Cymru ddod yn eiriolwr pwerus dros addysg heddwch. Fel sefydliad heddwch cenedlaethol Cymru, mae gan yr academi lwyfan i rannu manteision ac effaith dulliau gweithredu addysg heddwch. Mae ei henw da, ei chysylltiadau a'i phŵer cynnull yn asedau. Gellid defnyddio'r grŵp trawsbleidiol ar heddwch a chymod i gynyddu dealltwriaeth ac ymwybyddiaeth wleidyddol o addysg heddwch o fewn y Senedd a gyda llunwyr polisi eraill, ac i feithrin cyngbreiriau gyda sefydliadau eraill sydd â diddordeb mewn ADCDF.
2. Byddai'n fanteisiol i Academi Heddwch Cymru a'r Cynllun Ysgolion Heddwch ffurfioli eu cysylltiad sydd eisoes yn bodoli. Mae gan y Cynllun Ysgolion Heddwch enw rhagorol ac mae mewn safle da o fewn gwaith dysgu byd-eang WCIA, ond fe fyddai cysylltiad mwy ffurfiol â sefydliad heddwch cenedlaethol Cymru, o bosib, yn dod â pharch, cydnabyddiaeth a dylanwad ychwanegol.
3. Mae sefyllfa ariannu bresennol y Cynllun Ysgolion Heddwch yn cyfyngu ar ei botensial i dyfu a'i sefydlogrwydd i gynllunio ar gyfer y tymor hwy. Pe gellid sicrhau cymorth ariannol pellach drwy Academi Heddwch Cymru, gellid ei fuddsoddi mewn capasiti staff a fyddai'n darparu sefydlogrwydd tymor hirach a'r cyfle i gyflwyno ceisiadau i ymddiriedolaethau elusennol i helpu i ddatblygu'r cynllun. Mae hefyd angen buddsoddi mewn hyfforddi rhagor o hyfforddwyr addysg heddwch i ganiatáu cyflwyno cyrsiau a gweithgareddau'n ehangach.
4. Dylai'r Academi Heddwch archwilio ffynonellau ariannu i gefnogi hwylusydd cyfnewid gwybodaeth gyfryngol i gynorthwyo partneriaeth a chydweithrediad rhwng ymchwilwyr heddwch (drwy Rwydwaith Ymchwil Heddwch Cymru) ac Ysgolion Heddwch i sicrhau bod ysgolion yn cael cyngor a chymorth priodol, a bod ymchwilwyr yn deall gofynion ymarferwyr ysgol.

Cynllun Ysgolion Heddwch

1. Mae angen gweithredu i feithrin dealltwriaeth well o addysg heddwch. Un ffordd o wneud hyn yw sicrhau cyswllt agosach rhwng addysg heddwch ac addysg datblygu cynaliadwy / addysg ar gyfer dinasyddiaeth fyd-eang. Yng Nghymru, mae addysg datblygu cynaliadwy a dinasyddiaeth fyd-eang eisoes wedi'u hymgorffori yn y cwricwlwm ac mewn nifer o gymwysterau, a byddai gosod addysg heddwch o fewn yr ymagwedd hon yn darparu mwy o gyfleoedd.
2. Mae'r adnoddau a'r canllawiau a ddatblygwyd gan y Cynllun Ysgolion Heddwch yn fanwl, clir a buddiol a gellir dod o hyd iddynt yn gymharol rhwydd ar wefan WCIA a Hwb. Byddai deunyddiau cyflwyniadol, yn egluro cysyniad ac ethos y cynllun, ac yn dangos y cysylltiadau gydag addysg ar gyfer dinasyddiaeth fyd-eang o gymorth i feithrin dealltwriaeth o addysg heddwch. Dylid ystyried

datblygu ystod fechan o bostiadau blog neu ddogfennau un dudalen yn cyflwyno addysg heddwch, sut mae'n cyd-fynd â gweithgareddau sydd eisoes yn bodoli, a'i fanteision - yn enwedig manteision ar gyfer amgylchedd yr ysgol ac ymddygiad dysgwyr. Gallai'r rhain fod yn bwynt mynediad i sesiynau gwybodaeth ar-lein i athrawon sy'n arddangos a dathlu addysg heddwch a'r Cynllun Ysgolion Heddwch.

3. Mae'r Cynllun Ysgolion Heddwch wedi bwriadu cefnogi rhwydwaith neu gymuned ymarfer o ysgolion ac athrawon, a byddai gweithredu hyn yn dod â llawer o fanteision. Byddai cylchlythyr rheolaidd i'r gymuned ysgolion heddwch, yn cynnwys newyddion ac adnoddau o'r cynllun, yn ogystal a chynnwys gan ysgolion sy'n cymryd rhan, yn gam cyntaf buddiol i ddatblygu hyn. Byddai rhwydwaith gweithredol yn cryfhau'r cynllun ymhellach ac yn adeiladu momentwm i'w wneud yn fwy gweledol yn ogystal â dyfnhau dealltwriaeth o addysg heddwch.
4. Dylid gwneud ymdrech i ddathlu gwaith a chyflawniad yr ysgolion heddwch yn fwy gweledol - er enghraifft, drwy gofnodi eu straeon mewn fideos byr y gellid eu defnyddio i hyrwyddo'r cynllun hefyd. Byddai gwahodd athrawon ac ysgolion - a rhai dysgwyr o bosibl - i rannu eu profiadau o addysg heddwch yn darparu cipolwg diddorol ar addysg heddwch ac yn helpu i ddatblygu dadl o'i blaid. Dylid hefyd ystyried cyflwyno cynnwys sy'n gysylltiedig ag addysg heddwch i gyfresi sefydledig a ddefnyddir gan athrawon - er enghraifft podlediad *Emma and Tom Talk Teaching*.

Cwricwlwm a Chymwysterau

1. Dylai'r ymdrechion sydd eisoes yn bodoli i fapio addysg heddwch ar y cwricwlwm newydd gael eu hehangu i ystyried perthnasedd addysg heddwch i agweddau o'r cwricwlwm y tu hwnt i'r Meysydd Dysgu a Phrofiad, er mwyn cynnwys:
 - Addysg Cydberthynas a Rhywioldeb
 - Crefydd, Gwerthoedd a Moeseg
 - Cynefin a'r synnwyr o berthyn a chynhwysiant, o fewn cymuned fewnol yr ysgol a'r gymuned allanol mae'r ysgol a'i dysgwyr yn rhan ohoni.

Byddai hyn yn agor allan addysg heddwch ymhellach a'i gwneud yn haws i ysgolion ddeall yr effaith a'r manteision posibl. Mae angen rhagor o adnoddau i gefnogi addysg heddwch. Mae'r prosiect *Signpost* yn yr Alban yn llwyfan o adnoddau am ddim sydd wedi eu profi ac sy'n cynorthwyo Dinasyddiaeth Fyd-eang weithredol. Ar hyn o bryd, dim ond yn Saesneg mae'r adnoddau ar gael. Dylid ystyried a yw'n bosibl gweithio gyda *Signpost* ac awduron / dechreuwyr yr adnoddau i gydweithio i'w gwneud yn addas mewn cyd-destun Cymreig, gan gynnwys cyfieithu i'r Gymraeg.

2. Mae dull gweithredu ysgol gyfan y Cynllun Ysgolion Heddwch yn ategu a chefnogi'r nod o ymgorffori ymagwedd ysgol gyfan at lesiant meddyliol ac emosiynol. Gall ffocws addysg heddwch ar empathi,

perthnasoedd rhyngpersonol a llythrennedd emosiynol fod yn arf pwerus i gynorthwyo llesiant dysgwyr a gellid adlewyrchu hyn yn y deunyddiau a ddefnyddir i hyrwyddo'r cynllun.

3. Mae'r Academi Heddwch a'r Cynllun Ysgolion Heddwch mewn sefyllfa dda i ddarparu cyngor ac adnoddau i gynorthwyo cynnwys agweddau sy'n ymwneud â heddwch yn y TGAU Astudiaethau Cymdeithasol newydd a'r cymhwyster Sgiliau Byw. Dylid ystyried cyfarfodydd posibl gyda Chymwysterau Cymru a CBAC.

Addysg a Hyfforddiant Ôl-orfodol

1. Mae'r Academi Heddwch mewn sefyllfa dda i gychwyn sgwrs ynghylch addysg heddwch o fewn addysg a hyfforddiant ôl-orfodol. Mae'r gwahanol lefelau o addysg yn gofyn am ymagweddau gwahanol, ond mae potensial i archwilio cynllun peilot addysg heddwch gyda Cholegau Addysg Bellach, gan adeiladu ar eu gwaith o fewn Addysg ar gyfer Datblygu Cynaliadwy, a'r posibilrwydd o ddatblygu fframwaith addysg heddwch briodol.
2. O fewn Addysg Uwch, mae'r Rhwydwaith Ymchwilwyr Heddwch yn ddatblygiad pwysig i godi ymwybyddiaeth o ymchwil heddwch, astudiaethau heddwch, a'r posibilrwydd o addysg heddwch. Dylid ystyried trafodaethau gyda chyrff megis Cymru Fyd-eang ac arweinwyr cyrsiau gwleidyddiaeth ryngwladol a chysylltiadau ryngwladol i archwilio'r posibilrwydd o fewn y cynnig addysg uwch ryngwladol o'r sector Cymreig a chyfleoedd i ddatblygu Addysg ar gyfer Datblygu Cynaliadwy a Dinasyddiaeth Fyd-eang ymhellach mewn gweithgareddau dysgu a chyfoethogi, ac i ddatblygu cenhadaeth ddinesig leol a rhyngwladol ymhellach.
3. Os bydd y Comisiwn Addysg Drydyddol a Llywodraeth Cymru yn datblygu strategaeth ar gyfer Addysg a Hyfforddiant Galwedigaethol, dylai Academi Heddwch Cymru a'r Cynllun Ysgolion Heddwch gymryd rhan yn yr ymgynghoriad er mwyn hyrwyddo potensial addysg er heddwch mewn dysgu seiliedig ar waith.
4. Mae partneriaethau diweddar y Cynllun Ysgolion Heddwch ag Addysg Oedolion Cymru a'r cyfranogwyr rhyngwladol yn y prosiect *Erasmus+* yn arddangos pwysigrwydd ac effaith cydweithio. Mae yna sgôp i adeiladu ar y berthynas â'r Urdd, a'r posibilrwydd o weithio gyda darparwyr newydd megis Coleg Black Mountain i ddatblygu cyrsiau addysg heddwch o fewn y cyrsiau byr a gynigir, a fyddai'n ategu eu cyrsiau cynaliadwyedd sydd eisoes yn bodoli. Yn ogystal â hyn, byddai rhaglenni cyfnewid gwybodaeth strategol gyda sefydliadau arweiniol yn dod â manteision i addysg heddwch yng Nghymru, ac yn cyfrannu at hyrwyddo enw da rhyngwladol Cymru yn y maes. Yn y sefyllfa ariannu bresennol, gallai *Llwybr 2 Taith* fod y ffynhonnell gyllido bosibl fwyaf hygyrch i ddatblygu hyn, gan weithio ar y cyd â phartner rhyngwladol yn ychwanegol at bartneriaid yng Nghymru.

Llywodraeth

1. Dylai arian ar gyfer cynllun peilot y cwricwlwm dinasyddiaeth addysg oedolion gael ei ymestyn i gynorthwyo cyflwyno'r cwrs addysg heddwch mewn gwahanol gymunedau a lleoliadau; mae potensial sylweddol iddo gyd-fynd â gwaith ysgolion bro, a byddai'n darparu cyfle i'r cynllun Ysgol Heddwch ymwneud â mentrau sy'n pontio cenedlaethau.
2. Yn y dyfodol, dylai adolygiadau o'r ffordd mae'r cwricwlwm ysgol newydd yn cael ei weithredu gynnwys adolygiad manwl o'r ffyrdd y mae'n cyfrannu at nodau Deddf Llesiant Cenedlaethau'r Dyfodol ac egwyddorion datblygu cynaliadwy a chyfrifoldeb byd-eang. Byddai hefyd yn amserol i Estyn ailedrych ar y cynnydd a wnaed o ran Addysg ar gyfer Datblygu Cynaliadwy a Dinasyddiaeth Fyd-eang (ADCDF), ddeng mlynedd ers yr adroddiad thematig diwethaf. Yn ogystal â hyn, er mwyn dysgu gwersi a chyfrannu at addysg heddwch fyd-eang - a sylfaen dystiolaeth ADCDF - argymhellir cyflwyno cyllid i gynorthwyo ymchwil addysgol i fentrau addysg heddwch yng Nghymru. Byddai hyn hefyd yn cyd-fynd â Strategaeth Genedlaethol ar gyfer Ymchwil ac Ymholiad Addysgol y Llywodraeth.
3. Mae posibl i fentrau addysg heddwch gyfrannu at broffil rhyngwladol Cymru fel 'cenedl sy'n gyfrifol ar lefel fyd-eang', ond dim ond gyda lefelau priodol o gyllid i gynorthwyo prosiectau cynaliadwy y gellir cyflawni hyn. Byddai cyllid penodol ar gyfer addysg heddwch yn cynorthwyo'r ymdrech hon.

Cyflwyniad

Comisiynwyd yr adroddiad hwn gan Academi Heddwch Cymru (AHC) ym mis Hydref 2023. Ei fwriad yw darparu gwybodaeth, dadansoddiad, ac argymhellion perthnasol i addysg heddwch yng Nghymru, yng nghyd-destun y diwygiadau addysgol sy'n cael eu rhoi ar waith ar hyn o bryd gan Lywodraeth Cymru.

Mae Academi Heddwch Cymru yn gweithio i wireddu'r weledigaeth o Gymru heddychlon, lle mae parch, cyfiawnder a thegwch yn cyfrannu at fyd heb drais na'r ofn o drais. Ei chenhadaeth yw helpu pobl yng Nghymru i gyfrannu at heddwch: yn lleol, yn genedlaethol ac yn fyd-eang. Drwy ymchwil, addysg ac ymgysylltu, mae'n gweithio gyda chymunedau, sefydliadau, llywodraeth ac ymchwilwyr i greu dyfodol teg, cyfiawn a di-drais.

Pwrpas yr adolygiad yw nodi cyfleoedd ar gyfer yr arfer gorau mewn polisi ac ymarfer addysg heddwch yng Nghymru ar draws y cwrs bywyd, gan gynnwys mewn ysgolion, addysg bellach, addysg alwedigaethol a hyfforddiant, addysg uwch a dysgu gydol oes.

Mae'r adroddiad yn amlinellu camau gweithredu posibl er mwyn i Academi Heddwch Cymru hyrwyddo, cynorthwyo a datblygu addysg heddwch yng Nghymru, gan gyfrannu at y Cwricwlwm i Gymru a nodau cysylltiedig ar gyfer addysg ôl-orfodol a dysgu gydol oes.

Mae hefyd yn amlygu'r cyfleoedd i Academi Heddwch Cymru ddefnyddio ei bwerau cynnull fel y sefydliad heddwch cenedlaethol i ddod â phartion sydd â diddordeb ynghyd i hwyluso cyfnewid gwybodaeth rhwng ymchwilwyr academiaidd ac ymarferwyr addysgol, ac i helpu i feithrin partneriaethau yng Nghymru a thu hwnt.

Adnoddau a Dull Gweithredu

Cafodd yr adroddiad ei ddatblygu, ei ymchwilio a'i ysgrifennu gan Dr Sarah Morse rhwng mis Hydref 2023 a mis Mai 2024. Barn yr ymchwilydd a fynegir yn yr adroddiad hwn ac nid o reidrwydd barn Academi Heddwch Cymru.

Adolygiad Llenyddiaeth

Coladwyd ystod o ffynonellau a'u hadolygu. Roedd hyn yn cynnwys llenyddiaeth academiaidd, llawlyfrau addysg heddwch a llenyddiaeth lwyd, gan gynnwys adroddiadau gan sefydliadau trydydd sector sy'n gweithio ym maes addysg heddwch ac/neu yn eirioli dros addysg heddwch. Cafwyd sawl papur ac adolygiad polisi yn ddiweddar, a bu i ddadansoddiadau ohonynt gyfrannu at fireinio'r ymchwil. Ystyriwyd cyd-destunau polisi rhyngwladol hefyd.

Dadansoddiad o gyd-destun polisi yng Nghymru a throsolwg o bolisïau addysg

Mae Llywodraeth Cymru wedi cyflwyno nifer o ddiwygiadau i addysg yng Nghymru yn y degawd diwethaf, o'r cam cynharaf mewn addysg hyd at addysg a hyfforddiant trydyddol, ôl-orfodol ac i oedolion. Mae'r datblygiadau'n ystyried Deddf Llesiant Cenedlaethau'r Dyfodol (Cymru) 2015. Gan ddefnyddio gwybodaeth am yr holl agweddau ar bolisi addysg, mae'r dadansoddiad hwn yn ystyried elfennau sy'n cydgyffwrdd yn y gwahanol ddeddfwriaeth, polisïau a fframweithiau ac yn dethol llinynnau cyffredin y gallai addysg heddwch gyfrannu'n gadarnhaol atynt.

Ymchwil Ansoddol

Cynhaliwyd cyfweiliadau gyda saith ymarferwr addysg rhwng 15 Tachwedd 2023 a 15 Ionawr 2024. Yn gynnar yn natblygiad yr adroddiad, mynychodd yr awdur gynhadledd flynyddol Ysgolion Heddwch Cymru (8 Tachwedd 2023) a chyfarfod â staff cynllun Ysgolion Heddwch Cymru i ddysgu am eu gwaith a'u gweithgareddau.

Roedd yn amlwg o'r adolygiad llenyddiaeth nad oes gwybodaeth na dealltwriaeth eang o addysg heddwch yn y sector addysg hyd yma. I gyfyngu'r ffocws o fewn y gymuned ymarferwyr ysgol, gweithiodd yr awdur gyda'r Cynllun Ysgolion Heddwch Cymru i nodi cysylltiadau y gwyddys eu bod yn barod i wrando ac yn weithredol mewn addysg heddwch. Cysylltwyd â deg o athrawon; cafwyd dau ymateb. Dewisodd un ymatebwr ddarparu atebion ysgrifenedig i'r cwestiynau cyfweiliad, a chafodd y llall gyfweiliad dros Zoom. Mae'n debyg bod yr amseriad (ail hanner tymor yr hydref) wedi cyfyngu ar y gyfradd ymateb. Anfonwyd gwahoddiadau pellach ar ddechrau mis Ionawr, cyn dechrau tymor y Gwanwyn, ond ni dderbyniwyd ymatebion pellach.

Cynhaliwyd ymchwil desg i ganfod cysylltiadau perthnasol o fewn adrannau addysg a hyfforddi athrawon prifysgolion ac i ganfod arweinwyr o fewn Addysg Bellach. Defnyddiwyd cysylltiadau proffesiynol presennol yn y sector hefyd. Cysylltwyd â 12 unigolyn, cafwyd pum ymateb, a chynhaliwyd dau gyfweiliad dros Zoom. Yn ychwanegol at y dadansoddiad o'r potensial ar gyfer addysg heddwch o fewn hyfforddiant athrawon a

datblygiad proffesiynol, bu'r ymatebion a gafwyd o help i lywio'r ystyriaeth o'r datblygiadau mewn cyrsiau TGAU yng Nghymru.

Sail y dadansoddiadau Addysg Uwch oedd gwybodaeth bresennol yr awdur ac ymchwil flaenorol, yn ogystal â chyngor Arweinydd Ymchwil Academi Heddwch Cymru.

Cynnal cyfweiliadau

Rhoddodd cyfranogwyr y cyfweiliadau ganiatâd i'w sylwadau gael eu defnyddio'n ddienw. Roedd cyfweiliadau wedi eu lled-strwythuro ac yn canolbwyntio ar dair thema allweddol:

- Gwybodaeth a dealltwriaeth o Addysg Heddwch;
- Perthnasedd neu berthnasedd posibl y dull gweithredu i ymchwil, ymarfer neu brofiad yr atebwr;
- Cwestiynau ehangach ynghylch 'beth sy'n gweithio' – gan gynnwys yr arfer orau ar gyfer rhwydweithiau, dysgu proffesiynol a chyfnewid gwybodaeth.

Cynhaliwyd yr holl gyfweiliadau ar y dybiaeth eu bod yn ddienw a bod yna gydsyniad gwybodus. Recordiwyd y cyfweiliadau a chawsant eu cynnal ar-lein.

Cynhaliwyd dwy drafodaeth bellach, na chawsant eu recordio, fel sail i ymchwil ar PRIF (Peace Research Institute Frankfurt) a Choleg Penybont. Roedd y rhain yn defnyddio fformat a strwythur ychydig yn wahanol, gan eu bod yn edrych ar gyd-destun a phrofiad sefydliadau a enwir.

Defnyddio data cyfweld

Cafodd y cyfweiliadau a recordiwyd eu trawsgrifio a'u dadansoddi gan awdur yr adroddiad.

Mae dyfyniadau uniongyrchol o'r cyfweiliadau bron iawn air am air; mewn rhai achosion mae'r iaith wedi'i thacluso er mwy ei gwneud yn ddarllenadwy neu i gywiro anghysondebau ieithyddol wrth siarad (e.e. cael gwared ar 'wyddoch chi' neu ychwanegu 'gyda' neu 'y' os ydynt ar goll, etc.).

Beth yw heddwch?


Mae Academi Heddwch Cymru yn diffinio heddwch fel 'mwy nag absenoldeb rhyfel yn unig'.

Mae heddwch yn golygu byd heb drais na'r ofn o drais, yn ogystal â'r amodau i atal gwrthdaro, megis tegwch a pharch.

Mae diffyg heddwch yn ymwneud â mwy na'r 'gwrthdaro sy'n digwydd ymhell i ffwrdd', neu sefyllfaoedd 'na allwn wneud unrhyw beth yn eu cylch'. Mae heddwch hefyd yn ymwneud â'r cymunedau yr ydym yn byw ynddynt ac ofnau ac ansicrwydd bob dydd, megis cam-drin domestig, hiliaeth neu anghydraddoldeb.¹

Cyn archwilio agweddau amlochrog addysg heddwch, mae angen ystyried heddwch. Y diffiniad symlaf o heddwch yw absenoldeb rhyfel neu drais uniongyrchol. Fodd bynnag, mae'r ddealltwriaeth o natur trais wedi datblygu i gwmpasu trais strwythurol, hynny yw, y ffyrdd mae pobl yn dioddef oherwydd trais sy'n bresennol mewn cymdeithas drwy ei systemau cymdeithasol, gwleidyddol ac economaidd.²

Mae cysyniad estynedig yr athronydd Johan Galtung o heddwch a thrais yn egluro bod heddwch yn bosibl yn absenoldeb trais uniongyrchol/personol (heddwch negyddol) a thrais strwythurol a diwylliannol a phresenoldeb cyfiawnder cymdeithasol (heddwch cadarnhaol).³ Heddwch negyddol yw atal trais uniongyrchol, ond nid yw'n mynd i'r afael ag achos y gwrthdaro. Mae heddwch sy'n cael ei gysyniadu fel hyn yn symud y tu hwnt i "reoli a lleihau'r defnydd agored o drais" i gyd-fynd â gwaith i fynd i'r afael â gwrthdaro ac anghydraddoldebau strwythurol a diwylliannol, a'u goresgyn.⁴ Bu i bapur polisi diweddar gan sefydliad Solidar addasu crynodeb defnyddiol Loreta Navarro-Castro a Jasmin Nario-Galace o gysyniadau heddwch negyddol a chadarnhaol, gan ddangos cwmpas y dull gweithredu a'i berthnasedd eang i agweddau ar gyfiawnder cymdeithasol.⁵



Ffigur 1: Solidar Foundation, addaswyd o Navarro-Castro a Nario-Galace⁶

¹ Naratif cyhoeddus drafft, Academi Heddwch Cymru

² Navarro-Castro, L., a Nario-Galace, J. (2019). *Peace education: A pathway to a culture of peace* (3rd ed.) https://www.peace-ed-campaign.org/wp-content/uploads/2019/07/PeaceEducation_3rdEdition_2019.pdf

³ Galtung, J. (1969). Violence, Peace, and Peace Research. *Journal of Peace Research*, 6(3), tt167–191. t 183 <https://doi.org/10.1177/002234336900600301>


⁴ Galtung, J. (1969). Violence, Peace, and Peace Research. *Journal of Peace Research*, 6(3), tt167–191. t 183 <https://doi.org/10.1177/002234336900600301>

⁵ *A Sustainable Journey to Peace: Peace Education in The Context Of Global Citizenship Education*, Sefydliad Solidar, Tachwedd 2022

https://www.solidar.org/system/downloads/attachments/000/001/648/original/Policy_Paper_Peace_Education_Final_Version.pdf?1671711993

⁶ *A Sustainable Journey to Peace: Peace Education in The Context Of Global Citizenship Education*, Sefydliad Solidar, Tachwedd 2022

Mae tynnu sylw at bwysigrwydd "amodau llesiant, cydweithredu a pherthnasoedd cyfiawn" yn darparu lle i ystyried y gwahanol lefelau lle mae heddwch yn cael ei brofi - o heddwch mewnol personol, i'r ddeinameg rhwng dynoliaeth a'r blaned.



Ffigwr 2: Addaswyd o Navarro-Castro a Nario-Galace.⁷

Mae'r ddealltwriaeth gyfannol hon o heddwch yn rhoi cyfle radical i ystyried pŵer ac effaith rhyngweithiadau dynol ac i ddeall gwrthdaro ac anghyfiawnder yn well, a delio â nhw a'u hatal yn well. Mae hefyd yn cyd-fynd ag Agenda ar gyfer Datblygu Cynaliadwy 2030 y Cenhedloedd Unedig a'i "lasbrint cyffredin ar gyfer heddwch a ffyniant i bobl a'r blaned, heddiw ac i'r dyfodol".

Yn y cyd-destun penodol Cymreig, mae fframio heddwch o fewn y termau ehangach hyn yn cyd-fynd â nodau Deddf Llesiant Cenedlaethau'r Dyfodol (Cymru) 2015, sy'n ymgorffori'r egwyddor o ddatblygu cynaliadwy yn y gyfraith, ac yn gosod dyletswydd ar gyrff cyhoeddus i wella'r llesiant economaidd, cymdeithasol, amgylcheddol a diwylliannol.⁸ Y saith nod llesiant, a ddiffinnir yn y ddeddf, yw:

- Cymru lewyrchus
- Cymru gydnerth
- Cymru iachach
- Cymru sy'n fwy cyfartal
- Cymru o gymunedau cydlynus
- Cymru â diwylliant bywiog lle mae'r Gymraeg yn ffynnu
- Cymru sy'n gyfrifol ar lefel fyd-eang

Mae'r dyheadau'n cyd-fynd ag egwyddorion heddwch mewnol, rhyngpersonol, cymdeithasol, byd-eang a phlanedol. Gallai fframio heddwch o fewn y fframwaith datblygu cynaliadwy ehangach fod yn ffordd strategol bwerus o egluro a hyrwyddo perthnasedd dulliau gweithredu heddwch i weithwyr polisi proffesiynol.

https://www.solidar.org/system/downloads/attachments/000/001/648/original/Policy_Paper_Peace_Education_Final_Version.pdf?1671711993

⁷ Navarro-Castro, L., a Nario-Galace, J. (2019). *Peace education: A pathway to a culture of peace* (3ydd cyh.) https://www.peace-ed-campaign.org/wp-content/uploads/2019/07/PeaceEducation_3rdEdition_2019.pdf, t 20

⁸ Deddf Llesiant Cenedlaethau'r Dyfodol (Cymru) 2015: yr hanfodion, <https://www.llyw.cymru/deddf-llesiant-cenedlaethau-dyfodol-cymru-yr-hanfodion-html> (cyrchwyd 30 Ebrill 2024)

Beth yw addysg heddwch?

Mae yna sawl dehongliad a theori o addysg heddwch, ac mae sefydliadau sy'n gweithio i'w hybu wedi cydnabod "nad yw'n glir i lawer o weithredwyr addysgol [a] llunwyr polisi [...] beth yw addysg heddwch" oherwydd ystod y dulliau gweithredu a'r diffyg dealltwriaeth gyffredin.⁹

Nod addysg heddwch, yn gyffredinol, yw hyrwyddo'r wybodaeth, y sgiliau, yr agweddau, a'r gwerthoedd sydd eu hangen i greu diwylliant o heddwch ac atal gwrthdaro p'un ai ar lefel ryngpersonol, gymdeithasol, genedlaethol neu ryngwladol.¹⁰ Mae'n cwmpasu ystod o ddulliau gweithredu a strategaethau addysgol sy'n canolbwyntio ar feithrin dealltwriaeth, goddefgarwch, dulliau di-drais, datrys gwrthdaro, a hyrwyddo hawliau dynol. Gan ddefnyddio egwyddorion heddwch cadarnhaol, mae Daniel Bar-Tal yn amlinellu yn y traethawd 'The Elusive Nature of Peace Education' y dylid ystyried addysg heddwch:

nid fel pwnc ar wahân nac fel prosiect, ond bod yn rhaid ei weld fel cyfeiriadedd addysgol [...] Mae addysg heddwch yn darparu prism y mae disgyblion yn dysgu sut i edrych drwyddo ar destunau a materion a godwyd yn y gwahanol bynciau, a'u gwerthuso, a thrwy hyn maent yn dysgu sut i edrych ar faterion cyfredol mewn cymdeithas a'u gwerthuso.¹¹

Mae deall addysg heddwch fel cyfeiriadedd, neu fel y mae Navarro-Castro a Nario-Calace yn ei gynnig, proses i drawsnewid meddylfryd yn darparu fframwaith defnyddiol.¹² Maent yn gwerthuso bod addysg heddwch:

yn meithrin y sylfaen wybodaeth, sgiliau, agweddau a gwerthoedd sy'n ceisio trawsnewid meddylfryd, agweddau ac ymddygiadau pobl [...] drwy adeiladu ymwybyddiaeth a dealltwriaeth, datblygu consyrn a herio gweithredu personol a chymdeithasol fydd yn galluogi pobl i fyw, cyd-ddeall a chreu amgylchiadau a systemau sy'n gwireddu dulliau di-drais, cyfiawnder a gofal amgylcheddol a gwerthoedd heddwch eraill.¹³

Gall gwybodaeth ar gyfer heddwch gynnwys dysgu ynghylch cysyniad cyfannol o heddwch, y gwahaniaethu rhwng heddwch cadarnhaol a heddwch negyddol, trais uniongyrchol, strwythuredig a diwylliannol a'u heffaith, ac opsiynau heddychlon eraill. Mae sgiliau ar gyfer heddwch yn cynnwys meddwl yn feirniadol, gwrnado'n weithredol, deialog, cyfryngu a thrafod. Mae agweddau i gynorthwyo heddwch yn cynnwys hunan ymwybyddiaeth, hunan barch a pharchu eraill, cynhwysiant, a chyfrifoldeb cymdeithasol. Mae

⁹A Sustainable Journey to Peace: Peace Education in The Context Of Global Citizenship Education, Ymddiriedolaeth Solidar, Tachwedd 2022. t 5 and Mainstreaming Peace Education - Methodologies, Approaches and Visions: A Practitioner's Manual https://www.salto-youth.net/downloads/toolbox_tool_download-file-1086/MPE_manual_web.pdf

¹⁰ <https://www.grainesdepaix.org/en/resources/peace-dictionary/peace-education-unicef-susan-fountain-et-al-1999> Cyrchwyd 5 Tachwedd 2023

¹¹ Bar-Tal, D. (2002). The Elusive Nature of Peace Education. In G. Salomon & B. Nevo (Eds.), *Peace Education: The Concept, Principles, and Practices Around the World* (tt. 27–36). Taylor a Francis. t 31

¹² Navarro-Castro, L., a Nario-Galace, J. (2019). *Peace education: A pathway to a culture of peace* (3ydd cyh.) https://www.peace-ed-campaign.org/wp-content/uploads/2019/07/PeaceEducation_3ydd Argraffiad_2019.pdf, t 25

¹³ Navarro-Castro, L., a Nario-Galace, J. (2019). t 25

Cyngor y Crynwyr ar gyfer Materion Ewropeaidd yn cofnodi'r cymwyseddau canlynol yn ymwneud ag addysg heddwch yn eu papur *Peace Education: Making the Case*:¹⁴

Gwybodaeth	Sgiliau	Ymddygiad a gwerthoedd
Trais uniongyrchol, strwythurol a diwylliannol	Cydweithio adeiladol	Meddwl agored a chynwysoldeb
Achosion a dymmeg gwrthdaro treisiol	Deialog	Hunan barch, parchu eraill a pharchu'r amgylchedd
Opsiynau amgen heddychlon i drais	Cyfryngu	Empathi
Hawliau dynol	Cyfathrebu di-drais (yn cynnwys cyfathrebu chwilfrydig, pendant)	Undod
Gwrth-hiliaeth	Deall, rheoli a mynegi emosiynau	Cysylltedd cymdeithasol
Cydraddoldeb rhywedd	Gwranddo'n weithredol	Hunanymwybyddiaeth
Materion cyfoes	Cydweithio rhyng-ddiwylliannol	Goddefgarwch
Yr amgylchedd a datblygu cynaliadwy	Gwaith tîm	Awydd i hyrwyddo cyfiawnder
Prosesau dinesig	Sgiliau dadansoddi	Cyfrifoldeb cymdeithasol
Heddwch cadarnhaol a heddwch negyddol	Meddwl yn feirniadol	Chwilfrydedd
Cynhwysiant ac allgáu	Trafod	Sensitifrwydd i rywedd
Rheoli, atal, datrys a thrawsnewid gwrthdaro	Myfyrio	Parodrwydd i gydweithio
Dysgu rhyng-ffydd a rhyng-ddiwylliannol		Tosturi

Mae atgyfnerthu'r ddeinameg rhwng y dimensiynau gwybyddol (dealltwriaeth), affeithiol (ymateb) a gweithredol (gweithredu) yn helpu dysgwyr i adnabod a chreu cysylltiadau ac ystyr, gan ei gwneud yn fwy tebygol y bydd safbwyntiau ac ymddygiadau heddwch yn cael eu mabwysiadu a'u defnyddio.¹⁵ Mae'r dull gweithredu cyfannol trawsgwricwlaidd a rhyngddisgyblaethol hwn yn dangos y cyfleoedd posibl i integreiddio dull gweithredu addysg heddwch o fewn addysg ffurfiol ac anffurfiol, gan ddefnyddio ystod eang o bynciau a themâu i archwilio materion perthnasol. Fel y bydd yr adroddiad yn ei ystyried yn y penodau nesaf, mae Fframwaith y Cwricwlwm i Gymru, gyda'i bwyslais ar gydweithio a dysgu traws ddisgyblaethol, yn darparu cyfle i ysgolion integreiddio addysg heddwch yn eu dull gweithredu cwricwlaidd.

¹⁴ Zwart, D. *Peace Education: Making the Case* <https://www.qcea.org/wp-content/uploads/2019/01/Peace-Education-report.pdf>, 2019, cyrchwyd 12 Tachwedd 2023

¹⁵ Navarro-Castro, L., & Nario-Galace, J. (2019). t 27

Manteision addysg heddwch ar gyfer cymunedau dysgu

Mae ysgolion yn darparu'r cyfleoedd i ymarfer adeiladu cymuned yn weithredol, drwy ddarparu lle i bobl ifanc ddysgu sut i dderbyn a pharchu ei gilydd, croesawu gwahaniaethau a dysgu byw gydag amrywiaeth o ddydd i ddydd.¹⁶ Gallant fod yn gymunedau i ymarfer democratiaeth, lle gall myfyrwyr ddysgu ynghylch y pŵer sydd ganddynt i drawsnewid gwrthdaro mewn modd di-drais a chydweithredol. Gan ddefnyddio model 'tri dull gweithredu ar gyfer heddwch'¹⁷ Galtung, mae Hilary Cremin a Roy Leighton wedi datblygu matrices addysg heddwch cadarnhaol. Wedi'i ddatblygu fel offeryn i gefnogi'r gwaith o archwilio "lefelau heddwch a gwrthdaro o fewn cymunedau ysgolion" fel rhan o waith Canolfan Addysg ac Ymchwil Heddwch Caergrawnt.

Matrics Heddwch Cadarnhaol Cremin a Leighton

	Heddwch Mewnol <i>Llesiant</i>	Heddwch Allanol <i>Perthnasoedd</i>	Heddwch Cymunedol a Byd-eang <i>Dinasyddiaeth</i>	Heddwch Ecolegol <i>Cosmos</i>
Adeiladu Heddwch <i>Twf a Newid</i>	Adeiladu capasiti ar gyfer heddwch a llesiant, ac ar gyfer ffyrdd newydd o feddwl, o wybod ac o fodoli. Dysgu hunanymwybyddiaeth, hunan-dderbyn, hunanreolaeth a hunanfyneiant.	Datblygu perthnasoedd iach a dysgu gweithio gydag eraill amrywiol Deall a myfyrio ar ddulliau datrys gwrthdaro rhyngpersonol a llythrennedd gwrthdaro.	Estyn allan ar draws cymunedau a'r byd. Myfyrio a mynegi'r gwerthoedd dynol o ddinasyddiaeth fyd-eang, ymwybyddiaeth feirniadol, dulliau di-drais a gofal, a gwerthuso cyfranogiad mewn rhaglenni creu heddwch yn yr ysgol, yn lleol ac yn fyd-eang.	Dysgu gofalu am y blaned, ac i fod 'mewn cariad' â bywyd. Mynd y tu hwnt i'r Anthroposen ac anrhydeddu r 'mwy na dynol'.
Creu Heddwch <i>Adfer</i>	Mynd i'r afael â gwrthdaro mewnol, a darparu cyfleoedd i adfer a chymodi.	Datrys gwrthdaro'n ddi-drais, gan ddefnyddio'r sbectwm llawn o strategaethau datrys gwrthdaro.	Mynd i'r afael â gwrthdaro mewn ysgol a chymunedau, a chyfranogi mewn rhaglenni creu heddwch lleol a byd-eang.	Prosiectau ailnaturio ac ailgysylltu â byd natur.
Cadw'r Heddwch <i>Cadw</i>	Amddiffyn ffiniau personol, iechyd meddwl a llesiant.	Amddiffyn hawliau a chyfrifoldebau, a chadw pobl yn ddiogel.	Amddiffyn cymunedau lleol a byd-eang, a'n cymuned ysgol	Amddiffyn y blaned a'i hecosystemau.

Ffigwr 3: The 'Positive Peace Matix' Hawlfraint yr Athro Hilary Cremin a Roy Leighton (2022) o'r [Cambridge Peace and Education Research Group \(CPERG\)](https://www.cperg.org/programmes).¹⁸

¹⁶ EduCATE. "Teachers Are Key: Training Teachers in Nonviolent Conflict Transformation." Papur Sefyllfa, 2018 t 3 https://eu.metododanielenovara.it/wp-content/uploads/2015/10/EduCATE_Position-Paper_EN.pdf

¹⁷ Galtung, J Three realistic approaches to peace: peacekeeping, peacemaking, peacebuilding, *Impact of science on society*, XXVI, ½ 1976, t. 103-115

¹⁸ Grŵp Ymchwil Addysg a Heddwch Caergrawnt, <https://www.cperg.org/programmes> Cyrchwyd 9 Tachwedd 2023

Mae'r matrices yn cofnodi dulliau gweithredu eang cadw'r heddwch, creu heddwch ac adeiladu heddwch a'r amrywiol lefelau lle gellir profi heddwch - a gwrthdaro - o'r personol i'r byd-eang, ac mae'n darlunio arferion, ymddygiadau a dulliau sy'n cyfrannu at heddwch cadarnhaol (gweler Ffigwr 3).¹⁹ Mae mynd i'r afael â llesiant y gymuned ysgol yn creu lle diogel a synnwyr o berthyn, sy'n meithrin gwynwch a dealltwriaeth. Gall dull gweithredu ysgol gyfan ar gyfer addysg heddwch gael effaith gadarnhaol ar amgylchedd ysgol, gan leihau gwrthdaro rhwng disgyblion, grymuso staff i reoli sefyllfaoedd anodd, a chreu amgylchedd dysgu gwell.²⁰

Mae'r wybodaeth, sgiliau a gwerthoedd mae'n ei rannu yn paratoi pobl i ddelio â gwrthdaro mewn ystod o gyd-destunau - yn eu bywyd teuluol ac wrth ryngweithio yn y gymuned ehangach - ac yn y tymor hir mae hyn yn cyfrannu at gymunedau mwy cydlynol.²¹ Mae'r agwedd hon ar addysg heddwch, a'i chymhwyso'n weithredol mewn bywyd dyddiol, yn cynnig potensial ar draws y daith ddysgu gydol oes, gan gynnwys addysg a hyfforddiant ôl-orfodol. Datblygodd y Fforwm Rhyngddiwyllynnol Ewropeaidd lawlyfr ymarferydd, *Mainstreaming Peace Education*, yn 2014, sy'n ein hatgoffa bod addysg gydol oes ac addysg oedolion yn ymestyn y tu hwnt i "gyflogadwyedd a datblygiad proffesiynol", ac yn cyfrannu "tuag at feithrin dinasyddiaeth weithredol, cryfhau twf personol a sicrhau cynhwysiant cymdeithasol a chydlynol drwy ddatblygu cymwyseddau allweddol gydol oes".²² Gallai creu cyfleoedd o fewn dysgu gydol oes i archwilio agweddau ar addysg heddwch ddod â lluo o fanteision i ddysgwyr, eu perthnasoedd, cymunedau a chymdeithas ehangach.

Addysg Heddwch a Safbwyntiau Byd-eang

Mae'r agweddau byd-eang a phlanedol ar ddealltwriaeth gyfannol o heddwch hefyd yn rhan o addysg heddwch. Mae datblygiad a thwf addysg dinasyddiaeth fyd-eang (ADF) ac addysg ar gyfer datblygu cynaliadwy (ADC) wedi pwysleisio ymhellach rôl addysg wrth greu undod a dealltwriaeth ryngwladol, ac fel "arf i fynd i'r afael â bygythiadau a'u trawsnewid, yn ogystal â llwybr at heddwch cynaliadwy".²³

Mae addysg heddwch yn cael ei gynnwys yn Nod Datblygu Cynaliadwy 4.7, sydd, erbyn 2023, â'r diben o sicrhau bod:

pob dysgwr yn caffael y wybodaeth a'r sgiliau angenrheidiol i hyrwyddo datblygu cynaliadwy, gan gynnwys, ymysg eraill, drwy addysg ar gyfer datblygu cynaliadwy a ffordd o fyw cynaliadwy, hawliau dynol, cydraddoldeb rhywedd, hyrwyddo diwylliant o heddwch a diwylliant di-drais, dinasyddiaeth

¹⁹ Peace Profiling in Schools, Grŵp Ymchwil Addysg Heddwch Caergrawnt,, <https://www.cperg.org/programmes>, cyrchwyd 12 Tachwedd 2023

²⁰ Zwart, D. *Peace Education: Making the Case* <https://www.qcea.org/wp-content/uploads/2019/01/Peace-Education-report.pdf>, 2019, cyrchwyd 12 Tachwedd 2023

²¹ EduCATE. "Teachers Are Key: Training Teachers in Nonviolent Conflict Transformation." Papur Sefyllfa, 2018 t 6-8 https://eu.metododanielenovara.it/wp-content/uploads/2015/10/EduCATE_Position-Paper_EN.pdf

²² Fforwm Rhyng-ddiwyllynnol Ewropeaidd, *Mainstreaming Peace Education: Methodologies, Approaches and Visions*, 2014 <http://unoy.org/wp-content/uploads/Mainstreaming-Peace-Education.pdf> t 24

²³ *New Understandings of Education's Contributions to Peace* UNESCO Technical note, 2022 <https://unesdoc.unesco.org/ark:/48223/pf0000381530> t 3

fyd-eang a gwerthfawrogi amrywiaeth ddiwylliannol a chyfraniad diwylliant i ddatblygu cynaliadwy.²⁴

Mae yna lawer o nodweddion cyffredin a gorgyffwrdd rhwng ADF, ADCDF, addysg hawliau dynol (AHD) ac addysg heddwch. Mae papur polisi 2022 *Ymddiriedolaeth Solidar A Sustainable Journey to Peace: Peace Education in The Context Of Global Citizenship Education*, yn nodi bod y fframweithiau hyn yn cyflwyno her a chyfle i ymarferwyr. Mae llywio'r dulliau gweithredu amrywiol, deall eu rhyng-gysylltiadau a safle yn nhirwedd y polisi yn gynyddol heriol, ond gall y croestoriadau ddarparu mwy o gyfleoedd i ymgorffori addysg heddwch a chreu cynghreiriau a datblygu rhwydweithiau.²⁵ Mae menter ymchwil 'Mapio Addysg Heddwch' yr Ymgyrch Fyd-eang ar gyfer Addysg Heddwch wedi dechrau coladu prif ganghennau a themâu a dulliau gweithredu arwyddocaol addysg heddwch. Mae'r ymarfer yn cynnwys ADF, ADC a AHD oherwydd, er nad yw'r dulliau gweithredu hyn yn cael eu nodi'n amlwg fel 'addysg heddwch', mae eu diben cymdeithasol pendant a nodau addysgol yn cyfrannu'n uniongyrchol ar ddiwylliannau heddwch.²⁶ Mae mapio'r themâu'n dod â'r nodweddion cyffredin at ei gilydd ac yn datgelu cyfleoedd ar gyfer cydweithio, rhannu gwybodaeth ac arferion rhwng gwahanol feysydd, a chreu partneriaethau newydd posibl rhwng sefydliadau sy'n gweithio yn y maes.

Cododd Argymhelliad UNESCO 1974 sy'n ymwneud ag Addysg ar gyfer Dealltwriaeth, Cydweithio a Heddwch Rhyngwladol ac Addysg yn ymwneud â Hawliau Dynol a Rhyddid Sylfaenol broffil addysg heddwch. Fe ffurfiodd egwyddorion ar gyfer rheoliad rhyngwladol addysg i gynorthwyo datblygu cyfiawnder, rhyddid, hawliau dynol a heddwch - fe lywiodd Agenda 2030, Addysg ar gyfer Datblygu Cynaliadwy ac Addysg Dinasyddiaeth Fyd-eang.²⁷ Ym mis Tachwedd 2023, bu i aelod-wladwriaethau UNESCO ddiweddarau Argymhelliad 1974 i adlewyrchu'r heriau niferus sy'n wynebu dynoliaeth sydd wedi'u cydnabod yn yr hanner can mlynedd ddiwethaf, yn cynnwys newid hinsawdd, prynwriaeth anghynladwy, pandemigau a chlefyd heintus, ideolegau treisgar ac atgas yn lledaenu'n gyflym, hiliaeth systematig, ac anghydraddoldebau cyson. Mae teitl argymhelliad UNESCO 2023 Argymhelliad, Addysg ar gyfer Heddwch, Hawliau Dynol a Datblygu Cynaliadwy, yn gosod addysg heddwch o fewn addysg datblygu cynaliadwy, a gallai hybu gwerthfawrogiad ac ymwybyddiaeth bellach o'r dull gweithredu.

Diffiniad

Nod addysg heddwch yw hyrwyddo gwybodaeth, sgiliau, agweddau, a gwerthoedd sydd eu hangen i greu diwylliant o heddwch ac atal gwrthdaro ar wahanol lefelau ac mae, heb os, yn ddaioni absoliwt. Fodd bynnag, mae'r dull gweithredu'n wynebu peth rhagdybiaethau a rhwystrau. Mae yna luosogrwydd o

²⁴ <https://www.globalgoals.org/goals/4-quality-education/> cyrchwyd 10 Tachwedd 2023

²⁵ *A Sustainable Journey to Peace: Peace Education in The Context Of Global Citizenship Education*, Ymddiriedolaeth Solidar, Tachwedd 2022. t 15-16

²⁶ <https://map.peace-ed-campaign.org/what-is-peace-ed/> a <https://map.peace-ed-campaign.org/approaches-themes/>

²⁷ *Recommendation on Education for Peace and Human Rights, International Understanding, Cooperation, Fundamental Freedoms, Global Citizenship and Sustainable Development*, ED/REV-1974REC/2023/6, <https://unesdoc.unesco.org/ark:/48223/pf0000386653>

ddehongliadau, ac mae addysg heddwch yn "amlochrog, amrywiol ac amlffurf".²⁸ Yn ogystal â hyn, fel y myfyriodd Nevena Radosavljević,, hyfforddwr addysg heddwch, gall y cysyniad ei hun ymddangos yn od - "rhywbeth sy'n 'hipäidd', amgen [...] idealistig neu brin yn gyraeddadwy".²⁹ Fodd bynnag, mae wedi'i gysylltu'n gynhenid ag addysg ar hawliau dynol, mae'n adfer perthnasoedd ac yn hyrwyddo cydlynid cymdeithasol.

At ddibenion yr adroddiad hwn, diffinnir addysg heddwch fel dull gweithredu addysgol trawsgwricwlaidd gyda'r nod o hyrwyddo dealltwriaeth a diwylliant cyfannol o heddwch drwy drosglwyddo gwybodaeth, sgiliau, agweddau, a gwerthoedd sy'n angenrheidiol ar gyfer atal gwrthdaro a chreu cymdeithas heddychlon. Mae astudiaethau heddwch, sef dysgu ynghylch achosion ac effaith rhyfel, opsiynau amgen i ryfel, adeiladu heddwch ac ymgychodd heddwch, yn cael ei gynnwys o fewn addysg heddwch, ond mae addysg heddwch yn ehangach yn ei ymagwedd wrth iddo annog a chynorthwyo newid ymddygiad a gweithredoedd er mwyn gweld gwerth heddwch ar wahanol lefelau. Yn wahanol i astudiaethau heddwch, nid yw addysg heddwch yn bwnc ar wahân, ond yn ddull gweithredu sy'n treiddio i wahanol bynciau, gan helpu dysgwyr i werthuso testunau a materion cymdeithasol cyfoes drwy lygad heddwch.

²⁸ Bar-Tal, Daniel. 'The Elusive Nature of Peace Education' G. Salomon & B. Nevo (Eds.), *Peace Education: The Concept, Principles, and Practices Around the World* (tt. 27–36). Taylor a Francis 2002

²⁹ Radosavljević, Nevena, 'Renewal of education for peace and why it is important?!' *Coyote* Cyhoeddiad 33, Council of Europe <https://pjp-eu.coe.int/en/web/coyote-magazine/renewal-of-education-for-peace-and-why-is-it-important>

Addysg Heddwch mewn cyd-destun Cymreig

Mae adroddiad Addysg 2030 diweddar gan UNESCO yn amlinellu bod ymgorffori addysg heddwch mewn addysg ffurfiol yn strategaeth annatod i adeiladu heddwch, a gellir ei "integreiddio i ysgolion i gynorthwyo'r nodau dysgu angenrheidiol i fynd i'r afael â bygythiadau byd-eang a'u hamlygiadau lleol".³⁰ Mae'r adroddiad hefyd yn amlygu rôl bwysig addysg anffurfiol i gyrraedd cynulleidfa ehangach o ddysgwyr, yn cynnwys pobl ifanc ac oedolion. Mae'n nodi bod angen strategaethau pellach i gynorthwyo dysgu anffurfiol ar gyfer heddwch sy'n digwydd yn y teulu, y gweithle a lleoliadau yn y gymuned; mae strategaethau a seilwaith dysgu gydol oes yn hanfodol i "gynorthwyo datblygiad llawn y person, ac i feithrin datblygu capasiti drwy gydol bywyd i ymateb i fygythiadau newydd mewn byd sy'n newid".³¹ Bydd gweddill yr adroddiad hwn yn ystyried enghreifftiau o arferion Addysg Heddwch yng Nghymru, a'r potensial i'w datblygu, ar draws taith y dysgwr o'r ysgol gynradd hyd at addysg ôl-orfodol, gan edrych ar weithgareddau ffurfiol ac anffurfiol.

Cyn troi i edrych ar enghreifftiau o addysg heddwch yng Nghymru, mae angen amlinellu'r cyd-destun ehangach, yn cynnwys statws Addysg ar gyfer Datblygu Cynaliadwy a Dinasyddiaeth Fyd-eang (ADCDF) yn system addysg Cymru. Mae diwygio sylweddol wedi digwydd i addysg yng Nghymru yn ystod y blynyddoedd diwethaf, o lefel meithrin i addysg a hyfforddiant ôl-orfodol. Mae nodau Deddf Llesiant Cenedlaethau'r Dyfodol (Cymru) 2015 wedi eu hymgorffori yng ngweledigaeth y llywodraeth ar gyfer addysg, ac mae Dangosyddion Cenedlaethol Llesiant Cymru yn cynnwys deilliannau sy'n gysylltiedig ag addysg.³²

Yn 2008, mynegodd Llywodraeth Cynulliad Cymru bryd hynny ddyhead i ysgolion, addysg bellach, a dysgu oedolion, weithio i ymgorffori ADCDF ym mhob rhan o'u dysgu ac addysgu.³³ Mae'r cysyniadau felly wedi bod yn rhan o'r ymagwedd at addysg yng Nghymru am yn agos i genhedlaeth, a dylai bod dealltwriaeth dda o fewn y sector. Cyhoeddodd Estyn adroddiad thematig yn 2014 oedd yn nodi bod cynnydd penodol wedi ei wneud ers 2006 o ran dealltwriaeth disgyblion o ddinasyddiaeth fyd-eang, a'u bod, yn gyffredinol, yn gwybod "sut i leihau gwrthdaro personol".³⁴ Byddai gosod addysg heddwch o fewn ADCDF ac Addysg Hawliau Dynol yn debygol o fod yn fanteisiol yn strategol yn y cyd-destun Cymreig, a byddai arddangos

³⁰ UNESCO, *Peace education in the 21st century: an essential strategy for lasting peace* <https://unesdoc.unesco.org/ark:/48223/pf0000388385>, t 9 cyrchwyd 25 Mai 2024

³¹ Ibid, t 10

³² Llywodraeth Cymru, Llesiant Cymru 2023 <https://www.gov.wales/wellbeing-wales-2023>

³³ "Mae newid hinsawdd, tlodi, gwrthdaro a phwysau cwsmer i gyd yn rhan o'n byd ni heddiw. Mae ADCDF yn ceisio dod o hyd i ffyrdd i godi ymwybyddiaeth a gweithredu i fynd i'r afael â chanlyniadau ein dewis o ffordd i fyw" Jane Hutt AS, y Gweinidog dros Blant, Addysg, Dysgu Gydol Oes a Sgiliau - Addysg ar gyfer Datblygu Cynaliadwy a Dinasyddiaeth Fyd-eang - *Strategaeth Gweithredu*. Dyfynnwyd yn *Addysg ar gyfer Datblygu Cynaliadwy a Dinasyddiaeth Fyd-eang, Dealltwriaeth Gyffredin ar gyfer Ysgolion*, Llywodraeth Cymru, <https://hwb.gov.wales/storage/eaf467e6-30fe-45c9-93ef-cb30f31f1c90/common-understanding-for-school.pdf> t 3

³⁴ Estyn, ADCDF: *Cynnydd mewn addysg ar gyfer datblygu a dinasyddiaeth fyd-eang*, <https://www.estyn.gov.wales/system/files/2020-07/ESDGC%253A%2520Progress%2520in%2520education%2520for%2520sustainable%2520development%2520and%2520global%2520citizenship%2520-%2520June%25202014.pdf> t 3-4

cyfatebolrwydd addysg heddwch ac ADCDF yn helpu i fframio'r ymagwedd mewn termau a all fod yn fwy cyfarwydd, ac yn fwy atyniadol, i ymarferwyr addysgol a gweithwyr polisi proffesiynol.

Roedd *Cynllun gweithredu, Cenhadaeth ein Cenedl 2017–21* Llywodraeth Cymru yn amlinellu gweledigaeth eang ar gyfer addysg yng Nghymru, ar bob lefel.³⁵ Roedd y cynllun gweithredu yn amlinellu sut fyddai'r ymagwedd at addysg yn cyfrannu at y nodau llesiant, yn cynnwys;

- Hyrwyddo iechyd da a llesiant i bawb
- Meithrin cymunedau iachach ac amgylcheddau gwell
- Cynorthwyo pobl ifanc i wneud y gorau o'u potensial
- Meithrin uchelgais ac annog dysgu am oes
- Arfogi pawb â'r sgiliau priodol ar gyfer byd sy'n newid
- Meithrin cymunedau, diwylliant ac iaith cydnerth
- Hyrwyddo ac amddiffyn lle Cymru yn y byd

Wrth galon y weledigaeth, a'r diwygiadau sy'n gysylltiedig, roedd y Cwricwlwm i Gymru, a gafodd ei weithredu mewn ysgolion cynradd ac uwchradd yng Nghymru yn 2022. Cyd-ddyluniwyd fframwaith Cwricwlwm i Gymru gydag athrawon ac ysgolion yn cymryd rhan allweddol gan adael i bob ysgol ddatblygu a darparu eu cwricwlwm eu hunain. Wedi'i adeiladu ar bedwar diben, y nod yw datblygu dysgwyr sy'n:

- uchelgeisiol, galluog, ac sy'n barod i ddysgu drwy gydol eu hoes
- cyfranwyr creadigol, mentrus, sy'n barod i chwarae rhan lawn mewn bywyd a gwaith
- dinasyddion egwyddorol a gwybodus yng Nghymru a'r byd
- unigolion iach, hyderus, sy'n barod i fyw bywyd cyflawn fel aelodau gwerthfawr o gymdeithas.³⁶

Mae'r dibenion hyn hefyd yn llywio'r dyheadau ehangach ar gyfer dysgu gydol oes yng Nghymru, fel yr amlinellwyd yn y map ffordd wedi'i ddiweddarau yn 2023, *Ein Cenhadaeth Genedlaethol: safonau a dyheadau uchel i bawb*, sy'n cynnwys y nod fod "pob dysgwr, beth bynnag fo'i gefndir, i fod yn ddinesydd iach, sy'n ymgysylltu, sy'n fentrus ac sy'n foeseogol, yn barod i chwarae rhan lawn mewn bywyd a gwaith."³⁷

Mae canllawiau'r cwricwlwm yn cynnwys chwe maes dysgu a phrofiad (MDaPh), yn seiliedig ar "ddatganiadau statudol o'r hyn sy'n bwysig", sy'n darparu potensial ar gyfer dysgu rhyngddisgyblaethol a thraws ddisgyblaethol: Celfyddydau Mynegiannol; Iechyd a Llesiant; Dyniaethau; Ieithoedd, Llythrennedd a Chyfathrebu; Mathemateg a Rhifedd; Gwyddoniaeth a Thechnoleg.³⁸ Yn ogystal â thri fframwaith sgiliau trawsgwricwlaidd (sgiliau llythrennedd, rhifedd a digidol), mae canllawiau'r cwricwlwm yn cyfeirio at themâu trawsbynciol i'w hystyried wrth ddylunio'r cwricwlwm, yn cynnwys Addysg Cydberthynas a

³⁵ Addysg yng Nghymru, Llywodraeth Cymru: *Cenhadaeth ein Cenedl, Cynllun gweithredu 2017–21*
https://dera.ioe.ac.uk/id/eprint/30138/1/170926-education-in-wales-en-1_Redacted.pdf

³⁶ <https://hwb.gov.wales/cwricwlwm-i-gymru/cynllunio-eich-cwricwlwm/datblygu-gweledigaeth-ar-gyfer-cynllunio-cwricwlwm/#curriculum-design-and-the-four-purposes>

³⁷ *Ein Cenhadaeth Genedlaethol: safonau uchel a dyheadau i bawb*, Llywodraeth Cymru 21 Mawrth 2023;
<https://www.gov.wales/our-national-mission-high-standards-and-aspirations-all-html> cyrchwyd 18 Rhagfyr 2023

³⁸ <https://www.llyw.cymru/cwricwlwm-i-gymru-y-cod-datganiadau-or-hyn-syn-bwysig>

Rhywioldeb (ACRh); Hawliau Dynol; Amrywiaeth; a chyd-destunau lleol, cenedlaethol a rhyngwladol. Mae'r themâu cyfannol hyn yn cefnogi'r pedwar diben, ac yn defnyddio agweddau ar Addysg ar gyfer Datblygu Cynaliadwy a Dinasyddiaeth Fyd-eang.

Mae ACRh yn un o ofynion statudol y cwricwlwm a'i nod yw helpu i rymuso "dysgwyr i ffurfio a chynnal ystod o berthnasoedd, i gyd yn seiliedig ar ymddiriedaeth o'r ddwy ochr a pharch".³⁹ Mae hawliau dynol yn ymddangos yn y cod ADRh, ac yn y disgrifiadau dysgu ar gyfer MDaPh y Dyniaethau ac Iechyd a Llesiant. Yn ogystal â hyn, mae Deddf Cwricwlwm ac Asesu (Cymru) 2021 yn nodi bod angen i'r holl staff sy'n ymwneud â chyflwyno'r cwricwlwm ddatblygu gwybodaeth a dealltwriaeth o hawliau dynol plant dan Gonfensiwn y Cenhedloedd Unedig ar Hawliau'r Plentyn (CCUHP) a Chonfensiwn y Cenhedloedd Unedig ar Hawliau Pobl ag Anableddau (CCUHPA).

Mae'r ffocws ar gyd-destunau lleol, cenedlaethol a rhyngwladol yn rhoi cyfle i ddatblygu addysg dinasyddiaeth fyd-eang ymhellach, gan alluogi dysgwyr i archwilio gwahanol safbwyntiau a defnyddio eu sgiliau a'u gwybodaeth i nodi, gwerthfawrogi a deall cysylltiadau a rhyng-gysylltedd. Mae canllawiau'r cwricwlwm yn amlinellu y gall yr agwedd hon gynorthwyo "dysgwyr i ddatblygu dinasyddiaeth sy'n amlochrog, gan fyfyrwyr ar eu rolau a'u cyfrifoldebau o fewn pob cyd-destun a chydabod yr amrywiaeth o fewn pob un".⁴⁰ Mae'r ffocws hwn ar y byd a'r lleol hefyd yn rhoi cyfle i gynaliadwydd a'r nodau datblygu cynaliadwy gael eu hystyried. Mae'r cysyniad cynefin hefyd yn rhan o'r thema hon, y gellir ei ddefnyddio i gyfrannu at ymdeimlad cryf o berthyn a pherthyn cymunedol i ddysgwyr.⁴¹

Mae integreiddio ADCDF a phlant a hawliau dynol o fewn y cwricwlwm yn darparu sylfaen dda i ysgolion archwilio agweddau ar addysg heddwch.

Bydd yr is-benodau canlynol yn amlinellu cyd-destun addysg heddwch, a'r photensial ar ei gyfer, ar bob lefel addysgol yng Nghymru – Cynradd, Uwchradd, Addysg Bellach, Addysg Uwch, a Dysgu Gydol Oes.

Cynllun Ysgolion Heddwch Cymru

Roedd prosiect 'Cymru dros Heddwch' y WCIA a ariannwyd drwy Gronfa Treftadaeth y Loteri, a gynhaliwyd rhwng 2014 a 2018 fel rhan o'r digwyddiadau i nodi can mlynedd ers y Rhyfel Byd Cyntaf, yn cynnwys datblygu rhaglen beilot Cynllun Ysgolion Heddwch ar gyfer Cymru, i ysbrydoli'r genhedlaeth nesaf o

³⁹ <https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/#addysg-cydberthynas-a-rhywioldeb:canllawiau-statudol>

⁴⁰ <https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/#local,-national-and-international-contexts>

⁴¹ Susan Chapman, Rosy Ellis, Gary Beauchamp, Lisa Siryf, David Stacey, Jane Waters-Davies, Adam Lewis, Catherine Jones, Merris Griffiths, Sammy Chapman, Rachel Wallis, Elizabeth Sheen, Tom Crick, Helen Lewis, Graham French & Stephen Atherton 'Nid yw fy llun i yng Nghymru': canfyddiadau disgyblion o gynefin (Perthyn) mewn datblygu cwricwlwm ysgolion cynradd yng Nghymru, Addysg 3-13, 51:8, 1214-1228, 2023

<https://www.tandfonline.com/doi/full/10.1080/03004279.2023.2229861> Gweler hefyd *Gweithgor Cymunedau, Cyfraniadau a Chynefin Pobl Dduon, Asiaidd a Lleafrifoedd Ethnig yn y Cwricwlwm Newydd: adroddiad terfynol* <https://www.gov.wales/final-report-black-asian-and-minority-ethnic-communities-contributions-and-cynefin-new-curriculum>

heddychwyr. Lansiwyd y cynllun peilot yn 2016 ac ers hynny mae wedi dod yn rhan o ddarpariaeth ddysgu fyd-eang WCIA ar gyfer ysgolion. Mae Academi Heddwch Cymru wedi cyfrannu at gyllido'r cynllun ers 2020.

Nod Cynllun Ysgolion Heddwch Cymru yw cynorthwyo ysgolion sy'n ymgorffori ethos heddychlon yn weithredol yn ogystal â dysgu a gweithgareddau sy'n ymwneud â heddwch i'w bywydau bob dydd. Mae Ysgolion Heddwch yn gweithio tuag at fod yn lle:

- Mae pawb yn teimlo'n ddiogel, yn cael eu parchu a'u gwerthfawrogi
- Mae yna ethos ysgol sy'n seiliedig ar gydweithredu, parchu gwahaniaeth a datrys problemau
- Mae heddwch yn llinyn cyffredin ym mywydau bob dydd dysgwyr - yn y modd y maent yn dysgu a byw gyda'i gilydd
- Mae'r cwricwlwm yn cynnwys cyfleoedd i ddysgu straeon heddychwyr a myfyrion'n feirniadol arnynt a materion sy'n ymwneud â heddwch a chynladwyedd - o Gymru a thu hwnt.
- Mae dysgwyr yn cael eu hannog i fod yn ddinasyddion egwyddorol a gwybodus yng Nghymru a'r byd.⁴²

Sail ymchwil a datblygiad y cynllun oedd ymwybyddiaeth o natur dameidiog ac anffurfiol llawer o weithgareddau addysg heddwch;

yr hyn rydych yn tueddu i'w cael dan ymbarél addysg heddwch, yw mentrau lle 'r oedd sefydliadau trydydd sector mwy na thebyg yn mynd i mewn i ysgolion a darparu agweddau gwahanol o addysg heddwch. Efallai y byddai pobl yn mynd i mewn a chyflwyno sesiwn ar ymwybyddiaeth ofalgar, wyddoch chi, i fwydo i heddwch mewnol [...] Ond mae'n cael ei gyflwyno'n allanol. Ac maent yn cyflwyno, yn amlwg, i garfan, oherwydd nid oed modd gwneud mwy na hynny ar un tro. Felly, wyddoch chi, mae'n hynod o werthfawr, ond mae yna gwestiynau o ran faint o effaith mae'n ei gael ar yr ysgol gyfan? (Aelod o Staff Cynllun Ysgolion Heddwch Cymru)

Mae yna brosiectau ar raddfa lai sy'n hyrwyddo heddwch mewn ysgolion yng Nghymru, er enghraifft y prosiect Peace Mala a'r Prosiect Ysgolion Heddychlon Canolbarth Cymru.⁴³ Gwnaed ymdrechion parhaus i gael gwybodaeth gan Rwydwaith Ysgolion Cysylltiedig UNESCO (ASPnet) ynghylch ei bresenoldeb yng Nghymru, a'i waith mewn addysg heddwch ond ni chafwyd ymateb.

Mae prosiect Ysgolion Heddwch Cymru yn brosiect mwy datblygedig, gyda chyrhaeddiad cenedlaethol, sydd wedi creu dull gweithredu fframwaith i ysgolion fabwysiadu ac ymgorffori ac sy'n dilyn arferion gorau

⁴² WCIA Sut i ddod yn Ysgol Heddwch, <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823890587>

⁴³ Peace Mala, <https://www.peacemala.org.uk/>, a'r Prosiect Ysgolion Heddychlon Canolbarth Cymru, <https://addysgheddpeaceedu.org.uk/>

sefydledig mewn addysg heddwch.⁴⁴ Agwedd allweddol ar Gynllun Ysgolion Heddwch Cymru yw ei fod yn hyrwyddo dull gweithredu ysgol gyfan o ymgorffori heddwch, sy'n cefnogi amgylchedd dysgu heddychlon a phrofiad uniongyrchol o ymarfer ymddygiadau a chymwyseddau heddychlon. Mae'n rhoi cyfle i gymryd agwedd gyfannol, yn unol ag arfer gorau mewn addysg dros heddwch, er mwyn hwyluso "effaith bendant ar fywyd yr ysgol - yn y ffordd y mae staff a disgyblion yn uniaethu â'i gilydd ac yn dysgu gyda'i gilydd".⁴⁵ Adroddwyd yn y gwerthusiad cychwynnol o'r cynllun mai canlyniad anfwriadol i'w groesawu oedd bod nifer o'r ysgolion sy'n rhan o'r peilot wedi ailedrych ar eu polisiau ymddygiad a gwrth-fwllo er mwyn hyrwyddo perthnasodd diogel a pharchus, a ddaeth â manteision i lesiant a chymuned gyfan yr ysgol.⁴⁶ Roedd cyfranogiad disgyblion yn allweddol i'r gwaith hwn, ac mae agweddau ymddygiadol y dull gweithredu heddwch bellach wedi'u hymgorffori yn neilliannau awgrymedig y cynllun fel bod ysgolion yn gwybod am yr hyn y maent yn gweithio tuag ato ac yn gallu dangos tystiolaeth o sut mae hyn wedi cael effaith gadarnhaol ar lesiant, dysgu a sgiliau disgyblion ac ar gymuned yr ysgol gyfan.⁴⁷ Mae'r dull gweithredu ysgol gyfan yn cynnwys cynorthwyo a chynnwys uwch reolwyr, yn cynnwys y llywodraethwyr, i sicrhau bod y dull heddwch wedi'i integreiddio'n llawn, yn hytrach na chael ei ystyried yn "ychydig o ychwanegiad" (Aelod Staff Ysgolion Heddwch Cymru).⁴⁸ Fel yr amlinellwyd mewn dogfen 'pecyn cymorth', yr ethos yw: "fod pawb yn eich ysgol yn ymwybodol eich bod yn Ysgol Heddwch ac yn gwybod beth mae hyn yn ei olygu o ran sut mae pobl yn trin ei gilydd, beth sy'n dderbyniol ac yn annerbyniol, a datblygu ffyrdd newydd o ddysgu a meddwl".

Mae'r rhaglen wedi'i dylunio i fod yn fframwaith hyblyg i gasglu a chydabod dulliau gweithredu a gweithgareddau y gall ysgol fod eisoes yn eu gwneud - er enghraifft, defnyddio dull gweithredu wedi'i lywio gan hawliau dynol, yr achrediad Eco-Sgolion, defnyddio arferion adferol neu weithio ar ddinasyddiaeth fyd-eang. Mae'n galluogi ysgolion i ddatblygu eu gweledigaeth a'u cynllun eu hunain i weddu orau i'w anghenion a'u cymuned, ac mae cyfranogwyr yn cael eu cynorthwyo i gyflawni eu hamcanion, gyda help a chynghor ymarferol ac ystod o adnoddau, yn ogystal â manylion mentrau eraill sy'n berthnasol i addysg heddwch.⁴⁹ Mae tair lefel i statws Ysgol Heddwch, sydd wedi 'u crynhoi yn y ffigwr isod:

*Ffigwr 4: Lefelau achredu Ysgolion Heddwch Cymru.*⁵⁰

⁴⁴ Systemic UPscaling of Peace Education pRactices (UPPER), *Collection Of Good Practice* https://eiplab.eu/wp-content/uploads/2019/11/UPPER.IO1_Report-on-the-collection-of-good-practices.pdf, cyrchwyd 28 Ebrill 2024

⁴⁵ WCIA Sut i ddod yn Ysgol Heddwch, Ysgolion Heddwch Cymru <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823890587>

⁴⁶ WCIA, Cofnod Prosiect Cymru dros Heddwch 2014-19, <https://www.wcia.org.uk/wp-content/uploads/2019/11/Project-Record-Wales-for-Peace-2014-19-Final-Draft-Nov-2019.pdf> Cyrchwyd 8 Rhagfyr, 2023

⁴⁷ Gweler WCIA 'Sut i ddod yn Ysgol Heddwch' Cynllun Ysgolion heddwch Cymru a 'Cynllun Gweithredu Ysgolion Heddwch Cymru'

⁴⁸ *ibid*

⁴⁹ WCIA, Mentrau Cynorthwyo Cynllun Ysgolion Heddwch Cymru <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823903600> cyrchwyd 10 Ionawr 2024

⁵⁰ WCIA, Sut i ddod yn Ysgol Heddwch. Mae dadansoddiad manylach o'r hyn sy'n ddisgwyliedig ar bob lefel i'w gweld yn 'Cynllun Ysgolion Heddwch Cymru - Lefelau, Gofynion a Chynnydd' <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823894285>

Y nod ar lefel tri yw bod addysg heddwch wedi'i "ymgorffori'n dda yng nghwricwlwm yr ysgol, ond bod pobl ifanc hefyd yn ymgymryd â phrosiectau ac yn cymryd perchnogaeth ohonynt. Mae'n ymwneud â'u grymuso i wneud pethau sy'n gwneud gwahaniaeth go iawn" (Aelod o Staff Ysgolion Heddwch Cymru) Gall ysgolion ddewis pa lefel i'w hamlygu pan maent yn ymuno â'r cynllun a gellir mynd ymlaen i lefel uwch yn eu hamser eu hunain. I gadw eu hachrediad, mae angen i ysgolion ail gyflwyno cais ar ôl tair blynedd.

Perthnasedd o fewn y Cwricwlwm i Gymru

Roedd cyflwyno Cynllun Ysgolion Heddwch Cymru'n cyd-daro â datblygu'r Cwricwlwm newydd i Gymru, ac roedd gofynion y cwricwlwm yn llywio dyluniad y fframwaith. Mae trosolwg o'r cwricwlwm ar dudalen 17. Mae'r newid i'r dull gweithredu pedwar diben ac yn benodol y nod o gefnogi dysgwyr i ddod yn "ddinasyddion egwyddorol a gwybodus yng Nghymru a'r byd" yn dod â llawer o gyfleoedd ar gyfer addysg dinasyddiaeth fyd-eang ac addysg ar gyfer datblygu cynaliadwy, yn ogystal â thynnu sylw at hawliau dynol. Mae pwyslais y cwricwlwm ar ddulliau gweithredu trawsgwricwlaidd a rhyngddisgyblaethol hefyd yn rhoi cyfle i archwilio materion a phynciau sy'n berthnasol i ddinasyddiaeth fyd-eang, ac mae'n darparu lle i addysg dros heddwch gael ei integreiddio. Fel y nodwyd gan aelod o staff Ysgolion Heddwch mewn cyfweiliad, "os ydych chi'n gwneud addysg heddwch yn iawn yn eich ysgol, byddech chi'n ticio'r holl [ddiben] ddinasyddion gwybodus moesegol".

Mapiodd Ysgolion Heddwch Cymru addysg heddwch i'r cwricwlwm newydd mewn papur a gyhoeddwyd yn 2022.⁵¹ Mae'r ddogfen yn rhoi trosolwg o sut mae addysg heddwch yn cyfateb i'r 'Datganiadau o'r hyn sy'n Bwysig' ar draws y chwe maes dysgu a phrofiad (MDaPh), a dolenni at adnoddau a mentrau perthnasol. Mae'r ddogfen ar gael o dudalennau Dysgu Byd-eang gwefan WCIA, ond ar hyn o bryd nid yw wedi'i chysylltu â thudalen y Cynllun Ysgolion Heddwch, a allai o bosibl gyfyngu ar ei gwelededd a'i hygyrchedd i gynulleidfa sydd â diddordeb mewn dysgu mwy am sut y gellid gweithredu addysg heddwch yn eu hysgol. Byddaf yn dychwelyd i ystyried gwelededd a hyrwyddo'r cynllun yn ddiweddarach yn yr adroddiad. Mae mapio'r cwricwlwm yn gyflwyniad defnyddiol i athrawon archwilio'r potensial ar gyfer addysg dros heddwch, ond byddai mapio mwy manwl, gydag enghreifftiau o weithgareddau, yn debygol o gryfhau'r achos dros berthnasedd addysg heddwch i'r cwricwlwm. Er bod y wefan yn cynnwys rhai astudiaethau achos, mae'r rhain y tu ôl i ddolenni i ddogfennau eraill (megis manylion yr ysgol heddwch a Gwobrau Heddychwr Ifanc), yn hytrach na bod yn weladwy ar unwaith. Mae gan y cynllun wybodaeth am lawer o enghreifftiau o ddulliau gweithredu arloesol, fel y nodwyd gan aelod staff y Cynllun Ysgolion Heddwch:

Mae [Addysg heddwch] yn cynnig ei hun yn fawr iawn i wneud pethau o fewn y dyniaethau, er enghraifft, lle gallwch wneud pethau ar draws hanes, daearyddiaeth, addysg grefyddol. Ac mae gennym enghreifftiau da o hynny. Felly Dyffryn Aman, fe wnaethant gwricwlwm heddwch cyfan gyda blwyddyn wyth, a oedd yn ffitio ar draws y dyniaethau [...] mae hynny'n fantais wirioneddol

⁵¹ Cynllun Ysgolion Heddwch Cymru, WCIA, Addysg Heddwch wedi'i Fapio i'r Cwricwlwm Newydd, 2022
<https://www.wcia.org.uk/wp-content/uploads/2022/05/Peace-Education-mapped-to-the-new-curriculum.pdf>
cyrchwyd 20 Tachwedd 2023

gyda'r cwricwlwm newydd mewn gwirionedd. (Cyfweiliad gydag aelod o staff Cynllun Ysgolion Heddwch Cymru).

Agweddau ar y cwricwlwm sy'n cael eu hanwybyddu yn y ddogfen yw'r canllawiau statudol ar Grefydd, Gwerthoedd a Moeseg (CGM)⁵² a'r cod Addysg Cydberthynas a Rhywioldeb (ACRh).⁵³ Mae CGM wedi'i gynnwys o fewn ACRh y Dyniaethau, ac mae'r symud i ffwrdd o'r label 'addysg grefyddol' yn adlewyrchu'r cwrpas estynedig ac yn sicrhau ei fod yn amlwg - gan gynnwys o fewn y ddeddfwriaeth berthnasol – bod CGM yn cynnwys safbwyntiau athronyddol anghrefyddol.⁵⁴ Gallai'r dull gweithredu ehangach ddarparu mwy o gyfleoedd i ystyried cysyniadau heddwch a gwrthdaro, ynghyd ag agweddau eraill ar ddinasyddiaeth fyd-eang. Mae canllawiau cwricwlwm Llywodraeth Cymru yn disgrifio ACRh fel un sydd â "rôl gadarnhaol a grymusol yn addysg dysgwyr", gan chwarae "rôl hanfodol wrth eu cefnogi i wireddu'r pedwar diben fel rhan o ddull gweithredu ysgol gyfan".⁵⁵ Mae'r canllaw yn amlinellu mai:

Mae helpu dysgwyr i ffurfio a chynnal ystod o gydberthnasau, sydd i gyd yn seiliedig ar ymddiriedaeth a pharch ar y ddwy ochr, yn greiddiol i addysg cydberthynas a rhywioldeb. Mae'r cydberthnasau hyn yn hollbwysig er mwyn datblygu lles emosiynol, gwydnwch ac empathi. Mae dealltwriaeth o rywioldeb gyda phwyslais ar hawliau, iechyd, cydraddoldeb a thegwch yn grymuso dysgwyr i ddeall eu hunain, cymryd cyfrifoldeb am eu penderfyniadau a'u hymddygiadau eu hunain a ffurfio cydberthnasau sy'n gwbl gynhwysol, gan adlewyrchu amrywiaeth a hyrwyddo parch.⁵⁶

Mae'r ffocws ar berthnasoddd rhyngbersonol yn cyd-fynd yn agos â'r dull gweithredu addysg heddwch, ac mae adnoddau a mentrau presennol o fewn addysg heddwch, yn cynnwys y rhai a ddarperir gan Gynllun Ysgolion Heddwch Cymru sydd eisoes ar gael yn y Gymraeg a'r Saesneg, a fyddai'n gallu cefnogi ysgolion i gyflawni'r agwedd hon ar ACRh yn dda, er enghraifft cefnogi dealltwriaeth o hawliau, tegwch, parch at ei gilydd a datrys gwrthdaro.⁵⁷ Yn ogystal â hyn, mae'r ethos ysgol gyfan yn werth a rennir gan addysg heddwch a'r cynllun. Byddai hyrwyddo'r agwedd hon ar berthnasoddd Cynllun Ysgolion Heddwch Cymru yn fuddiol, gan helpu i godi ymwybyddiaeth o addysg heddwch a chefnogi ysgolion yn well i alluogi dysgwyr i feithrin a chynnal perthynas dda â'u cyfoedion, eu hathrawon, eu teuluoedd a'u cymunedau. Byddai hefyd yn cyfrannu at gynyddu dealltwriaeth o sut y gallai'r dull gweithredu addysg heddwch gynorthwyo ysgolion i

⁵² Dylunio eich Cwricwlwm, Llywodraeth Cymru <https://hwb.gov.wales/cwricwlwm-i-gymru/y-dyniaethau/cynllunio-eich-cwricwlwm/#religion,-values-and-ethics-guidance> cyrchwyd 12 Ionawr 2024

⁵³ Dylunio eich Cwricwlwm, Themâu Trawsbynciol, ACRh, Llywodraeth Cymru <https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/> cyrchwyd 12 Ionawr 2024

⁵⁴ Cwricwlwm i Gymru: crynodeb o'r ddeddfwriaeth, Llywodraeth Cymru <https://hwb.gov.wales/cwricwlwm-i-gymru/crynodeb-o-r-ddeddfwriaeth/#religion,-values-and-ethics> cyrchwyd 12 Ionawr 2024

⁵⁵ Dylunio eich Cwricwlwm, Themâu Trawsbynciol, ACRh, Llywodraeth Cymru

⁵⁶ Llywodraeth Cymru. *ibid*

⁵⁷ Mae'r Arwyddbyst ar gyfer Prosiect Dinasyddiaeth Fyd-eang, sy'n cael eu cynnal gan Ganolfannau Addysg Datblygu yr Alban, yn rhestru nifer o adnoddau a phecynnau gwybodaeth perthnasol sy'n cefnogi Cwricwlwm Rhagoriaeth a Dinasyddiaeth Fyd-eang yr Alban; www.signpostsglobalcitizenship.org/

gyflawni eu cyfrifoldebau o fewn y fframwaith statudol ar ymgorffori dull gweithredu ysgol gyfan o ymdrin â llesiant emosiynol a meddyliol.⁵⁸

Cwmpas

Ar adeg ei ysgrifennu, mae gan Gynllun Ysgolion Heddwch Cymru 20 o ysgolion gweithredol (12 cynradd, 8 uwchradd) ledled Cymru, gyda 35 ysgol arall sydd naill ai wedi cymryd rhan neu wedi mynegi diddordeb o'r blaen (gohebiaeth ag aelod o staff y Cynllun Ysgolion Heddwch). Mae'r gynhadledd ysgolion heddwch flynyddol, a gynhelir ers 2014, yn rhoi cyfle i ysgolion sydd â diddordeb mewn addysg heddwch rannu eu gweithgareddau, cymryd rhan mewn gweithdai, a chwrdd â dysgwyr eraill. Mae'r gynhadledd yn hyrwyddo'r cynllun a'i effaith ac mae'n achlysur defnyddiol i ymgysylltu ac ail-ymgysylltu â chyfranogwyr y cynllun. Yn ystod y blynyddoedd diwethaf, mae lleoliad y Senedd hefyd wedi darparu cyfleoedd i godi ymwybyddiaeth wleidyddol o werth addysg heddwch. Croesawodd y gynhadledd ddiweddaraf, a gynhaliwyd ar 8 Tachwedd 2023, dros 100 o blant ac athrawon o ddeg ysgol, ac roedd yn cynnwys cyflwyniadau gan Lysgenhadon Heddwch Ifanc (LIIF), a rannodd eu profiad o fynychu gwersylloedd llysgenhadon heddwch yn Ewrop. Mae'r rhaglen LIIF yn brofiad gwirfoddol sy'n agored i bobl ifanc rhwng 14 a 21 oed sy'n byw yng Nghymru. Mae'n darparu hyfforddiant, mentora a chyllid prosiect i arfogi'r llysgenhadon â'r sgiliau a'r wybodaeth sydd eu hangen i ddod yn arweinwyr mewn adeiladu heddwch, ac mae'n darparu cyfleoedd i gysylltu ag adeiladwyr heddwch ifanc ledled y byd. Mae'n cael ei gynnal gan WCIA, ac mae'n cael ei gefnogi gan staff y Cynllun Ysgolion Heddwch.

Wrth greu cysylltiadau yng Nghymru, mae'r Cynllun Ysgolion Heddwch hefyd wedi datblygu cydweithrediadau â phartneriaid Ewropeaidd, drwy brosiect Erasmus+. Wedi'i ysgogi gan gyd-destun pryder am drais mewn ysgolion a phegynu trafodaeth gyhoeddus, roedd y prosiect yn cynnwys partneriaid yng Nghymru, Rwmania, Slofenia a Thwrci, a'i nod oedd rhannu arfer gorau "ar draws gwahanol gyd-destunau a diwylliannau" a "chasglu corff cryf o dystiolaeth ac adnoddau ategol y gallai ysgolion eu defnyddio'n ehangach".⁵⁹ Er bod y pandemig coroneffirws wedi effeithio ar y cydweithio, roedd y prosiect yn llwyddiannus, gyda chyfranogwyr o Slofenia yn disgrifio'r profiad fel "taith drawsnewidiol".⁶⁰ Roedd gan y prosiect ffocws cryf ar allbynnau, gan fod hyn yn agwedd a alluogodd cyllid Erasmus: "roedd gennym allbynnau penodol yr oeddem am eu cyflawni yn y prosiect hwnnw, a oedd yn ymwneud â phapurau polisi a phecynnau cymorth, hyfforddiant athrawon" (Aelod o Staff y Cynllun Ysgolion Heddwch). O ganlyniad i'r dull gweithredu hwn, yn ogystal â sylfaen dystiolaeth o fanteision addysg heddwch wrth ddatblygu dealltwriaeth a sgiliau sy'n galluogi pobl ifanc i ddod yn ddinasyddion lleol a byd-eang cadarnhaol, beirniadol a chreadigol,⁶¹ mae ystod o adnoddau ategol wedi'u datblygu, wedi'u llywio gan y cydweithio. Mae'r

⁵⁸ Llywodraeth Cymru, <https://www.gov.wales/sites/default/files/publications/2021-03/framework-on-embedding-a-whole-school-approach-to-emotional-and-mental-well-being.pdf>

⁵⁹ WCIA 'Sut i Ddod yn Ysgol Heddwch' Pecyn Cymorth i Ymarferwyr' (heb ei gyhoeddi) Wedi'i ddatblygu fel rhan o brosiect Erasmus+ 2020-23,

⁶⁰ WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

⁶¹ WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

adnoddau'n cynnwys pecyn cymorth ac adnoddau hyfforddi athrawon, y gellir eu defnyddio i gefnogi ysgolion i roi dulliau gweithredu heddwch ar waith yn effeithiol ar lefelau strategol a gweithredol.

Er gwaethaf effaith gadarnhaol Cynllun Ysgolion Heddwch Cymru - a fydd yn cael ei archwilio isod - mae'n ymddangos bod ymwybyddiaeth o addysg heddwch a'r cynllun ei hun yn eithaf cyfyngedig o fewn sector addysg Cymru. Mae hyn wedi dod i'r amlwg wrth ymchwilio i'r adroddiad hwn, wrth i ymdrechion cychwynnol i bennu dealltwriaeth sylfaenol o addysg heddwch ddatgelu nad oedd llawer o wybodaeth am y dull gweithredu, er gwaethaf ymwybyddiaeth o addysg dinasyddiaeth fyd-eang. Yn ogystal â hyn, mae staff y Cynllun Ysgolion Heddwch wedi rhannu'r heriau y maent wedi'u hwynebu wrth olrhain cynnydd ysgolion yn y cynllun, ac o gadw mewn cysylltiad â'r rhai sydd wedi cymryd rhan, neu sydd wedi mynegi diddordeb yng ngweithgareddau'r cynllun:

Yr hyn sy'n wirioneddol anodd yw nodi ble mae [ysgolion] [yn y broses], oherwydd mae gen i ysgolion rwy'n gwybod ble maen nhw oherwydd eu bod yn cadw mewn cysylltiad â ni. Ond mae yna ysgolion eraill, ond dwi ddim yn gwybod, ydy'r aelod yna o staff dal yno? Mae cadw trac ar ble maen nhw mewn gwirionedd yn anodd iawn. Ac yna mae'n rhaid i chi ofyn y cwestiwn i chi'ch hun, wel, mewn ffordd, a yw'n bwysig? Fe hoffech chi feddwl, os ydyn nhw, os ydyn nhw'n ei chael hi'n anodd, y bydden nhw'n cysylltu â chi a dweud, wyddoch chi, nid wyf yn hollol siŵr beth i'w wneud nesaf. A oes rhywbeth y mae'n rhaid i ni ei wneud i egluro'r broses? Ei gwneud hi'n haws iddyn nhw? Wn i ddim. (Cyfweliad gydag aelod o staff Cynllun Ysgolion Heddwch Cymru).

Mae staff y cynllun yn ymwybodol o'r pwysau llwyth gwaith sy'n wynebu staff addysgu mewn ysgolion, ac awgrymwyd fod ysgolion yn ymddangos yn "fwy gofalus" ar ôl pandemig y coronafeirws ynghylch gweithgareddau ychwanegol (Cyfweliad ag aelod o staff Cynllun Ysgolion Heddwch Cymru). Mae'r tîm Ysgolion Heddwch wedi rhoi cynnig ar wahanol ddulliau gweithredu o ail/ymgysylltu ag ysgolion yn eu cymuned - yn fwyaf diweddar fe wnaethant ddefnyddio ffurflen arolwg i ysgolion adrodd am eu cynnydd a'u gweithgareddau diweddar, lle gwelwyd rhai ysgolion sy'n ymgysylltu llai yn ymateb. Maent hefyd wedi defnyddio e-bost i hyrwyddo cyfleoedd ac adnoddau i geisio cefnogi ysgolion nad ydynt efallai'n gwybod sut i ddatblygu eu gwaith. Rhywbeth a allai gryfhau'r ymdrechion hyn yw cylchlythyr rheolaidd ar gyfer cymuned yr ysgolion heddwch, sy'n cynnwys newyddion ac adnoddau o'r cynllun ond hefyd gan yr ysgolion sy'n cymryd rhan. Gallai fod potensial hefyd i greu cyfleoedd i'r cysylltiadau arweiniol gyfarfod â'i gilydd mewn sesiynau ar-lein, i rannu eu profiadau a chyfnewid gwybodaeth. Mae nifer o ysgolion gweithgar yn cymryd rhan amlwg, a gallai'r sesiynau hyn fod yn fodd o fanteisio ar y brwdfrydedd hwn i gefnogi ac annog ysgolion eraill yn y gymuned. Fodd bynnag, mae mentrau o'r fath yn gofyn am allu staff i drefnu, hyrwyddo a hwyluso sesiynau er mwyn iddynt fod yn effeithiol.

Gellid ystyried comisiynu asedau fideo i gasglu enghreifftiau o'r hyn y mae ysgolion heddwch yn ei wneud, a fyddai'n helpu i arddangos y potensial a hyrwyddo'r cynllun ac addysg heddwch yn ehangach. Byddai hefyd yn werth archwilio cyfleoedd hyrwyddo eraill, yn cynnwys cyflwyno i bodlediadau sefydledig, er enghraifft

'Emma and Tom Talk Teaching' sydd â chynulleidfa ymarferwyr addysg, i rannu ymhellach straeon am effaith y cynllun.⁶² Byddai'n ddoeth paratoi ar gyfer unrhyw weithgareddau hyrwyddo i gynnwys cynllunio ar gyfer sut i reoli cyfranogiad effeithiol mwy o ysgolion yn y cynllun, ac i ystyried unrhyw staff ychwanegol ac adnoddau ariannol sydd eu hangen i gyflawni hyn.

Effaith

Mae datblygu fframwaith i alluogi ysgolion i ymgorffori ac ymarfer dull gweithredu addysg heddwch wedi golygu bod y dull gweithredu yn cael ei ddeall a'i integreiddio'n well yn yr ysgolion sydd wedi ymgysylltu â'r cynllun. Mae hon yn sylfaen dda ar gyfer gweithgareddau yn y dyfodol ac ar gyfer dangos manteision y cynllun. Mae'n amlwg o sylwadau'r rhai sy'n cymryd rhan yn y cynllun bod y Cynllun Ysgolion Heddwch yn cael effaith gadarnhaol mewn sawl ffordd. Mynegodd athro mewn ysgol uwchradd sydd wedi derbyn statws Ysgol Heddwch lefel 3 fod:

Disgyblion wedi dod yn fwy ymwybodol o'r hyn sy'n digwydd yn y byd. Mae wedi agor cyfleoedd i ddisgyblion gymryd rhan mewn sgwrs ystyrlon gydag athrawon a gofyn cwestiynau am sefyllfaoedd bywyd go iawn. Fel athro, rwyf wedi bod yn cyflwyno gwersi ar heddwch ac mae wedi bod yn gyfle gwych i ddatblygu fy nealltwriaeth. (Athro, Ysgol Uwchradd A, Gohebiaeth)

Mae athrawon hefyd wedi gwneud sylwadau ar yr effaith ar amgylchedd yr ysgol ac ymddygiadau cadarnhaol. Nododd gwerthusiad o brofiad ysgol gynradd a gymerodd ran ym Mhrosiect Dod yn Ysgol Heddwch Erasmus+ fod 'disgyblion a staff yn teimlo'n fwy diogel, yn fwy hyderus wrth siarad ac yn cael eu parchu a'u gwerthfawrogi'n well' o ganlyniad i'r rhaglen.⁶³ Nododd athro fod:

dysgwyr yn teimlo'n ddiogel, yn hyderus ac yn gyfartal yn yr ysgol. Bod dysgwyr yn teimlo y gallant ddod o hyd i ffyrdd cadarnhaol o ddelio â gwrthdaro, a bod gwrthdaro yn mynd i fod yn rhan o'u bywydau. Mae'r prosiect wedi cefnogi gwytnwch ac agwedd ein dysgwyr tuag at wrthdaro sydd ynddo'i hun wedi helpu ein dysgwyr i fagu hyder a sbarduno chwilfrydedd a thrafodaethau yn y gymuned ehangach.⁶⁴

Rhannodd dysgwr mewn ysgol uwchradd a gymerodd ran yn y prosiect Erasmus+ ei fod wedi

magu peth hyder wrth fynegi barn, ac [wedi ffurfio] cyfeillgarwch oes. Rwy'n credu y dylai'r prosiect ysgolion heddwch fod yn orfodol wrth ddysgu mewn ysgolion oherwydd ein bod yn cael dysgu am ddiwylliannau eraill ac mae'n rhoi meddylfryd mwy heddychlon i chi - nawr ac ar gyfer y dyfodol.⁶⁵

⁶² Emma and Tom Talk Teaching, <https://educators.wales/Talk-Teaching>nd

⁶³ WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

⁶⁴ Dywedodd athro ysgol gynradd yn WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

⁶⁵ Dywedodd athro ysgol uwchradd yn WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

Mae mesur effaith hirdymor y cynllun y tu hwnt i addysg yn anodd, ond mae'n ymddangos bod dysgwyr yn deall y dull gweithredu heddwch fel meddylfryd neu ymddygiad, a rhywbeth y byddant yn ei ddefnyddio trwy gydol eu hoes.

Mae gwerthusiad o'r prosiect Erasmus+ hefyd yn amlinellu bod cyfranogiad wedi cynyddu gwybodaeth a dealltwriaeth staff ysgolion, yn ogystal â'u hyder yn eu gallu i fod yn fodelau rôl cadarnhaol o heddwch:

Y canlyniad mwyaf cadarnhaol o'n holiaduron staff yw'r effaith o ran strategaethau ar gyfer delio â gwrthdaro a staff fel modelau rôl cadarnhaol o Heddwch. Roedd cynnydd o 10% yng ngwybodaeth a strategaethau staff a chafwyd llawer o fudd wrth i'n dysgwyr a'n staff greu'r rhain i weddu i ethos ein hysgol ein hunain. O ran modelau rôl, mae gwelliant o 40% yn yr holiadur gwaelodlin i 90% yn 2023 lle'r oedd staff yn teimlo'n hyderus fel modelau rôl o Heddwch. Mae hyn yn hanfodol ar gyfer meithrin y dull gweithredu hwnnw a sicrhau bod neges gyson yn cael ei chyflwyno ar draws yr ysgol.⁶⁶

Mae tystiolaeth hefyd bod rhieni'n gweld manteision y cynllun ac yn gallu gweld "y cysylltiad rhwng addysg heddwch a'i effaith ar sicrhau heddwch yn y gymuned a'r byd ehangach" yn well.⁶⁷ Gallai'r dull gweithredu fod yn ychwanegiad gwerthfawr i ysgolion ei ystyried yn eu gweithgareddau i fod yn ysgolion bro.⁶⁸

Byddai rhannu straeon yr effeithiau cadarnhaol hyn ar wefan y Cynllun Ysgolion Heddwch, yn ogystal â'u cofnodi mewn dogfennau gwerthuso ac adolygu, yn helpu i ddangos y manteision i ddysgwyr, athrawon, ysgolion a'u cymunedau. Byddai hyn yn helpu i godi ymwybyddiaeth o'r cynllun ar draws gwahanol gynulleidfaoedd - yn cynnwys llunwyr polisi a dylanwadwyr – a chyfrannu at ddyfnhau'r ddealltwriaeth o addysg heddwch ac o bosibl gynyddu cefnogaeth a chyllid i ddatblygu'r cynllun ymhellach.

Adolygu'r cyfleoedd a'r heriau:

Mae'r Cwricwlwm newydd i Gymru a chydabyddiaeth gysylltiedig y llywodraeth a'r sector o bwysigrwydd llesiant dysgwyr yn darparu cyfleoedd cryf ar gyfer addysg heddwch y mae'r Cynllun Ysgolion Heddwch mewn sefyllfa dda i fanteisio arnynt. Mae gan y cynllun enw da, ac mae ei integreiddio o fewn rhaglen ddysgu fyd-eang WCIA yn gadarnhaol, gan ddod â rhwydwaith cryf a statws cydnabyddedig. Fodd bynnag, gellid gwneud mwy i sicrhau cynaliadwydd y cynllun, ei gapasiti staffio, a'i ddifodol tymor hwy.

Ar ôl i brosiect Cymru dros Heddwch ddod i ben, llwyddodd y rhaglen i sicrhau cyllid Erasmus+ i ffurfio cydweithrediadau rhyngwladol, mireinio'r cynllun, a datblygu allbynnau. Mae'r prosiect wedi dod i ben, a chan nad oes gan y DU fynediad at Erasmus mwyach, mae opsiynau cyllido posibl yn y dyfodol yn aneglur. Gall fod lle i ddatblygu prosiectau yn y dyfodol ar gyfer ffrwd Llwybr 2 Taith, sy'n cynorthwyo partneriaethau rhyngwladol a chydweithio strategol, gan ganolbwyntio ar ddatblygu a gweithredu arferion arloesol mewn

⁶⁶ Dywedodd athro ysgol gynradd yn WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

⁶⁷ WCIA 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' CMRhC

⁶⁸ <https://www.llyw.cymru/ysgolion-bro-html>, cyrchwyd 12 Ionawr 2024

addysg drwy greu allbwn prosiect ar gyfer lledaenu.⁶⁹ Er bod cyllid prosiect yn galluogi cyflawni gweithgareddau, mae'n debygol y byddai'r cynllun yn elwa o fwy o gyllid craidd. Ystyriwyd ffynonellau refeniw posibl yn fy sgwrs â staff y Cynllun Ysgolion Heddwch:

Rwy'n gwybod bod pethau'n dynn, ond byddai mor wych cael ychydig o gyllid gan Lywodraeth Cymru. A, neu i feddwl, wel, beth fyddai ysgolion yn ei dalu am hyn? A dweud y gwir, dyna 'r cyfyng-gyngor, mewn gwirionedd. Ar hyn o bryd, mae'n rhad ac am ddim, maen nhw'n cofrestru a does dim rhaid iddyn nhw dalu unrhyw beth, ond wyddoch chi, sut ydych chi'n gwneud rhywbeth fel yna yn gynaliadwy? Mae'n gwestiwn mawr, mewn gwirionedd. (Aelod o staff Cynllun Ysgolion Heddwch Cymru).

Mae modelau amrywiol o ffioedd a chyllid ar gyfer cynlluniau achredu ysgolion. Mae gan achrediad Ysgol sy'n Parchu Hawliau UNICEF gyfradd ffioedd aelodaeth flynyddol o £2 y disgybl (£1.25 ar gyfer ysgolion gwobr Aur), wedi'i gapio ar £1,500 (£1,250 ar gyfer ysgolion Aur), ac isafswm ffi o £100. Mae hwn yn gynllun mawr ei glod, sy'n cael ei gynnal gan Bwyllgor UNICEF y DU, ac mae'n gallu codi premiwm am ei gynnig oherwydd statws UNICEF. Ar hyn o bryd, mae Llywodraeth yr Alban yn talu'r ffioedd ar gyfer ysgolion yn yr Alban sy'n cymryd rhan yn y cynllun, fel y mae rhai awdurdodau lleol, gan gynnwys Cyngor Dinas Caerdydd. Mae cynllun Eco-Sgolion Cadwch Gymru'n Daclus yn rhad ac am ddim i gyfranogwyr, gan fod y rhaglen wedi derbyn cyllid uniongyrchol gan Lywodraeth Cymru; yn Lloegr, mae'r cynllun Eco-Sgolion yn codi ffi flynyddol o £200. Y fantais sydd gan y ddau gynllun hyn yw enw da iawn a lefel uchel o barch a chydabyddiaeth. Ar hyn o bryd, mae'n debyg y byddai'n anodd i Gynllun Ysgolion Heddwch Cymru gyflwyno ffi aelodaeth ar lefel sy'n briodol i dalu costau, gan fod cydnabyddiaeth o'r cynllun yn gyfyngedig ar hyn o bryd. Yn ogystal â hyn, mae'n debygol y byddai gweinyddu ffioedd casglu yn ychwanegu costau. Yn hytrach, byddai unrhyw ffi yn gweithredu fel ymrwymiad gan ysgolion i fod yn gyfranogwyr gweithredol, ac i ymgysylltu â chymuned ehangach yr ysgol heddwch. Gellid archwilio cyllid gan ymddiriedolaethau elusennol, gan y gellir dangos tystiolaeth o agweddau addysgol a llesiant y cynllun ac maent yn gweddu'n dda i flaenoriaethau darpar roddwyr. Fodd bynnag, ar hyn o bryd, er gwaethaf y pwysau ar gyllid cyhoeddus, mae'n ymddangos mai cyflwyno'r achos dros gyllid penodol gan y llywodraeth ar gyfer y cynllun yw'r ffrwd gyllido fwyaf ymarferol, o bosibl trwy ymgorffori cyfran uwch o gostau gweithgareddau yng nghytundeb cyllido Academi Heddwch Cymru. Ar hyn o bryd mae Academi Heddwch yn darparu rhywfaint o gyllid blynyddol ar gyfer y cynllun o'i grant, ond byddai trefniant ariannu tymor hwy yn rhoi mwy o sefydlogrwydd i gynllunio a darparu gweithgareddau, a llwyfan i fynd ar drywydd ceisiadau i ymddiriedolaethau elusennol.

Gweithgaredd ychwanegol fyddai'n cryfhau'r cynllun ymhellach - ac yn adeiladu momentwm ar gyfer cynyddu ei welededd a gwerthfawrogiad o'i berthnasedd - yw datblygu elfen rhwydwaith y rhaglen ysgolion. Mae yna Rwydwaith Addysg Heddwch ledled y DU, y mae WCIA a Chynllun Ysgolion Heddwch Cymru yn aelodau ohono. Er bod aelodaeth o'r rhwydwaith yn agored i bawb sy'n rhannu ei werthoedd ac

⁶⁹ <https://www.taith.wales/about/what-we-do/>, cyrchwyd 15 Ionawr 2024

sy'n ymwneud ag addysg heddwch, mae'n ymddangos bod ei ffocws yn fwy ar drefniadaeth y trydydd sector sy'n hyrwyddo ac yn cefnogi addysg heddwch.⁷⁰ Fodd bynnag, mae'r rhwydwaith yn cynnal sesiynau rhannu sgiliau rheolaidd i ymarferwyr, yn cynnwys athrawon ac yn darparu ystod o adnoddau, gan gynnwys pecyn 'Addysgu Heddwch', yn Gymraeg a Saesneg, wedi'i anelu at ddysgwyr ysgolion cynradd sy'n cynnwys wyth gwasanaeth ar thema heddwch, sydd ar gael ar Hwb. Byddai gweithio i greu rhwydwaith pwrpasol ar gyfer addysg heddwch mewn cyd-destun Cymreig, darparu cyfleoedd i ymarferwyr gyfarfod a chyfnewid gwybodaeth a rhannu eu profiadau, yn helpu i gefnogi ysgolion ar eu taith addysg heddwch. Mae rhywfaint o ystyriaeth eisoes wedi'i rhoi i ddatblygu llysgenhadon heddwch lleol, a fyddai â rôl yn datblygu a chefnogi clystyrau o ysgolion heddwch ledled Cymru, ond byddai angen cyllid pellach i ryddhau athrawon i ymgymryd â'r gweithgaredd hwn, a gellid ei fframio fel cyfle datblygu proffesiynol.

Mae gan Gynllun Ysgolion Heddwch Cymru lawer i adeiladu arno ac mae'r datblygiadau diweddar mewn polisi addysgol yng Nghymru, yn cynnwys y cwricwlwm newydd yn enwedig a'i bwyslais ar ddinasyddiaeth egwyddorol a gwybodus, a chydabyddiaeth ehangach o bwysigrwydd dysgu llesiant, wedi cyfrannu at amgylchedd a allai fod yn ffafriol i'w ehangu mewn ffordd gynaliadwy ac ailadroddol. Dylid nodi bod adroddiad diweddar gan UNSECO wedi amlygu diffyg tystiolaeth gadarn o effeithiolrwydd addysg heddwch ar raddfa, ac mae hyn yn cydberthyn â'r ffaith mai ychydig o raglenni systematig, hirdymor sydd wedi bod i'w hastudio a lefel gymharol isel o gyllid i gefnogi'r ymchwil addysgol angenrheidiol.⁷¹ Byddai'n briodol ystyried cychwyn gwerthuso annibynnol ac ymchwil addysgol i gefnogi a llywio unrhyw gynnydd yn y Cynllun Ysgolion Heddwch yn y dyfodol, gan y byddai astudiaethau o'r fath yn gwneud cyfraniad pwysig i'r sylfaen dystiolaeth fyd-eang.

Profiad Ysgol Heddwch Ysgol Gynradd

I ddysgu mwy am brofiad ysgolion ac athrawon sydd wedi mabwysiadu dulliau addysg heddwch, cafodd athro o ysgol gynradd a gafodd statws ysgol heddwch lefel 2 yn 2021 ei gyfweld. Ysgogodd yr athro gysylltiad ei ysgol â chynllun Ysgolion Heddwch Cymru ac mae'n parhau i fod yn brif gyswllt.

Mae'r ysgol gynradd yn Ysgol Parchu Hawliau achrededig UNICEF. Mewn Ysgolion sy'n Parchu Hawliau, mae hawliau plant yn cael eu hyrwyddo a'u gwireddu, mae oedolion a phlant yn gweithio tuag at y nod hwn gyda'i gilydd. Mae pedwar maes effaith allweddol i blant - eu llesiant, cyfranogiad, eu perthnasoedd a'u hunan-barch – sy'n cyfrannu at wneud gwahaniaeth i'r gymuned ehangach.⁷² Roedd y dull hwn yn cael ei ystyried yn ddull trosfwaol ar gyfer yr ysgol a oedd yn

⁷⁰ <https://www.peace-education.org.uk/home>, cyrchwyd 12 Ionawr 2024

⁷¹ UNESCO, *Peace education in the 21st century: an essential strategy for lasting peace*, t 15

⁷² UNICEF UK, What is a Rights Respecting School? <https://www.unicef.org.uk/rights-respecting-schools/the-rrsa/what-is-a-rights-respecting-school/> Cyrchwyd 6 Mai 2024

dal popeth ynghyd. Cyn belled â'n bod ni'n edrych, wyddoch chi, ar sut y gallwn wella'r plant, eu dealltwriaeth o'u hawliau a'u cadw'n ddiogel, gall unrhyw beth ffitio o dan hynny. Ond dyna yw grym ein gwneud penderfyniadau hefyd. (Athro Ysgol Gynradd YH)

Mae'r ysgol wedi gweithio gyda phlant, rhieni a staff i ddatblygu ugain o werthoedd craidd y mae dysgwyr yn eu harchwilio drwy gydol y flwyddyn ysgol – mae heddwch yn cael ei gynnwys fel un o'r gwerthoedd.⁷³ Mae gwefan yr ysgol yn amlinellu "Mae gwerthoedd ein hysgol wrth wraidd popeth a wnawn. Maen nhw'n sail i'n haddysgu a'n dysgu ac yn darparu amgylchedd sy'n paratoi ein disgyblion fel dinasyddion hyderus, hapus".⁷⁴ Dywedodd yr athro eu bod "ddim yn gweld [yr ysgol] fel ysgol heddwch. Rwy'n ein gweld ni fel ysgol sy'n dysgu'r hawl i barch yn yr ysgol, ac un o'r llinynnau hynny yw heddwch". Nid yw'r ysgol yn trin heddwch fel pwnc 'annibynnol', ond yn hytrach mae'n integreiddio addysg heddwch i'w hegwyddorion ehangach: "Nid yw'n fater o - hwn yw ein pwnc heddwch, neu dyma beth rydyn ni'n ei wneud. Ydyn, rydyn ni'n dathlu rhai o'r dyddiau rhyngwladol, ond mewn gwirionedd, ym, nid dyna sut rydyn ni'n ei weld" (Athro Ysgol Gynradd YH). Mae dull hawliau a pharch yr ysgol wedi'i seilio ar "awydd di-ildio" i sicrhau llesiant a dealltwriaeth, i gefnogi plant i fod yn "nhw eu hunain go iawn", a "chael y gorau ohonynt" (Athro Cynradd YH). Mae gan yr ysgol ddull ysgol gyfan gref o ymdrin ag iechyd meddwl ac mae'n defnyddio rhaglen ymwybyddiaeth ofalgar Paws B i gefnogi dysgwyr i reoli perthnasoedd, mynd i'r afael ag anawsterau, gwella canolbwyntio, a'u helpu i hunanreoli eu hymddygiad.⁷⁵ Mae dull yr ysgol yn cael ei lywio gan ymwybyddiaeth weithredol o'r heriau sy'n wynebu eu dysgwyr a'u teuluoedd, gyda'r ysgol yn "edrych yn fwy ar yr ardal leol iawn a [gofyn] mewn gwirionedd beth sydd ei angen ar ein plant?" (Athro Cynradd YH). Mae dealltwriaeth o rôl yr ysgol fel lle diogel o berthyn i'w dysgwyr:

[U]n o'r anawsterau mwyaf o fewn ein cymuned ar hyn o bryd [yw bod] gostyngiad mewn gwasanaethau iechyd. Mae lluo o restrau aros. Mae hyn ar gyfer oedolion [ac] ar gyfer plant. [...] Mae llawer o'n plant yn byw mewn tai anhrefnus trawmatig iawn lle mae angen cefnogaeth, a ni yw'r hafan. (Athro Ysgol Gynradd YH)

Mae'r ymdeimlad o gymuned o fewn yn yr ysgol yn cael ei gryfhau ymhellach gan ei chynllun ymddygiad, sy'n rhagweithiol yn helpu dysgwyr i oresgyn eu gwahaniaethau ac i gefnogi ei gilydd:

Ein prif gynllun ymddygiad yw cylchoedd adferol, siarad am wrthdaro a datrys sefyllfaoedd gyda'n gilydd. Rydym yn gweithio mewn grwpiau her, sy'n grwpiau gallu cymysg drwy'r ysgol, ar gyfer rhai gweithgareddau, lle mae gan bawb rôl i'w chwarae. Ac rydyn ni'n dysgu sgiliau i'r plant gyd-dynnu

⁷³ Mae gwerthoedd yr ysgol yn cael eu nodi a'u grwpio fel a ganlyn: Ymddiriedaeth, Gonestrwydd, Hunanreolaeth ac Amynedd; Heddwch, Gobaith a Chyfrifoldeb; Cariad, Tosturi a Charedigrwydd; Balchder, Positifrwydd, Hyder a Hunan-Gred; Dewrder a Penderfyniad; Parch, Goddefgarwch, Ystyriaeth a Chydraddoldeb. Gwefan Ysgol Gynradd YH, Cyrchwyd 19 Ionawr 2024.

⁷⁴ Gwefan Ysgol Gynradd YH, Cyrchwyd 19 Ionawr 2024.

⁷⁵ Paws b Curriculum (ages 7 - 11) - Mindfulness in Schools Project, <https://mindfulnessinschools.org/teach-paws-b/paws-b-curriculum/>, Cyrchwyd 20 May 2024

mewn grŵp [...] Nid oes cwricwlwm heddwch o reidrwydd, ond cânt eu dysgu sut i ddatrys eu hanghytundebau eu hunain. (Athro Ysgol Gynradd YH)

Mae addysgu a datblygu'r sgiliau i lywio perthnasoedd rhyngbersonol yn agwedd bwysig ar addysg heddwch, a dywedodd yr athro pa mor dda mae hyn yn cyd-fynd â'r dull newydd o ymdrin ag Addysg Cydberthynas a Rhywioldeb (ACRh) a llesiant yn y cwricwlwm newydd:

Rwy'n credu o fewn ACRh a llesiant, mae'n edrych ar sgiliau gwrthdaro a chyfeillgarwch, ar sut mae plant yn rhyngweithio â'i gilydd. Felly gallwch weld yr elfennau heddwch os edrychwch chi, mae cysylltiadau diriaethol. Does dim rhaid i chi orfodi pethau, mae'r addysg heddwch yn ffitio'n eithaf braf ar y top. (Athro Ysgol Gynradd YH)

Gallai harneisio a hyrwyddo'r ddealltwriaeth hon o Gynllun Ysgolion Heddwch Cymru a'i fframwaith, a'i gweithredu, fod yn ysgogiad pwerus ar gyfer addysg heddwch yng Nghymru.

Mae'r ysgol yn mynd ati i ymgysylltu'n weithredol â'i chymuned leol ehangach ac mae'n ymwybodol iawn o botensial agwedd sy'n canolbwyntio ar y gymuned.⁷⁶ Mae ystyriaethau heddwch yn y gymuned yn ffurfio rhan o weithgareddau'r ysgol, gyda gwerthfawrogiad o bwysigrwydd addysgu am amrywiaeth, goddefgarwch a derbyn:

Rydym yn ysgol yn y cymoedd gyda thai teras. Rydym yn cael ein gwasgu yn y canol. Ac os edrychwch chi ar heddwch ac edrych ar yr elfennau ynddo, mae'r heddwch hwnnw o fewn y gymuned a derbyn a goddefgarwch yn wirioneddol bwysig. Ac nid ydym yn ardal amrywiol iawn, ac oni bai ein bod yn dysgu plant am amrywiaeth ac ymwybyddiaeth a goddefgarwch a derbyn a chroesawu popeth, nid ydynt yn mynd i gael unrhyw wybodaeth. Bydd yna farn gul iawn. [...] Os nad ydyn ni'n cyflwyno plant i syniadau eraill ac yn siarad am wahanol bethau, yna o ble maen nhw'n mynd i'w gael? (Athro Ysgol Gynradd YH)

Cydnabu'r athro yr anawsterau posibl a allai godi o'r dull hwn, o ystyried rhagfarnau dwfn a chynnydd symudiadau gwleidyddol asgell dde eithafol yn yr ardal ehangach. Nodwyd bod yr ysgol wedi gweithio'n ofalus i gael rhieni'n gefnogol, a bod y model wedi bod yn llwyddiant. Gan ddisgrifio eu hagwedd a'u hymagwedd at addysg, nododd yr athro eu diddordeb hir mewn materion cymdeithasol ac ymgyrchoedd a'u cymhelliant i ddarparu "golwg fyd-eang i blant o'r hyn sy'n digwydd" a'r cyfle i ddatblygu eu llais a'u hyder mewn perthynas â'r materion hyn (Athro Cynradd YH). Gan fyfyrio ar sut mae ysgolion yn addysgu ac yn codi ymwybyddiaeth o faterion cyfiawnder cymdeithasol a dealltwriaeth ddiwylliannol, nododd yr athro yr angen i holi pam y dylid dysgu'r pynciau hyn, er mwyn symud y tu hwnt i ymgysylltiad a allai fod yn arwynebol:

⁷⁶ Ysgolion Bro, Llywodraeth Cymru <https://www.llyw.cymru/ysgolion-bro-html>, cyrchwyd 12 Ionawr 2024

Mae'r rhan fwyaf o ysgolion yn edrych ar Black Lives Matter, [maen nhw] yn edrych ar Pride. Mae'r rhan fwyaf o ysgolion, wyddoch chi, yn edrych ar geisio dathlu gwyliau gwahanol. Ond mae'n ymwneud â deall pam ein bod yn gwneud hynny? Ac rwy'n credu ei fod yn ymwneud â'n bod ni eisiau heddwch o fewn ein cymunedau. Rydym am i blant fod mewn heddwch â phwy ydyn nhw, a derbyn eu hunain ac eraill. Fe wyddoch chi, mae'n rhan o bedwar diben y cwricwlwm. [...] dinasyddion egwyddorol a gwybodus, yn iach ac yn hyderus. Fe wyddoch chi, i wneud hynny, mae angen eu haddysgu, nid yw'n digwydd ar hap. (Athro Ysgol Gynradd YH)

Bydd ymchwilio i pam mae cyfiawnder cymdeithasol yn bwysig yn dyfnhau dealltwriaeth dysgwyr o faterion ac yn eu galluogi i gydnabod a chyflawni eu rôl fel dinasyddion. Mae cyfrannu at heddwch o fewn cymunedau, a'i gynnal, yn llinyn canolog addysg heddwch, ac mae'n hynod berthnasol i gymdeithasau cyfoes. O fewn y cwricwlwm i Gymru, gallai'r ymgysylltiad hwn gyfrannu'n bwrpasol at ddysgwyr yn datblygu gwerthfawrogiad a dealltwriaeth gynhwysol o gynefin.⁷⁷ Byddai hyn yn cyfrannu at

Meithrin ymdeimlad cryf o'u hunaniaeth a'u lles eu hunain, [a] meithrin dealltwriaeth o hunaniaeth pobl eraill a chreu cysylltiadau â phobl, lleoedd a hanes mewn mannau eraill yng Nghymru a ledled y byd. [...] [Mae] hyder yn eu hunaniaeth [eu hunain] yn helpu dysgwyr i werthfawrogi'r cyfraniad y gallan nhw ac eraill ei wneud yn eu cymunedau ac i ddatblygu ac archwilio eu hymatebion i faterion lleol, cenedlaethol a byd-eang.⁷⁸

Yn ogystal â hyn, mae heddwch mewnol, derbyn yr hunan ac eraill yn gyflyrau pwerus sy'n dod â manteision i unigolion, yn ogystal â'u perthnasoedd.

Roedd yn glir yn y cyfweiliad hwn fod gan yr ysgol ddealltwriaeth ddofn o'i chymuned ac ymrwymiad cryf i gyfrannu'n gadarnhaol i'r gymuned honno. Egwyddorion addysg heddwch yw un ffactor yn y ffordd y mae'n cyflawni hyn. Gall pwyslais polisi diweddar y llywodraeth ar ysgolion bro ddarparu trywydd newydd i'w ddefnyddio i ddatblygu addysg heddwch. Yn gysylltiedig â hyn, gall casglu a rhannu perthnasedd dulliau addysg heddwch i themâu trawsbynciol, yn cynnwys cynefin fod yn ffordd bwerus i gyfleu ethos 'ysgol gyfan' y fframwaith ac i bwysleisio'r cyfraniad ehangach i gymunedau cydlynol a heddychlon.

Addysg Uwchradd- Cymwysterau Gwneud-i-Gymru

Mae gwaith yn parhau gan Cymwysterau Cymru a CBAC i ddiweddarau cymwysterau i fod yn briodol ar gyfer y cwricwlwm newydd. Bydd llawer o'r cyrsiau TGAU diwygiedig yn cael eu dysgu o fis Medi 2025, gyda rhagor o gyrsiau TGAU ar gael yn 2026, a'r gyfres lawn o gymwysterau 14-16 - yn cynnwys yr hyn sy'n cymryd lle'r Dystysgrif Her Sgiliau, y Gyfres Sgiliau, a'r TAG Alwedigaethol newydd - ar gael o fis Medi 2027.

⁷⁷ Mae Cynefin yn cael ei ddiffinio yng nghanllawiau'r Cwricwlwm i Gymru fel: Lle rydym yn teimlo'n perthyn iddo, lle mae'r bobl a'r tirlun o'n cwrdd yn gyfarwydd ac mae'r synau a'r golygfeydd yn gysur ac yn adnabyddadwy. Er ei fod yn cael ei gyfieithu'n aml fel 'cynefin', nid lle mewn ystyr ffisegol neu ddaearyddol yn unig yw cynefin: dyma'r lle hanesyddol, diwylliannol a chymdeithasol sydd wedi siapia ac yn parhau i siapia'r gymuned sy'n byw ynddo.

⁷⁸ Canllaw Cwricwlwm i Gymru, Dylunio eich Cwricwlwm, Llywodraeth Cymru, <https://hwb.gov.wales/cwricwlwm-i-gymru/cynllunio-eich-cwricwlwm/datblygu-gweledigaeth-ar-gyfer-cynllunio-cwricwlwm/>

Yn arbennig o berthnasol i addysg heddwch, mae cymhwyster TGAU newydd mewn Astudiaethau Cymdeithasol, a fydd yn cael ei gyflwyno yn 2025. Bydd Cymwysterau Cymru yn adrodd yn hwyr yn 2024 a fydd y cymhwyster yn cymryd lle'r cymwysterau TGAU presennol yn y gyfraith, cymdeithaseg a dinasyddiaeth.⁷⁹ Cyhoeddwyd meini prawf cymeradwyo (gofynion dylunio) y cymwysterau yn haf 2023, yn dilyn ymgynghoriad cynhwysfawr.⁸⁰ Mae'r meini prawf yn amlinellu y dylai'r cymhwyster:

- ddatblygu dealltwriaeth o sut i ddod yn ddinasyddion egwyddorol, gwybodus a chyfrifol yng Nghymru a'r byd
- datblygu dealltwriaeth ddyfnach o'r byd ac o bobl eraill a'u gwerthoedd
- ystyried materion cymdeithasol cyfoes, ac archwilio hunaniaeth, hawliau a democratiaeth
- archwilio materion cymdeithasol ac ystyried sut i ymgysylltu a chymryd rhan weithredol mewn gweithredu cymdeithasol
- gwerthfawrogi natur gymhleth, pliwralistig ac amrywiol cymdeithas drwy ddeall hunaniaeth, hawliau a chyfrifoldebau, cydraddoldeb ac anghydraddoldeb, a sut mae'r materion hyn yn siapio pobl, lleoedd a chymuned.
- myfyrio ar ddylanwad llywodraethu ar bobl, lleoedd a chymuned
- archwilio'r thema drawsbynciol hawliau dynol ac amrywiaeth, yn cynnwys safbwyntiau, hunaniaeth, diwylliant a chyfraniadau pobl Ddu, Asiaidd ac o leiafrifoedd ethnig.⁸¹

Mae'r cwmpas hwn yn darparu'r cyfle posibl ar gyfer ystyried heddwch - ac agweddau o addysg heddwch - o fewn y cwrs ynghyd ag addysg ar gyfer datblygiad cynaliadwy, dinasyddiaeth fyd-eang ac addysg hawliau dynol. Mae ymchwiliad pellach wedi datgelu bod y dyluniad cychwynnol a gynigwyd ar gyfer y cymhwyster Astudiaethau Cymdeithasol, a gyhoeddwyd yn hydref 2022 fel rhan o'r broses ymgynghori 'Cymwys ar gyfer y Dyfodol', wedi crybwyll heddwch yn benodol yn ei amlinelliad o themâu awgrymedig y cwrs: Gwrthdaro cymdeithasol a heddwch; Democratiaeth, Cydraddoldeb cymdeithasol ac economaidd, Diogelu'r amgylchedd a chynnaladwyedd; Technoleg a'i ddylanwad ar gymdeithas.⁸²

Er nad yw'r ddogfen meini prawf cymeradwyo'n rhestru themâu posibl, mae'r awgrym cychwynnol o gynnwys gwrthdaro a heddwch, yn ogystal â chydraddoldeb a chynnaladwyedd, yn dangos y posibilrwydd o fewn y cwrs. Mae'r cynnwys penodol yn y meini prawf cymeradwyo'n nodi bod rhaid darparu cyfleoedd i ddysgwyr ddatblygu gwybodaeth a dealltwriaeth o:

- oblygiadau moesegol a chymdeithasol technoleg

⁷⁹ Deilliannau Ymgynghoriad Fesul Pwnc, Cymwysterau Cymru Mehefin 2023

<https://qualifications.wales/media/knaplhc0/consultation-outcomes-by-subject.pdf> Cyrchwyd 18 Rhagfyr 2023

⁸⁰ <https://qualifications.wales/regulation-reform/reforming/qualified-for-the-future/made-for-wales-gcses/>, Cyrchwyd 18 Rhagfyr 2023

⁸¹ Meini Prawf Cymeradwyo Astudiaethau Cymdeithasol TGAU, Cymwysterau Cymru 2023

<https://qualifications.wales/media/lsqe0irb/gcse-social-studies-approval-criteria.pdf> Cyrchwyd 18 Rhagfyr 2023

⁸² Meini Prawf Cymeradwyo Astudiaethau Cymdeithasol TGAU, Cymwysterau Cymru 2022,

<https://haveyoursay.qualifications.wales/18682/widgets/54667/documents/32075> Cyrchwyd 18 Rhagfyr 2023

- y ffordd y mae gweithredu cymdeithasol yn dylanwadu ar unigolion a chymunedau, o safbwynt lleol, cenedlaethol, a'r byd yn ehangach
- heriau anghydraddoldebau cymdeithasol ac economaidd a'r effaith ar bobl, ar leoedd, ac ar y gymuned
- yr heriau cymdeithasol allweddol sy'n gysylltiedig â'r byd naturiol
- sut mae mudiadau cymdeithasol a digwyddiadau wedi ffurfio cymdeithas, a sut y gellir dehongli hyn
- dylanwad galluedd cymdeithasol ar brosesau democrataidd.⁸³

Mae'r rhestr hon ar y cyfan yr un fath â'r hyn gafodd ei gynnwys yn y ddogfen cynnig cychwynnol, ac felly'n amlwg yn darparu cyfleoedd i heddwch a materion sy'n ymwneud ag o gael eu hystyried o fewn y cwrs.

Byddai'n briodol i Academi Heddwch Cymru a thîm Dysgu Byd-eang WCIA archwilio'r posibilrwydd o weithio gyda CBAC i helpu i lywio'r gwaith o ddatblygu'r cwrs ac o bosibl i gynghori ar adnoddau i gefnogi cyflwyno'r cwrs, yn cynnwys datblygiad proffesiynol i athrawon.

Cyfes Sgiliau: Sgiliau Byw

Bydd y gyfes sgiliau cenedlaethol newydd yn cyd-fynd â phedwar diben y cwricwlwm. Yn ychwanegol at brosiect personol annibynnol, bydd dysgwyr yn gallu astudio ar gyfer cymwysterau Sgiliau Byw a Sgiliau Gwaith, a fydd yn cynnwys unedau astudio hyblyg, bychan. Bydd y dau ddeg wyth uned arfaethedig o'r elfen Sgiliau Byw yn cynnwys y testunau canlynol y gellid eu cynorthwyo gan ddulliau addysg heddwch:

- Cydraddoldeb, amrywiaeth a chynhwysiant
- Iechyd meddwl a llesiant
- Cyfranogiad cymunedol
- Gwaith tîm
- Gwerthoedd ar gyfer Bywyd
- Deall eich hun ac eraill
- Perthnasoedd iach
- Cynaliadwyedd ar waith.⁸⁴

Bydd meini prawf cymeradwyo'r cymwysterau'n cael eu datblygu gyda rhanddeiliaid a chyrff dyfarnu yn 2024 a'u cyhoeddi ar ddiwedd y flwyddyn. Byddai'n briodol i Academi Heddwch eirioli i agweddau o addysg heddwch gael eu hystyried ar gyfer eu cynnwys yn yr unedau Sgiliau Byw, ac i archwilio sut y gall gynorthwyo datblygu adnoddau a hyfforddiant. Gall hyn hefyd fod o gymorth defnyddiol i athrawon sy'n


⁸³ Meini Prawf Cymeradwyo Astudiaethau Cymdeithasol TGAU, Cymwysterau Cymru 2023, Cyrchwyd 18 Rhagfyr 2023 <https://qualifications.wales/media/lsqe0irb/gcse-social-studies-approval-criteria.pdf> Cyrchwyd 18 Rhagfyr 2023

⁸⁴ Y Cynnig Llawn o Gymwysterau 14-16: Adroddiad Penderfyniadau, Cymwysterau Cymru, 2024 <https://qualifications.wales/media/3xfbmd0o/the-full-14-16-qualifications-offer-decisions-report.pdf> Cyrchwyd 30 Ionawr 2024

cyflwyno'r gydran Dinasyddiaeth Fyd-eang o'r Tystysgrifau Her Sgiliau Sylfaenol ac Uwch a chymwysterau Bagloriaeth Cymru.

Addysg Gychwynnol i Athrawon (AGA) a Dysgu Proffesiynol

Mae diwygiadau wedi bod i ddatblygiad proffesiynol athrawon yng Nghymru yn y blynyddoedd diwethaf. Yn 2017, i baratoi ar gyfer y cwricwlwm newydd, dechreuodd Llywodraeth Cymru gyflwyno dull Ysgolion fel Sefydliadau sy'n Dysgu (YSD), wedi'i lywio gan waith y Sefydliad ar gyfer Cydweithrediad a Datblygiad Economaidd.⁸⁵ Dangosir y model isod.



Ffigwr 5: Ysgolion fel sefydliadau sy'n dysgu.⁸⁶

Yn 2018, cyflwynwyd safonau proffesiynol ar gyfer addysgu ac arweinyddiaeth gan y llywodraeth. Roedd y safonau newydd yn adlewyrchu'r diwygiadau mewn addysg gychwynnol i athrawon (AGA), datblygu a gweithredu cwricwlwm newydd, y fframwaith cymwysterau esblygol a lansiad yr Academi Genedlaethol ar gyfer Arweinyddiaeth Addysgol.⁸⁷ Nod y safonau yw darparu cyfrwng ar gyfer ymddygiad proffesiynol a thwf gydol gyrfa ar gyfer pob athro a chymhorthydd addysgu. Ar yr un pryd, cychwynwyd dull cenedlaethol newydd o ddysgu proffesiynol, yn cynnwys cyrsiau datblygiad proffesiynol a ddarperir gan y consortia addysg rhanbarthol, a datblygu MA cenedlaethol mewn Addysg, a lansiwyd ym mis Medi 2021. Mae'r MA yn sicrhau bod pob gweithiwr addysg proffesiynol yng Nghymru yn cael cyfle i wella eu gwybodaeth

⁸⁵ Kools, M. a L. Stoll, "What Makes a School a Learning Organisation?", OECD Papurau Gwaith Addysg, Rhif 137, OECD Publishing, 2016 <https://doi.org/10.1787/5f1wm62b3bvh-en>

⁸⁶ Llywodraeth Cymru <https://hwb.gov.wales/professional-learning/leading-professional-learning/schools-as-learning-organisations/>, cyrchwyd 18 Rhagfyr 2023

⁸⁷ 'Safonau proffesiynol ar gyfer addysgu ac arweinyddiaeth a'r safonau proffesiynol drafft ar gyfer cynorthwyo addysgu (ar gyfer ymgynghori) Cwestiynau Cyffredin', Llywodraeth Cymru, 2017

broffesiynol, ymwneud ag ymchwil, a gwella eu hymarfer proffesiynol.⁸⁸ Mae pum llwybr, gan gynnwys un ar degwch mewn addysg sy'n cynnwys modiwl ar iechyd emosiynol, iechyd meddwl a llesiant. Gallai'r llwybr hwn gynnig cyfle i athrawon archwilio agweddau personol a rhyngbersonol addysg heddwch o fewn eu hymchwil a'u hymarfer, ond nid yw'n rhywbeth sydd wedi'i gynnwys ar y maes llafur ar hyn o bryd. Mae addysg athrawon, yn fwy eang, yn llwybr posibl i godi ymwybyddiaeth o addysg heddwch a'i pherthnasedd.

I ddysgu mwy am y sylfaen gwybodaeth addysg heddwch o fewn AGA, cynhaliwyd cyfweiliadau gyda dau ddarlithydd mewn dwy adran addysg prifysgol. Y cyntaf oedd Darlithydd Arweiniol cwrs AGA (AGA-D) gydag addysg gorfforol yn arbenigedd pwnc ac sy'n canolbwyntio ar llesiant ac ymddygiad plant. Roedd yr ail atebwr yn ddarlithydd sy'n goruchwyllo gradd ymarferydd Addysg Blynyddoedd Cynnar, sydd â diddordeb ymchwil mewn iechyd a llesiant emosiynol plant ac sy'n cyfrannu at gyrsiau AGA a'r MA mewn Addysg (Cymru) (ABC-AGA). Roedd gan AGA-D ac ABC-AGA wybodaeth drylwyr o'r cwricwlwm i Gymru a dealltwriaeth ragorol o'r sgiliau a'r arbenigedd sydd eu hangen ar athrawon i'w gyflwyno. Nid oedd gan yr un darlithydd brofiad uniongyrchol o addysg heddwch, ond adroddodd y ddau fod fy ngohebiaeth wedi ennyn diddordeb yn y maes. Cyn y cyfweiliadau, roeddent wedi dechrau edrych ar egwyddorion addysg heddwch, ei groestoriad â'r cwricwlwm newydd, ac roeddent wedi ystyried sut y gallai ategu eu hymchwil a'u haddysgu eu hunain.

Perthnasoedd rhyngbersonol, empathi a llesiant emosiynol

Roedd diddordebau ymchwil AGA-D ac ABC-AGA yn cynnwys ffocws ar berthnasoedd rhyngbersonol plant a phobl ifanc a sut y gallai athrawon eu cefnogi i ddatblygu perthnasoedd da. Roedd gan AGA-D ddiddordeb arbennig mewn "dod o hyd i ffyrdd o gynorthwyo dysgwyr i ddelio â gwrthdaro sylweddol neu fach" a'u grymuso yn eu profiad dysgu (AGA-D):

Po fwyaf y gallwn annog neu gynorthwyo neu alluogi plant i ddeall eu dysgu, y gorau. Felly, rwy'n credu bod hynny o safbwynt grymuso, ond hefyd pethau sy'n gwneud i blant feddwl, sy'n gwneud i bobl ifanc feddwl. Y cyfuniad hwnnw o weithio'n annibynnol, gweithio gyda'u cyfoedion, gweithio mewn grwpiau bach, ac yna adeiladu hyd at ddosbarthiadau cyfan. Cael cyfres o ddulliau o'r math hwn. Byddai datrys problemau yn naturiol, neu, delio â senarios, rhywfaint o feddwl yn feirniadol. A gwneud hynny o safbwynt eithaf emosiynol, meddwl am sut mae pobl yn teimlo. (AGA-D)

Byddai dulliau addysg heddwch yn cynorthwyo'r safbwynt hwn, yn enwedig wrth feithrin sgiliau meddwl yn feirniadol a datblygu ymwybyddiaeth o "feddwl am sut mae pobl yn teimlo". Mynegwyd diddordeb tebyg mewn meithrin empathi gan arweinydd y cwrs addysg blynyddoedd cynnar, a fu'n myfyrio ar eu hymchwil yn archwilio rôl llenyddiaeth wrth feithrin empathi a dealltwriaeth ddiwylliannol:

Y dull traddodiadol mewn ysgolion yw'r ddealltwriaeth honno, wyddoch chi, rydych chi'n dysgu darllen, rydych chi'n dysgu ysgrifennu, ffurfio llythrennau, ynganu geiriau, y math yna o beth. I mi, mae'n ymwneud â'r negeseuon sy'n cael eu cyfleu yn y llenyddiaeth. Mae'n ymwneud â'r

⁸⁸ <https://maaddysgcenedlaethol.cymru/ma-genedlaethol-mewn-addysg-cymru/>, cyrchwyd 18 Rhagfyr 2023

gynrychiolaeth. Mae'n ymwneud â chysylltedd. Mae'n ymwneud â cherdded yn esgidiau rhywun arall. Mae'n adeiladu ar empathi. Wyddoch chi, efallai nad ydych chi wedi profi'r pethau hyn, ond rydych chi'n ymgolli yn y ddihangfa mewn llyfrau. Ac mae'n mynd â chi i rywle, ac efallai bod angen i chi ddysgu bod mwy i fywyd na'ch rhwydwaith bach eich hun. (ABC-AGA)

Roedd y ddau ddarlithydd yn cydnabod ac yn gwerthfawrogi pwysigrwydd cefnogi dysgwyr i gymryd rhan mewn modd ystyriol a deallgar gyda'u cyfoedion. Roeddent hefyd yn rhannu gwerthfawrogiad o bwysigrwydd datblygu sgiliau a galluoedd dysgwyr i fyfyrion ar eu hemosiynau a'u profiadau eu hunain, a chanlyniadau eu penderfyniadau:

Maes penodol o ymchwil y mae gen i ddiddordeb ynddo yw sut mae profiadau pobl wedyn yn fframio eu penderfyniadau. Felly, sut mae'r ffordd maen nhw'n byw ac yn rhyngweithio gyda'r byd yn effeithio ar y dewisiadau a'r penderfyniadau maen nhw'n eu gwneud, ac yn gweithio ar eu hymddygiad. [...] Rwy'n credu y gallwn symud i ddysgwyr sydd wedi'u grymuso, a bydd ganddynt y neges honno o sut mae eu profiadau eu hunain yn effeithio ar sut maen nhw'n ymgysylltu â phethau. (AGA-D)

Roedd dealltwriaeth glir o bwysigrwydd y sgiliau bywyd hyn – ar gyfer unigolion, eu hysgol a'u hamgylchedd dysgu, a'u perthnasoedd rhyngbersonol. Myfyriodd ABC-AGA hefyd ar werth y sgiliau hyn y tu hwnt i addysg, a dymunoldeb y sgiliau hyn i gyflogwyr, a sut y gallant gynorthwyo llwyddiant yn y gwaith:

Deuthum o ymarfer i amgylchedd mwy academaidd a goruchwylais gyflogadwydd am bum mlynedd. Rwyf wedi gweithio gyda diwydiant. Dyma beth mae cyflogwyr ei eisiau hefyd. Dyma'r sgiliau maen nhw eu heisiau, y sgiliau negodi hyn, agwedd empathig tuag at bethau, rheoli pobl a'u hemosiynau a'r rhwystrau mae hynny'n eu cyflwyno. Y diffyg sgiliau bywyd hynny sy'n atal pobl rhag gwneud eu gorau glas, megis cynhyrchiant, rheoli eu llwyth gwaith. (ABC-AGA)

Roedd ymwybyddiaeth hefyd o'r effaith rhaeadru o gyflwyno cysyniadau ac arferion sy'n gysylltiedig â pherthnasoedd rhyngbersonol a chynhwysiant i ddysgwyr, gan obeithio y byddant yn tynnu ar y rhain yn eu bywydau a'u cyfarfyddiadau bob dydd ac yn annog eraill i fyfyrion ar eu hagweddau:

Os ydyn ni'n meddwl am ysgolion ac yn meddwl am gymdeithas, mae angen i ni feddwl am y genhedlaeth nesaf sy'n mynd i wneud i hyn weithio, hyd yn oed os na allwn herio eu neiniau a theidiau. Os ydym yn meithrin y moesau da hyn yn y genhedlaeth nesaf, gobeithio y byddant yn hidlo hyn i lawr i bawb arall. [...] Rydyn ni eisiau i blant fynd adref a dweud wrth eu rhieni a'u rhieni wedyn i fod yn gefnogol. Rydyn ni eisiau neiniau a theidiau, oherwydd mae gennym ni'r tueddiadau cenhedlaeth hyn hefyd sy'n anodd iawn. (ABC-AGA)

Gellid defnyddio ffocws addysg heddwch ar berthnasoedd rhyngbersonol a dealltwriaeth emosiynol i wneud achos cadarn dros sut y gall gynorthwyo datblygiad sgiliau rhyngbersonol cryf ac empathig, a hyrwyddo

gwerth y sgiliau hyn mewn cyd-destunau amrywiol. Mae'n amlwg hefyd bod potensial i weithio gydag ymchwilwyr mewn adrannau addysg prifysgol i archwilio agweddau ar addysg heddwch a'u heffaith.

Heriau Posibl

Myfyriodd ABC-AGA ar heriau posibl gweithredu dulliau ysgol gyfan a chysyniadau newydd o fewn addysg:

Gyda dull ysgol gyfan, mae angen i bawb fod yn gefnogol. Mae mewnbwn rhanddeiliaid yn bwysig, mae'n newid diwylliannol. Mae ymgorffori'r pethau hyn yn anodd gan ein bod yn ofnadwy am ddweud mai asesu sy'n dod gyntaf, a phopeth arall wedyn. Os ydych chi am gymryd agwedd fwy dyneiddiol, ac mae'r rhain yn bethau rydyn ni'n eu gwybod, mae'r rhain yn bethau rydyn ni i gyd wedi hyfforddi ynddynt, ac yna rydyn ni'n mynd gyda'r system, yn lle mynd gyda'n greddf. Ac mae hynny'n anodd iawn pan rydych chi'n cael eich mesur ar ddisgwyliadau ac ati hefyd. [...] Ni waeth beth rydym yn ei wneud, mae angen i ni ei gyfiawnhau, ond mae angen i ni hefyd fod yn realistig o ran ein darpariaeth, ein disgwyliadau, sut rydym yn herio pethau, sut rydym yn gweithio gyda rhanddeiliaid, oherwydd nid yw hyn yn ymwneud â'r hyn rydym yn ei ddysgu i blant yn unig. (ABC-AGA)

Nodwyd y gallai fframio cysyniad fel ethos fod yn ffordd o gyflwyno newid diwylliant a dull ysgol gyfan. Fodd bynnag, gan nad yw ethos ac agweddau yn haws eu mesur, mae llai o gymhelliant i weithredu dulliau newydd. Myfyriodd ABC-AGA ymhellach ar sut y gellir dad-flaenoriaethu dulliau newydd, neu eu hystyried fel rhywbeth wedi'u hychwanegu i addysg graidd:

Rydyn ni'n ei chael hi'n anodd iawn i dorri tueddiadau oherwydd, rhywbeth fel addysg heddwch, mae'n tueddu i fod yn rhywbeth wedi'i ychwanegu, yn tydi? Nid yw'n sylfaen llawn i arfer. Efallai y bydd yn cael ei gyflwyno ar brynhawn lau, y math hwnnw o beth, lle nad yw pobl yn ymgysylltu. Nid oes asesu'n perthyn iddo. Felly pam y byddai pobl yn ymgysylltu yn y modd hwnnw? Beth yw'r deilliant iddyn nhw? Bydd pobl yn ei weld fel gwers rydd neu rywbeth oherwydd nid rhywbeth ar ei ben ei hun yw addysg heddwch. (ABC-AGA)

Bu i AGA-D hefyd gydnabod gwrthwynebiad posibl, gan gynnig y gallai addysg heddwch gael ei fframio fel achos cadarnhaol dros newid:

Rwy'n credu bod gennym achos i'w gyflwyno dros newid. Felly yn hytrach na'r diffyg negyddol, ein bod angen datrys rhywbeth, rwy'n credu bod angen iddo ddod o safbwynt cadarnhaol megis "rydym yn cydnabod bod angen newid". [...] Ac efallai mai hwn fyddai'r galluogwr ac efallai mai hwn fyddai'r dystiolaeth o ysgol a oedd yn dweud bod cyfraddau bwlio i'w gweld yn gostwng. [...] Pam na ddylai ysgolion fod yn dweud, "Bobl bach, mae angen inni ymgysylltu â hyn?". Felly, mae'n debyg y byddwn i'n ei wneud o safbwynt dathliadol. (AGA-D)

Gallai cofnodi profiadau ysgolion sydd wedi gweithredu dull ysgol gyfan wrth iddynt fabwysiadu'r fframwaith ysgol heddwch fod yn adnodd pwysig, yn amlinellu'r modd y bu iddynt allu gweithredu'r dull yn

llwyddiannus. Gallai rhannu enghreifftiau o'r hyn sydd wedi gweithio, a sut mae rhwystrau posibl wedi eu goresgyn, ddarparu sicrwydd i ysgolion, athrawon ac arweinwyr sydd eisiau cyflwyno ethos seiliedig ar heddwch. Byddi astudiaethau achos a naratif gweithredu cadarnhaol yn darparu cymorth ychwanegol i ysgolion sy'n awyddus i ymgysylltu ag addysg heddwch ac egluro sut y gallai'r dull gael ei integreiddio i arferion, pynciau a gweithgareddau presennol. Ar ben hynny, awgrymodd AGA-D hefyd bod angen peth gwaith ynghylch naratif addysg heddwch er mwyn dadbacio rhagdybiaethau ei fod yn idealistig, haniaethol neu amherthnasol i fywyd bob dydd:

Byddwn i'n bendant yn ei werthu fel "Pam fyddech chi eisiau unrhyw beth arall ar wahân i'r ethos [heddwch] o fewn eich dull a'ch ysgolion? Nid ei fod yn idealistig, byddai hynny'n wych mewn byd perffaith. Ond allwch chi ddim dadlau na ddylai fod yr hyn rydym yn dyheu amdano. Ac os yw pobl yn dweud, "Wel, mae o braidd yn idealistig", byddwn i'n dweud nad yw'r dewis arall yn lle gwych. Felly mae'n werth yr ymdrech felly, dydi? Mae o werth yr anesmwythder o geisio rhoi rhywbeth ar waith. (AGA-D)

Byddai annog ysgolion heddwch presennol i rannu eu profiadau o'r ethos yn dod â'r dull yn fyw ac yn arddangos ei effaith gadarnhaol.

Ymgysylltu a Dysgu a Proffesiynol

Mae'r dull o ymdrin â dysgu proffesiynol yn y sector addysg ysgolion yng Nghymru yn un sy'n annog dysgu ysgol i ysgol a rhwydweithiau cydweithredol.⁸⁹ Pwysleisiodd y ddau gyfwelydd yr angen am weithdai a digwyddiadau hyrwyddo i greu amgylchedd lle gallai cyfranogwyr fod yn chwilfrydig, gofyn cwestiynau, a chael sgwrs am addysg heddwch:

Rwy'n credu, pan fo cyfleoedd i arddangos erbyn hyn, y dylai fod cyfle i ofyn cwestiynau. Rwy'n credu bod angen inni gynorthwyo athrawon ac ymarferwyr. Felly gallai fod yn llysgenhadon neu rai astudiaethau achos, ond hefyd y cyfle i drafod. (AGA-D)

[...] efallai cynnal rhywbeth fel gweithdy lle gall pobl drafod, darparu mewnbwn, cyfnewid gwybodaeth, siarad am fecanweithiau i wneud pethau'n wybyddus, wyddoch chi, mewn gwirionedd yn cael y sgysiau hynny â phobl, gan greu platfform (ABC-AGA)

Mae'r Cynllun Ysgolion Heddwch wedi bwriadu creu rhwydwaith gweithredol o ymarferwyr ac ysgolion, ond hyd yma mae wedi bod yn anodd sicrhau ymgysylltiad. Byddai cynnig cyfle i'r rhai sydd â diddordeb i ddod at ei gilydd i rannu sgiliau a myfyrio ar eu profiadau yn weithgaredd gwerthfawr. Gellid ei ddatblygu hefyd i gynnwys sesiynau rhagarweiniol i'r rhai a hoffai ddysgu mwy am addysg heddwch, y Cynllun Ysgolion Heddwch a'r manteision a'r cyfleoedd y gall eu cynnig. Ystyriaeth allweddol mewn unrhyw weithgareddau

⁸⁹ Llywodraeth Cymru, [Y Dull Cenedlaethol ar gyfer Dysgu Proffesiynol](#), Cyrchwyd 31 Ionawr 2024

ymgysylltu ag athrawon yn y dyfodol yw'r camau ymarferol sy'n angenrheidiol i fabwysiadu dull addysg heddwch, a'r hyn y gallai hyn ei olygu i'r athrawon:

Mae'r holl ddysgu proffesiynol rydw i wedi bod yn rhan ohono yn y gorffennol, o safbwynt ymarferydd neu athro, mae'n rhaid i ni feddwl bob amser "beth mae'n ei olygu iddyn nhw?" Oherwydd dyna'r cwestiwn y mae gan bawb ddiddordeb ynddo bob amser. Felly fel athrawes neu ymarferydd sydd wedi clywed am addysg heddwch, a dwi'n teimlo "O, dwi ychydig bach yn chwilfrydig am y peth". Yn y pen draw, byddant yn meddwl, beth mae'n ei olygu i mi? A beth sydd angen i mi ei wneud? (AGA-D)

Byddai fframio'r dull addysg heddwch o ran sut y gall athrawon ac ysgolion ymgysylltu ag ef, ei fabwysiadu a'i ymarfer yn cyfrannu at ddatrys dirgelwch y cysyniad a'i seilio drwy gymhwyso. Mae potensial hefyd i ddod ag ymchwilwyr addysg i rwydwaith neu gymuned ymarfer ysgolion heddwch; dywedodd y ddau ddarlithydd y bydden nhw'n croesawu'r cyfle i gwrdd â phobl sy'n gweithio yn y maes, ac o bosib gyfrannu at eu gwaith. Mae ymchwil addysgol yn thema arall o fewn dull cenedlaethol Cymru o ddysgu proffesiynol, ac anogir cyfleoedd i athrawon ymgymryd â'u hymchwil eu hunain. Byddai creu agoriadau ar gyfer cydweithio posibl rhwng ymchwilwyr ac athrawon yn gyfraniad gwerthfawr at ddatblygiad proffesiynol mewn addysg, a gallai greu sylfaen dystiolaeth gadarn, yn ogystal â dealltwriaeth ac ymwybyddiaeth bellach o addysg heddwch.

Mae yna enghreifftiau rhyngwladol o sefydliadau heddwch sy'n darparu hyfforddiant proffesiynol mewn swydd i athrawon a gweithwyr ieuenctid, er enghraifft mae Sefydliad Addysg Heddwch y Ffindir (Rauhankasvatusinstituutti RKI ry), a ariennir gan lywodraeth y Ffindir, yn darparu hyfforddiant i addysgwyr ar ddulliau i nodi a mynd i'r afael â gwahaniaethu a chryfhau cyfranogiad a dinasyddiaeth feirniadol weithredol pobl ifanc, a gallai hon fod yn fenter y gallai Academi Heddwch ystyried ymchwilio iddi ymhellach.⁹⁰

Addysg Bellach

Nid yw ymchwil i lywio'r adroddiad hwn yn nodi unrhyw enghreifftiau o addysg heddwch mewn Addysg Bellach yng Nghymru ar hyn o bryd. Fodd bynnag, mae tystiolaeth bod Addysg ar gyfer Datblygu Cynaliadwy a Dinasyddiaeth Fyd-eang wedi'u hintegreiddio'n dda mewn rhai colegau AB, a allai ddarparu sylfeini ar gyfer cyflwyno addysg heddwch ar y lefel hon o daith y dysgwr. Yn ddiweddar, ymrwymodd Llywodraeth Cymru i adolygu'r cynnig addysg 16-19 presennol i adeiladu ar bedwar diben y Cwricwlwm i Gymru a'u hymgorffori,⁹¹ ac fel yr amlinellwyd yn y bennod flaenorol, mae dull y cwricwlwm yn darparu digon o gyfle i ymgorffori ADCDF, yn cynnwys addysg heddwch, y gellid ei gymhwyso hefyd i addysg bellach.

⁹⁰Sefydliad Addysg Heddwch y Ffindir (Rauhankasvatusinstituutti RKI ry), <https://rauhankasvatus.fi/en/about-us/>

⁹¹ *Ein Cenhadaeth Genedlaethol: safonau uchel a dyheadau i bawb*, Llywodraeth Cymru 21 Mawrth 2023; <https://www.llyw.cymru/cenhadaeth-ein-cenedl-safonau-dyheadau-uchel-i-bawb-html>

Mae Coleg Penybont yn arweinydd mewn addysg datblygu cynaliadwy ac mae ganddo ddealltwriaeth ddofn o gyfrifoldeb byd-eang. Mae'n annog ei ddysgwyr i ddeall eu rôl fel dinasyddion – yn eu cymuned/au, ac fel dinasyddion byd-eang sy'n cyfrannu at ehangu'r gorwelion a chodi dyheadau ei ddysgwyr, a fframio eu cyfrifoldebau. Ategir hyn gan ymrwymiad cryf i ddatblygu cynaliadwy a Deddf Llesiant Cenedlaethau'r Dyfodol, sy'n cynnwys alinio'r holl brosiectau mawr â'r NDC a'r nodau llesiant. Coleg Penybont oedd y coleg AB cyntaf yn y DU i ddatgan argyfwng hinsawdd a natur, ac yn ddiweddar daeth yn aelod cyntaf y DU o Grŵp Cyswllt Nodau Datblygu Cynaliadwy (NDC) Ffederasiwn Colegau a Sefydliadau Polytechnig y Byd (FfCPB).⁹² Mae'n adrodd yn flynyddol ar ei gynnydd tuag at y nodau hyn ac yn nodi'r camau i fynd i'r afael â'r blaenoriaethau hyn o fewn ei strategaeth gynaliadwyedd. Yn y flwyddyn academiaidd gyfredol (2023/24), mae'n gweithio i fapio'r holl weithgareddau yn erbyn y NDC, gan greu gweithgareddau newydd i godi ymwybyddiaeth o'r NDC ar draws y coleg, ac mae ymgysylltu myfyrwyr â'r NDC drwy addysgu a dysgu yn flaenoriaeth.⁹³ Nod y coleg hefyd yw cynnal archwiliad cynaliadwyedd o bob maes cwricwlwm erbyn mis Mehefin 2025.⁹⁴ Yn ddiweddar mae wedi gweithredu polisi cyllid a buddsoddi moesegol. Yn rhan o'r polisi, mae gwahardd caffael nwyddau a gwasanaethau gan unrhyw fusnes sy'n ymwneud â chynhyrchu arfau a systemau arfau, ac ymrwymiad i hyrwyddo hawliau dynol yn ei waith, yn cynnwys fel rhan o gyfleoedd addysgu a dysgu.⁹⁵

Mae'r coleg yn cymryd agwedd gyfannol tuag at gynaliadwyedd, ac yn ychwanegol at ei weithredoedd i gyfrannu at sero net a chyfrifoldebau amgylcheddol eraill, mae hefyd yn cydnabod cyfraniad perthnasoedd rhyngbersonol da ac iechyd a llesiant i ansawdd bywyd. Dechreuodd Coleg Penybont weithio i gyflwyno dull ymarfer perthynol tuag at ymddygiad dysgwyr ddegawd yn ôl. Mae'r cyrsiau sy'n cael eu cynnal gan y coleg yn alwedigaethol yn bennaf, ac roedd yn ymddangos bod nifer o ddysgwyr, yn enwedig ar y campws a oedd yn cael ei ddominyddu gan fyfyrwyr gwrywaidd, yn ei chael hi'n anodd pontio o addysg orfodol i addysg ôl-orfodol, ac roedd rhai staff yn dibynnu ar ymdeimlad o awdurdod i reoli ymddygiad yn yr amgylchedd dysgu. Roedd sylweddoliad cynyddol bod dulliau cosbol yn achosi i batrymau barhau, ac roedd angen newid dull i dorri'r cylch.

Gan fod yn ymwybodol fod y coleg wedi rhoi cyfle i feithrin dyheadau ac ehangu gorwelion ei ddysgwyr, ysgogwyd yr uwch arweinwyr i sicrhau y byddai'r profiad addysg bellach yn darparu mwy na chymhwyster. Roeddent yn cydnabod bod gan y coleg rôl bwysig yn ei gymuned leol i helpu i atal pobl ifanc rhag mynd i mewn i'r system gyfreithiol, a bod ganddo'r potensial i wneud ymyriadau sylweddol i dorri patrymau

⁹² Coleg Penybont, Cynaliadwyedd, <https://www.bridgend.ac.uk/arweinyddiaeth-yngghylch-cynaliadwyedd-yng-ngholeg-penybont/y-nodau-datblygu-cynaliadwy-ar-nodau-llesiant/>; cyrchwyd 9 Chwefror 2024; Coleg Penybont,, Newyddion, <https://www.bridgend.ac.uk/coleg-penybont-yw-aelod-swyddogol-cyntaf-y-du-o-grwp-affinedd-rhyngwladol-o-fri/?lang=cy>; cyrchwyd 9 Chwefror 2024

⁹³ <https://www.bridgend.ac.uk/arweinyddiaeth-yngghylch-cynaliadwyedd-yng-ngholeg-penybont/y-nodau-datblygu-cynaliadwy-ar-nodau-llesiant/>

⁹⁴ Coleg Penybont, Ein Strategaeth Gynaliadwyedd, <https://www.bridgend.ac.uk/arweinyddiaeth-yngghylch-cynaliadwyedd-yng-ngholeg-penybont/ein-strategaeth-ar-gyfer-cynaliadwyedd/?lang=cy>; cyrchwyd: 4 Mai 2024

⁹⁵ *ibid*

ymddygiad gwrthgymdeithasol. Mewn ymateb i'r sefyllfa hon, cychwynnwyd dull hirdymor, integredig, coleg cyfan o fynd i'r afael â pherthnasoedd o fewn cymuned y coleg gan uwch arweinwyr.

Mae perthnasoedd rhyngbersonol yn flaenllaw o ran ymarfer perthynol, ac yn hynny o beth mae ymarfer perthynol yn rhannu dull addysg heddwch o feithrin a chynnal perthnasoedd da – ymrwymiad i ddatrys ac osgoi gwrthdaro, atgyweirio'r niwed a achosir gan dorri cytundebau, ymarfer empathi, a chyfrannu at amgylchedd dysgu tawel, cynhwysol a chefnogol. Roedd y dull ymarfer perthynol yn symud oddi wrth ganfyddiadau o 'awdurdod' a 'rhyddid', ac yn darparu iaith gyffredin i bawb yng nghymuned y coleg – dysgwyr, tiwtoriaid, a staff gwasanaethau cymorth. Rhan sylfaenol o'r gwaith fu meithrin dealltwriaeth mewn cymunedau dysgwyr a staff bod pob unigolyn yn gyfrifol am eu hymddygiad eu hunain, i bwysleisio pwysigrwydd parch, a'r ddealltwriaeth bod angen cymorth gwahanol ar bob dysgwr i gyflawni ei botensial. Nod gwerthoedd a gweledigaeth y coleg yw cefnogi dysgwyr i "fod yn bopeth y gallan [nhw] fod" yn glir, ac mae ymrwymiad cryf i fod yn lle rhagorol i ddysgu a gweithio.⁹⁶

Mae Pennaeth y coleg yn hyderus bod dull perthynol yn "rhan o DNA y sefydliad" gydag ethos sy'n canolbwyntio ar bobl yn rhan annatod o'r holl bolisiau a gweithgareddau. Mae datganiad cynhwysiant y sefydliad yn gwneud ymrwymiad i greu amgylchedd cynhwysol, ac i "ddathlu llwyddiannau pob unigolyn". Gwelir yr ymrwymiad hwn yn ymarferol o ddydd i ddydd, a thrwy rannu profiad y sefydliad trwy rwydweithiau fel Cwmnïau Cynhwysol a thrwy gydnabyddiaeth allanol o'i waith. Pwrpas diwrnodau hyfforddi staff cyfan oedd cael staff yn gefnogol i'r newidiadau - uwch arweinwyr, rheolwyr canol, athrawon, technegwyr, a staff cymorth, ac mae'r dull perthynol wedi'i gynnwys yn y cyfnod sefydlu ar gyfer dechreuwyr newydd.

O fewn y coleg, mae'r diwylliant cynhwysol yn seiliedig ar barch, ymddiriedaeth ac uniondeb, ac mae'n amgylchedd lle mae pobl yn "cefnogi ei gilydd". Mae'r sefydliad yn ystyriol o drawma, ac yn defnyddio pecyn cymorth datblygiad cymorth TrACE gan Hyb ACE Cymru⁹⁷ i lunio ei ddull o gydnabod "effaith sylweddol trawma ar fywydau unigolion a deall bod dull tosturiol a deallgar yn hanfodol i gefnogi ein myfyrwyr a'n staff ar eu teithiau academiaidd a phersonol [...] trwy fod yn bwyllog, cyson a gofalgwr yn ein dull o gyfathrebu a gwneud penderfyniadau".⁹⁸ Gweithio gyda staff ar empathi, a'u hannog i fod yn ymwybodol o'r angen am ddulliau empathi, oedd her ddiwylliannol fwyaf y daith ymarfer berthynol, ond mae wedi cael effaith drawsnewidiol. Mae gwreiddio'r nod cyffredin ar draws y sefydliad i gefnogi pawb i gyflawni'r gorau y gallant, wedi cryfhau arferion perthynol ac wedi gwneud y dull yn fwy hygyrch i gymuned y coleg. Gan adeiladu ar hyn, nod y coleg yw bod yn noddfa sy'n darparu ymdeimlad cryf o berthyn i'w gymuned fewnol, ac o fewn y gymuned ehangach y mae'n ei gwasanaethu.⁹⁹ Yn ddiweddar mae wedi

⁹⁶ Coleg Penybont, 'Ein Gweledigaeth a'n Gwerthoedd'; <https://www.bridgend.ac.uk/am-coleg-penybont/ein-gweledigaeth-an-gwerthoedd/?lang=cy> Cyrchwyd 4 Chwefror 2024

⁹⁷ Pecyn Cymorth TrACE, <https://hybacecymru.com/cymorth-trace/>, cyrchwyd 10 Mai 2024

⁹⁸ *Cod Dinasyddiaeth*, Coleg Penybont <https://www.bridgend.ac.uk/wp-content/uploads/2023/03/Citizenship-Code-December-23.pdf>, cyrchwyd 28 Ionawr 2024

⁹⁹ *Cod Dinasyddiaeth*, Coleg Penybont

mabwysiadu nod i fod yn sefydliad gwrth-hiliol, i ddatblygu'r gwaith a wnaed hyd yn hyn ymhellach. Mae yna ymwybyddiaeth y bydd y broses hon yn cymryd blynyddoedd lawer i'w chyflawni, ac fel y dull perthynol, mae angen ymdrech gyson yn y coleg cyfan a pharodrwydd i herio agweddau ac ymddygiadau. Mae Cod Dinasyddiaeth y coleg hefyd yn nodi'n glir y disgwyliadau ar gyfer y gymuned, gan dynnu sylw at "gyfrifoldeb y coleg i ddatblygu ei fyfyrwyr mewn ffyrdd a fydd yn meithrin diogelwch, hyder ac annibyniaeth, gan alluogi myfyrwyr i fod yn bopeth y gallant fod" a chydabod pwysigrwydd hanfodol "Coleg ac amgylchedd gwaith diogel [...] er lles yr holl fyfyrwyr".¹⁰⁰ Amlinellir tri disgwyliad ymddygiad yn y cod: byddwch yn Barod, byddwch yn Barchus, byddwch yn Ddiogel.¹⁰¹ Gofynnir i ddysgwyr lofnodi'r Cod Dinasyddiaeth i gadarnhau eu dealltwriaeth o'r disgwyliadau, ac i gadarnhau y byddant yn dangos yr ymddygiadau bob amser y maent yn llysgennad ar ran y coleg.

Mae ethos y sefydliad a'i ymrwymiad i ddull sy'n canolbwyntio ar bobl, ei gymuned ehangach ac Addysg ar gyfer Datblygu Cynaliadwy a Dinasyddiaeth Fyd-eang yn darparu cryn potensial ar gyfer ymgysylltu â dulliau addysg heddwch, yn enwedig gan y byddai'n adeiladu ar arferion presennol. Mae gan y dull ymarfer perthynol gysylltiad cryf ag addysg heddwch, ac efallai y bydd lle i gydnabod a chynorthwyo'r polisïau a'r gweithgareddau presennol. Mae'r Cynllun Ysgolion Heddwch wedi mynegi diddordeb mewn archwilio addysg heddwch o fewn AB, ac mae'n ymddangos bod Coleg Penybont yn sefydliad sy'n barod ar gyfer hynny. Gallai partneriaeth rhwng Ysgolion Heddwch a'r coleg fod ar ffurf cyrsiau dysgu cymunedol / oedolion, neu raglen ehangach sydd â chysylltiad agosach â'i arfer perthynol, a byddai'r ddau opsiwn yn cyfrannu at elfen dinasyddiaeth weithredol addysg drydyddol, ac o bosibl at gyfraniad cenhadaeth ddinesig i amcanion Deddf Llesiant Cenedlaethau'r Dyfodol. Gellid archwilio ffrydiau cyllido, fel y rhaglen Taith, i gefnogi prosiectau posibl, a byddent yn cyfrannu at gyfleoedd cyfoethogi gwerthfawr i ddysgwyr.

Addysg Uwch

Mae tu hwnt i gwmpas yr adroddiad hwn i arolygu ac adolygu cynnwys cyrsiau a modiwlau a addysgir ym mhob prifysgol yng Nghymru yn gynhwysfawr, fodd bynnag, mae'n bosibl darparu dadansoddiad sy'n rhoi cipolwg ar y sefyllfa ac amlinellu cyfleoedd posibl ar gyfer cynyddu presenoldeb addysg dros heddwch ar y lefel hon.

Mae'n ymddangos bod gan addysg heddwch bresenoldeb cyfyngedig mewn addysgu Addysg Uwch yng Nghymru ar hyn o bryd, gyda llond llaw o fodiwlau israddedig cysylltiadau rhyngwladol a gwleidyddiaeth sy'n cynnwys heddwch ym mhrifysgolion Aberystwyth, Caerdydd ac Abertawe, ac un radd ôl-raddedig a enwir (Astudiaethau Heddwch, gan Brifysgol Cymru Y Drindod Dewi Sant) ar gael yn y sector. Mae hyn yn cyd-fynd yn fras â'r duedd ar draws sector ehangach y DU, gyda dau gwrs israddedig yn cyfeirio'n uniongyrchol at heddwch yn eu teitlau – gradd Astudiaethau Heddwch a Chysylltiadau Rhyngwladol Prifysgol Caerhirfryn, a gradd Rhyfel, Heddwch a Chysylltiadau Rhyngwladol Prifysgol Reading. Mae gan radd

¹⁰⁰ Cod Dinasyddiaeth, Coleg Penybont

¹⁰¹ Cod Dinasyddiaeth, Coleg Penybont

israddedig Cysylltiadau Rhyngwladol, Gwleidyddiaeth ac Astudiaethau Diogelwch Prifysgol Bradford sylfaen gref mewn heddwch, gyda modiwlau dewisol mewn adeiladu heddwch ar gael yn y maes llafur.¹⁰² Ar lefel ôl-raddedig a addysgir, mae 27 cwrs ar gael mewn 22 o brifysgolion yn y DU.¹⁰³

Prifysgol	Enw'r Cwrs
Prifysgol Coventry	Astudiaethau MA Heddwch a Gwrthdaro
Prifysgol Durham	MSc Atal Gwrthdaro ac Adeiladu Heddwch
Coleg y Brenin, Llundain	MA Datrys Gwrthdaro mewn Cymdeithasau Rhanedig
Coleg y Brenin, Llundain	MSc Arweinyddiaeth Fyd-eang ac Adeiladu Heddwch
Coleg y Brenin, Llundain	MA Heddwch Rhyngwladol a Diogelwch
Prifysgol Caerhirfryn	MA Datrys Gwrthdaro ac Astudiaethau Heddwch
Prifysgol Leeds Beckett	MA Heddwch a Datblygu
Prifysgol Metropolitan Llundain	MA Heddwch, Gwrthdaro a Diplomyddiaeth
Prifysgol Loughborough	MSc Diogelwch, Adeiladu heddwch a Diplomyddiaeth
Ysgol Economeg Llundain	MSc Rhywedd, Heddwch a Diogelwch
Prifysgol Oxford Brookes	MA Gweithredu Dyngarol ac Adeiladu Heddwch
Coleg Prifysgol Llundain	MA Addysg a Datblygiad Rhyngwladol: Gwrthdaro, Argyfyngau a Heddwch (GAH)
Prifysgol Ulster	MA Heddwch a Gwrthdaro
Prifysgol Aberdeen	MA Astudiaethau Heddwch a Gwrthdaro
Prifysgol Bradford	MA Uwch Ymarfer mewn Adeiladu Heddwch a Datrys Gwrthdaro
Prifysgol Bradford	MA Heddwch, Gwrthdaro a Datblygu
Prifysgol Bradford	MA Heddwch, Gwytnwch a Chyfiawnder Cymdeithasol
Prifysgol Essex	MA neu MSc Datrys Gwrthdaro
Prifysgol Glasgow	LLM Cyfraith Ryngwladol Diogelwch, Heddwch a Datblygu Byd-eang
Prifysgol Caint	MA Astudiaethau Heddwch a Gwrthdaro (dyfarniad rhyngwladol ar y cyd)
Prifysgol Leeds	MA Gwrthdaro, Datblygu ac Adeiladu Heddwch
Prifysgol Manceinion	MA Astudiaethau Heddwch a Gwrthdaro
Prifysgol St Andrews	MLitt Adeiladu Heddwch a Chyfryngu
Prifysgol Caer-wynt	MA Cymodi
Prifysgol Caer-wynt	MA Cymodi ac Adeiladu Heddwch

¹⁰² Prifysgol Bradford, <https://www.bradford.ac.uk/courses/ug/international-relations-politics-security-ba/>

¹⁰³ Hotcourses abroad, <https://www.hotcoursesabroad.com/study/training-degrees/uk/postgraduate/peace-studies-courses/loc/210/slevel/3/cgory/ea.71-4/sin/ct/page/2/programs.html?#search&catCode=EA.71-4&countryId=210&parentQualId=3&nationCode=210&nationCntryCode=210&studyAbroad=N&studyOnline=N&studyCross=N&studyDomestic=N&studyPartTime=N&startOnlineCampusLater=N&manStdyAbrdFlg=N&parentCatEngName=Social%20Studies%20and%20Communications&childCatEngName=Politics&ldcsCatEngName=Peace%20Studies&fastlane=N>, cyrchwyd 23 Mai 2024

Prifysgol Efrog	MA Astudiaethau Heddwch a Gwrthdaro
PCYDDS	MA Astudiaethau Heddwch

Mae nifer y cyrsiau'n awgrymu bod lefel dda o ddiddordeb a marchnad gystadleuol ar gyfer cyrsiau ôl-raddedig a addysgir o fewn astudiaethau heddwch. Mae'r cyrsiau hefyd yn dangos ystod o ddulliau – o ddulliau cyfreithiol, i bolisi gwrthdaro a diogelwch, a chyfiawnder a datblygiad cymdeithasol. Arweinir llawer o'r cyrsiau gan ganolfannau ymchwil heddwch – y Sefydliad Ymchwil Gwrthdaro Rhyngwladol ym Mhrifysgol Ulster, Sefydliad Richardson ym Mhrifysgol Caerhirfryn, Canolfan Gwrthdaro a Chydweithrediad Michael Nicholson ym Mhrifysgol Essex, a Chanolfan Astudiaethau Heddwch a Gwrthdaro St Andrews. Mae rhai o'r cyrsiau'n rhai sy'n ymestyn yn ôl ymhell – mae Astudiaethau Heddwch ym Mhrifysgol Bradford yn dathlu ei hanner canmlwyddiant eleni, a lansiwyd gradd israddedig Astudiaethau Heddwch a Chysylltiadau Rhyngwladol Prifysgol Caerhirfryn bum mlynedd ar hugain yn ôl. Er bod y cyrsiau o ddiddordeb o fewn y farchnad addysg ryngwladol, mae yna agwedd sy'n seiliedig ar le iddyn nhw hefyd – mae cwrs Prifysgol Ulster wedi'i leoli mewn cymdeithas sy'n deillio o wrthdaro, mae gan Bradford a Chaerhirfryn gysylltiadau cryf â thraddodiad y Crynwyr lleol, ac mae Coventry yn gosod ei hun fel dinas heddwch a chymod. O ystyried treftadaeth heddwch Cymru ei hun, ei hymrwymiad cenedlaethol i'r nodau datblygu cynaliadwy, a dyletswydd strategol y Comisiwn Addysg Drydyddol ac Ymchwil i hyrwyddo agwedd fyd-eang mewn addysg ôl-orfodol yng Nghymru, byddai'n briodol ystyried sut y gallai cynnig unigryw Cymreig edrych yn y farchnad hon.

Fel yr argymhellwyd yn gynharach yn yr adroddiad hwn, mae fframio addysg heddwch o fewn Addysg ar gyfer Datblygu Cynaliadwy a Dinasyddiaeth Fyd-eang yn rhoi mwy o gyfleoedd i hyrwyddo ei berthnasedd. Mae prifysgolion yng Nghymru wedi ymrwmo i ymgorffori cyfraniad i'r NDC o fewn eu sefydliadau, a fframio agweddau ar eu gweithgareddau ymchwil o fewn y NDC. Fodd bynnag, maent wedi tynnu sylw at fynd i'r afael â chynaliadwyedd amgylcheddol eu gweithrediadau yn eu dull gweithredu. Un maes y gellid dadlau y gellid ei wasanaethu'n well – neu o leiaf ei gyfleu'n gliriach – yw Addysg ar gyfer Datblygu Cynaliadwy (ADC). Mae prifysgolion Cymru sy'n llwyfannu ADC ar eu gwefannau yn tueddu i ganolbwyntio ar agweddau amgylcheddol y dull ac mae pwyslais clir ar agweddau amgylcheddol y NDC - mae'r enghreifftiau mae'r brifysgol yn eu darparu'n cyd-fynd yn agos â mynd i'r afael â newid hinsawdd - ac mae agweddau cymdeithasol ac ymddygiadol y NDC yn cael eu tangynrychioli.¹⁰⁴ Mae'n ymddangos bod Prifysgol Bangor yn ystyried y NDC yn gyffredinol, ac wedi gosod targedau ar gyfer ei chynnydd mewn ADC, ac mae wedi ymgymryd â mapio cwricwlwm NDC ar gyfer dau goleg (cyfadranau) ar gyfer eu modiwlau cyfan er mwyn cydnabod a gwella "i ba raddau y mae cynaliadwyedd yn cael ei ddysgu ar draws Prifysgol

¹⁰⁴Er enghraifft, gweler: Targedau a Gwrthrychau Cynaliadwyedd 2023-24, Prifysgol Metropolitan Caerdydd <https://www.cardiffmet.ac.uk/about/sustainability/Documents/Section%201/Targets%20and%20Objectives%202023%2024.pdf> Cyrchwyd 15 Chwefror 2024; Addysg ar gyfer Datblygu Cynaliadwy, Prifysgol De Cymru <https://www.southwales.ac.uk/about/sustainability/our-priorities/education-for-sustainable-development/>, Cyrchwyd 15 Chwefror 2024

Bangor".¹⁰⁵ Mae fframio'r NDC yn fwy eang yn annog dealltwriaeth gyfannol, ac yn darparu mwy o gyfle i integreiddio ystyriaethau dinasyddiaeth fyd-eang ar draws yr ystod eang o gyrsgau a phynciau. Mae Prifysgol Caerhirfryn, sy'n cynnal cyrsiau ar lefel israddedig ac ôl-raddedig sy'n ymgorffori astudiaethau heddwch, yn cymryd y dull hwn ac yn amlinellu'n glir ei gyfraniad at nod datblygu cynaliadwy 16 – Heddwch, Cyfiawnder a Sefydliadau Cryf, a'i waith i hyrwyddo cymdeithasau heddychlon.¹⁰⁶ Gydag ymrwymiad Cymru i'r NDC yn Neddf Llesiant Cenedlaethau'r Dyfodol, byddai'n briodol i'r sector addysg uwch archwilio ei ryngweithio â'r NDC a'i gyfraniad iddynt mewn mwy o fanylder, dyfnhau dealltwriaeth o'r cyfiawnder cymdeithasol, cynhwysiant a chydlyniant a nodi cyfleoedd pellach i gyfrannu.

Mae'r rhain yn enghreifftiau o ddarparwyr addysg uwch newydd yn dod i'r amlwg yng Nghymru sy'n canolbwyntio'n benodol ar gynaliadwyedd. Mae Coleg y Mynydd Du yn cynnig gradd israddedig mewn Dyfodol Cynaliadwy: Mae gan y Celfyddydau, Ecoleg a Newid Systemau mewn partneriaeth â Phrifysgol Metropolitan Caerdydd, a'r Ganolfan Technoleg Amgen (CAT) ysgol raddedig gyda dull integredig o gyflwyno cynaliadwyedd, gyda chysiau wedi'u dilysu gan Brifysgol Dwyrain Llundain. Er bod y ffocws yn amgylcheddol yn bennaf, mae cwmpas, yn enwedig gyda lens Deddf Llesiant Cenedlaethau'r Dyfodol (Cymru) 2015, i Academi Heddwch archwilio cyfleoedd ar gyfer addysg heddwch gyda'r darparwyr newydd.

Mae Rhwydwaith Ymchwil Heddwch Academi Heddwch Cymru a lansiwyd yn ddiweddar yn darparu cyfleoedd i'r rhai sy'n weithgar mewn ymchwil heddwch – ar draws prifysgolion, y trydydd sector, a sefydliadau cenedlaethol - i gyfarfod, cydweithio a rhannu eu gwaith, a gallai gynnig cyfle i addysg heddwch gynyddu ei phroffil. Mae Academi Heddwch Cymru wedi gweithio mewn partneriaeth â Phrifysgol Abertawe a Llyfrgell Genedlaethol Cymru i ddatblygu ysgoloriaeth ymchwil ddoethurol gydweithredol a ariennir gan CYCD, gan edrych ar hanes neges flynyddol heddwch ac ewyllys da plant Cymru, ac mae'n mynd ati i feithrin cysylltiadau â sefydliadau sy'n gweithio yn yr ymchwil amgylcheddol, yn cynnwys Llwyfan Amgylchedd Cymru.

Efallai y bydd y rhwydwaith maes o law yn darparu mwy o gyfleoedd i fyfyrwyr israddedig ac ôl-raddedig gymryd rhan a dyfnhau eu hymgysylltiad eu hunain ag ymchwil ac addysg heddwch, ac mae prosiect 'Delweddu Heddwch' Prifysgol St Andrews yn fodel i'r sawl sy'n cymryd rhan yn y rhwydwaith ei ystyried. Mae'r prosiect yn Brosiect Integredig Fertigol (PIF) sy'n cael ei arwain gan oruchwyliwr academiaidd ac sy'n cynnwys myfyrwyr traws ddisgyblaethol, israddedig ac ôl-raddedig, o bob rhan o'r brifysgol.¹⁰⁷ Allbwn cyntaf y prosiect oedd adnodd llyfryddiaethol ar-lein, y Llyfrgell Delweddu Heddwch, sydd ar hyn o bryd yn cynnwys dros 175 o ffynonellau.¹⁰⁸ Mae'n adnodd byw, ac ychwanegir deunyddiau yn rheolaidd. Mae'r

¹⁰⁵ Mapio'r Nodau Datblygu Cynaliadwy (NDC) o fewn Cwricwlwm Prifysgol Bangor, Prifysgol Brifysgol Bangor <https://www.bangor.ac.uk/sustainability/curriculum-teams.php.cy> Cyrchwyd 25 Ionawr 2024

¹⁰⁶ Nodau Datblygu Cynaliadwy, Prifysgol Caerhirfryn, <https://www.lancaster.ac.uk/sustainability/sustainability-strategy/sustainable-development-goals/peace-and-justice/>, Cyrchwyd 24 Mai 2024

¹⁰⁷ Prosiectau Integredig Fertigol, Prifysgol St Andrews, <https://www.st-andrews.ac.uk/education/vip/> cyrchwyd 17 Chwefror 2024

¹⁰⁸ Delweddu Heddwch, Prifysgol St Andrews, <https://arts.st-andrews.ac.uk/visualising-war/visualising-peace/> cyrchwyd 17 Chwefror 2024

myfyrwyr ymchwil yn ystyried eu hunain fel "ysgolheigion ddinasyddion", gan guradu adnodd hygyrch sy'n cymryd agwedd gynhwysol tuag at naratifau heddwch, a'u nod yw helpu ymarferwyr meithrin heddwch profiadol neu'r rhai sydd â diddordeb mewn datblygu gwell dealltwriaeth o'r cysyniad o heddwch, i gael mynediad at ystod ehangach o naratifau heddwch ar draws ystod eang o bynciau a dulliau.¹⁰⁹ Efallai y bydd potensial o fewn y rhwydwaith ymchwil i gynnwys myfyrwyr mewn prosiectau Cymru gyfan tebyg sy'n archwilio agweddau ar heddwch ac adeiladu heddwch. Byddai'n rhoi cyfle sylweddol i fyfyrwyr ymgymryd â gwaith ymchwil dilyn a'i gefnogi, gan greu a rhannu gwybodaeth ar draws ffiniau disgyblaethol, gyda pherthnasedd cymdeithasol a photensial cryf i gael effaith.

Mae prifysgolion yng Nghymru wedi datblygu eu cynlluniau eu hunain i annog a chydabod gweithgareddau dinasyddiaeth myfyrwyr. Mae grŵp Cynaliadwyedd Prifysgol Abertawe wedi datblygu Gwobr Dinasyddiaeth Fyd-eang, yn seiliedig ar egwyddorion UNESCO cymwyseddau ADC.¹¹⁰ Mae'r wobr yn cael ei chydabod gan y Cofnod Cyflawniad Addysg Uwch (CCAUI),¹¹¹ ac mae wedi'i integreiddio'n ffurfiol fel rhan o gwricwla o gyrsiau ar draws Colegau'r brifysgol, ac mae'n gweithio gydag academyddion, ymchwilwyr a phartneriaid allanol, ac yn darparu cyfleoedd gwirfoddoli ac ymgysylltu.¹¹² Gallai'r cynllun presennol hwn roi cyfle i gydweithio – er enghraifft gallai fersiwn ddiwygiedig o'r cwrs addysg heddwch a ddatblygwyd yn ddiweddar ar gyfer cwricwlwm y dinesydd fod yn addas, o ystyried ei berthnasedd i ddysgu ADC a dysgu byd-eang. Mae potensial i weithio gyda phrifysgolion i gyflwyno cyrsiau i fyfyrwyr fel rhan o'u gweithgareddau bugeiliol a dinasyddiaeth – cymorth ac adnoddau gwerthfawr i fyfyrwyr o ystyried y dadleuon cyfredol ynghylch materion rhyddid i lefaru a chyfiawnder cymdeithasol ar gampysau, a'r potensial o gamddealltwriaeth ac anghytundeb a all godi.¹¹³ Fel mae ymchwilydd i gysylltiadau rhyng-ffydd wedi sylwi:

mae'n anodd dychmygu sgil bywyd pwysicach na'r gallu i gyd-dynnu â phobl yn wahanol i ni'n hunain. Os yw hyn yn sgil-gynnyrch addysg prifysgol, mae'n un o werth diamheuol, ac mae'n tanlinellu achos dros brifysgolion sy'n gwasanaethu lles y cyhoedd. Yn syml, mae'n tynnu sylw at allu prifysgolion i gynhyrchu dinasyddion da.¹¹⁴

¹⁰⁹ ibid

¹¹⁰ Addysg ar gyfer Datblygu Cynaliadwy, Prifysgol Abertawe, <https://www.swansea.ac.uk/cy/cynaliadwyedd/strategaeth-a-pholisi/#ymgysylltu-staff-a-myfyrwyr-rhan-1=is-expanded>, Cyrchwyd 25 Ionawr 2024

¹¹¹ Mae HEAR yn darparu un cofnod cynhwysfawr o gyflawniadau myfyrwyr, yn academiaidd a rhai nad ydynt yn gysylltiedig â graddau sydd wedi'u gwirio gan brifysgol ddyfarnu'r myfyriwr. <https://www.hear.ac.uk/> Cyrchwyd 25 Ionawr 2024

¹¹² Addysg ar gyfer Datblygu Cynaliadwy, Prifysgol Abertawe. ibid

¹¹³ Gweler <https://wonkhe.com/blogs/to-resolve-conflicts-in-the-campus-culture-wars-we-need-to-listen-as-well-as-speak/>

¹¹⁴ Matthew Guest, Mae amrywiaeth y profiad prifysgol yn helpu myfyrwyr i ddod yn ddinasyddion da, <https://wonkhe.com/blogs/the-diversity-of-the-university-experience-helps-students-become-good-citizens/>, Cyrchwyd 25 Chwefror 2024

Fel yr ysgrifennodd Raymond Williams, mae gan addysg gyhoeddus rwymedigaeth "i fynegi a chreu gwerthoedd democratiaeth addysgedig a diwylliant cyffredin", a gallai buddsoddi mewn datblygu'r agwedd hon ar brofiad prifysgol fod yn gyfraniad sylweddol at genhadaeth ddinesig a phrofiad y dysgwr.¹¹⁵

Mae'r weithredaeth, protestiadau a gwersylloedd ar y campws mewn ymateb i ryfel Israel-Gaza yn dangos diddordeb o fewn cymuned y myfyrwyr ynghylch materion dyngarol a chreu heddwch ac adeiladu heddwch. Ar hyn o bryd mae prifysgolion yng Nghymru - ac eithrio Prifysgol Wrecsam - yn cynnal Corfflu Hyfforddi Swyddogion Prifysgol Cymru (CHSPC), uned wrth gefn y fyddin. Mae'r uned yn cynnig hyfforddiant milwrol ac arweinyddiaeth, ynghyd â gweithgareddau chwaraeon ac antur, i helpu i ddatblygu sgiliau megis arweinyddiaeth, gwaith tîm a chyfathrebu. Gallai rhaglen gyfoethogi sy'n canolbwyntio ar heddwch fod yn ddewis yn lle hyn, ac mae'r rhaglen Llysgennad Heddwch Ifanc WCIA yn brosiect allai gael ei ddatblygu ymhellach i lenwi'r bwlch hwn. Gallai cydweithio ag undebau myfyrwyr ar draws Cymru helpu i godi proffil y cynllun, ac mae cynnig addysg heddwch penodol i undebau myfyrwyr, yn seiliedig ar y cyrsiau a ddatblygwyd ar gyfer addysg oedolion, neu gyrsiau byrrach newydd, fod yn ffordd fuddiol i rannu'r cymwyseddau a gafodd eu meithrin gan addysg heddwch ymhellach.

Mae lle hefyd i ymchwilwyr prifysgol a staff addysgu sy'n gweithio ar bynciau sy'n berthnasol i heddwch gefnogi gwaith Cynllun Ysgolion Heddwch Cymru, ac mae PRIF@School (Rhwydwaith Ymchwil ac Ymarfer Addysgol Heddwch) Sefydliad Ymchwil Heddwch Frankfurt (Leibniz-Institut für Friedens- und Konfliktforschung) yn cynnig model posibl y gallai Rhwydwaith Ymchwilwyr Heddwch yr Academi Heddwch ystyried ei fabwysiadu. Wedi'i lansio yn 2020, mae'r rhwydwaith PRIF@School (PRIF@Schule) wedi gweithio gydag ysgolion yn Frankfurt am Main a gwladwriaeth Hesse i gynorthwyo eu gwaith mewn addysg wleidyddol, ddinesig a heddwch. Mae PRIF@School yn eistedd o fewn adran Cyngor Cyfathrebu a Pholisi'r sefydliad, ac fe'i cydlynir gan ddau Swyddog Cyfnewid Gwybodaeth sy'n hwyluso deialog a chynorthwyo creu cysylltiadau rhwng ymarferwyr ac ymchwilwyr. Dros y tair blynedd diwethaf, mae'r rhaglen wedi datblygu i fod yn adnodd 'mynd ato' i ysgolion ac ymarferwyr addysg mewn addysg ddinesig. Daeth y prosiect i fod o Ddeialog Dinasyddion (Bürgerdialog) yn 2019 ar 'Frankfurt's Ideas for Peace' ('Frankfurter Ideen für den Frieden'), a wahoddodd ddysgwyr o chwe ysgol yn Hesse i gyfrannu cwestiynau ar chwe maes pwnc - o'r hinsawdd a diogelwch i gydlyniant cymdeithasol a systemau arfau ymreolaethol. Cyflwynwyd dros gant o gwestiynau, gan ddangos ehangder y ddealltwriaeth o heddwch a'r diddordeb oedd gan bobl ifanc yn y materion. Atebwyd y cwestiynau gan arbenigwyr ac ymchwilwyr PRIF amrywiol mewn digwyddiad cyhoeddus a gynhaliwyd yn Llyfrgell Dinas Frankfurt, ynghyd â thrafodaeth ehangach gyda'r mynychwyr. Wedi'i lywio gan anghenion ysgolion ac ymarferwyr addysgol, mae'r prosiect yn hwyluso cyfnewid gwybodaeth rhwng ysgolion ac ymchwilwyr heddwch. Mae Prif@School yn galw cyfarfodydd rheolaidd (ar-lein) ar gyfer y rhwydwaith i ddarparu cyfleoedd i greu cysylltiadau, ceisiadau maes, ac i drafod themâu a dulliau posibl i ymarferwyr eu hystyried. Mae'r rhaglen hefyd yn darparu siaradwyr ar gyfer ysgolion i gefnogi trafodaeth, trafod ac archwilio pynciau perthnasol – yn fwyaf diweddar ar y gwrthdaro yn Gaza –

¹¹⁵ Raymond Williams, *The Long Revolution*, 1961 (2001) t 176

wedi'i lywio gan drylwyredd academiaidd ac annibyniaeth. Mae ymchwilwyr sy'n ymweld ag ysgolion i gyflwyno gweithdai a gwersi hefyd wedi'u cynorthwyo i ddatblygu adnoddau ac allbynnau priodol yn cynnwys blogiau a phodlediadau, sy'n berthnasol i gynulleidfa ehangach nad yw'n arbenigol. Mae'r dull gweithredu PRIF@School, sy'n defnyddio arbenigedd ymchwilwyr ac yn darparu lle ar gyfer deialog gydag ymarferwyr addysgol yn ddatblygiad arloesol yn yr ymdrech i greu cymdeithasau mwy heddwch. Yn hytrach na dyblygu mentrau addysg heddwch, mae'n darparu cynnig unigryw sydd o fudd i ymchwilwyr ac ymarferwyr fel ei gilydd.

Mae datblygu rhwydwaith Academi Heddwch ar gyfer ymchwilwyr heddwch, a'r cysylltiad presennol â'r Cynllun Ysgolion Heddwch yn gyfle i archwilio model PRIF@School i Gymru. Byddai'r ymchwilwyr heddwch yn adnodd gwerthfawr i ymarferwyr addysgol fanteisio arno i gynorthwyo eu hymarfer, a gallai hefyd gyfrannu at agenda cenhadaeth ddinesig addysg uwch. Byddai angen adnoddau i gefnogi ei weithgareddau, ond gallai ddod â llawer o fanteisio a chryfhau perthnasoedd yn y gymuned addysg heddwch ac ymchwil. Byddai unrhyw weithgaredd tebyg yng Nghymru yn gofyn am hwylusydd cyfnewid gwybodaeth gyfryngol i sicrhau bod yr ysgolion yn derbyn cyngor a chefnogaeth briodol, a bod ymchwilwyr yn deall gofynion ymarferwyr ysgol. Gallai'r Academi Heddwch, gan weithio gyda'r prosiect Ysgolion Heddwch, fod mewn sefyllfa dda i ymgymryd â'r rôl hon.

Mae potensial i'r sector addysg uwch atgyfnerthu ei gyfraniad at ddinasyddiaeth fyd-eang a chyfrannu at gefnogi cymunedau cydlynol a chynhwysol yn rhyngwladol, yn ogystal ag yn lleol. Mae symudedd myfyrwyr wedi cynyddu, ac mae dysgwyr o fewn sector addysg uwch Cymru yn cymryd eu profiadau gyda nhw pan fyddant yn graddio. Mae yna waith ymchwil rhagorol hefyd i adeiladu arno - er enghraifft dau brosiect ar raddfa fawr a ariennir gan Gronfa Ymchwil Heriau Byd-eang UKRI sy'n cynnwys ymchwilwyr o brifysgolion Cymru. Mae'r rhwydwaith Creu Man Diogelach, dan arweiniad Adran Gwleidyddiaeth Ryngwladol Prifysgol Aberystwyth, wedi dyfarnu cyllid i chwech ar hugain o brosiectau ymchwil ar draws y byd sy'n archwilio amddiffyniad sifil di-arf a hunan-amddiffyn mewn cymdeithasau sy'n profi gwrthdaro treisgar.¹¹⁶ Mae llawer o'r prosiectau'n cefnogi gwaith sefydliadau llawr gwlad sy'n ymwneud ag eiriolaeth ac adeiladu gallu, a dysgu gan y cymunedau yr effeithir arnynt, gan fynd ati i gefnogi dysgu gydol oes anffurfiol i hyrwyddo lleihau trais. Mae'r rhwydwaith Addysg, Cyfiawnder a Chof (ACaCh) yn cynnwys ymchwilwyr o Brifysgol Caerdydd, ac mae'n rhwydwaith cydweithredol, rhyngwladol o ymchwilwyr, addysgwyr a sefydliadau cymdeithas sifil sydd wedi ymrwymo i ffyrdd creadigol o addysgu a dysgu am y gorffennol treisgar a'r anghyfiawnderau er mwyn adeiladu diwylliant di-drais ac o heddwch, fel y rhagwelir yn nharged Nod Datblygu Cynaliadwy 4.7.¹¹⁷ Mae'n comisiynu ymchwil i ddatblygu a deall arferion creadigol ar gyfer addysgu a dysgu am y gorffennol treisgar, gan ganolbwyntio ar ymchwil dan arweiniad ymchwilwyr gyrfa gynnar ac ymchwilwyr o grwpiau sydd heb gynrychiolaeth ddigonol.

¹¹⁶ Creu Man Diogelach, <https://creating-safer-space.com/>, cyrchwyd 1 Mai 2024

¹¹⁷ ACaCh, <https://edjam.network/>, cyrchwyd 1 Mai 2024

Mae gan sector addysg uwch Cymru agwedd fyd-eang - mae ganddo enw da a brand rhyngwladol cryf, a chysylltiadau da ar draws y byd. Gan weithio gyda phartneriaid yn y sector i gychwyn trafodaeth am y potensial ar gyfer cynnig addysg heddwch ac astudiaethau heddwch neilltuol, gallai Academi Heddwch Cymru gyfrannu at gryfhau enw da Cymru ymhellach fel cenedl sy'n gyfrifol yn fyd-eang, yn unol â blaenoriaethau Strategaeth Ryngwladol Llywodraeth Cymru.¹¹⁸

Dysgu Gydol Oes- Addysg Oedolion ac Addysg a Hyfforddiant Galwedigaethol

Mae gan addysg oedolion rôl bwysig wrth helpu dysgwyr i ddatblygu sgiliau ac ymddygiadau i'w paratoi'n well i ddelio â heriau cymhleth ac mae ganddi'r gallu i gefnogi dysgu ar gyfer profiadau trawsnewidiol i unigolion, cymuned a chymdeithas. Dadleuwyd yn flaenorol y dylai "addysg heddwch fod yn rhan annatod o addysg oedolion. Mae addysgwyr sy'n oedolion mewn sefyllfa allweddol i allu rhoi gwaith addysgol dros heddwch ar waith."¹¹⁹

Mae gan addysg oedolion draddodiad hir o addysgu a dysgu ar gyfer meddwl beirniadol a myfyrio, ledled y byd mae wedi mynd i'r afael â materion cymdeithasol-ddiwylliannol, gwleidyddol ac economaidd ar gyfer newid unigol, cyfunol a chymdeithasol.¹²⁰ Mae addysg heddwch, ac addysg dros heddwch, i oedolion, wedi cael ei arwain i raddau helaeth gan sefydliadau y tu allan i sefydliadau addysg ffurfiol. Yn eu pennod, 'Peace-Building and Conflict Resolution Education' yn *The Handbook Of Adult And Continuing Education* (argraffiad 2020), mae Robin Neustaeter a Jessica Senehi yn myfyrio fel a ganlyn:

Yn yr Unol Daleithiau a ledled y byd, mae mudiadau sy'n mynd i'r afael â newid cymdeithasol di-drais cadarnhaol er mwyn sicrhau heddwch a nodweddir gan gyfiawnder hiliol ac economaidd a chydarddoldeb rhywedd wedi dibynnu ar ddatblygu prosesau addysgol y tu allan i sefydliadau ffurfiol. Mae mudiadau cymdeithasol p'un a yw'n gymuned yn trefnu neu'n weithredu ar y cyd - yn safleoedd pwysig i addysg anffurfiol oedolion, yn aml yn cynnal yn groes i addysg ffurfiol, a all bwysleisio sgiliau neu gymwyseddau gwahanol. Mae gwaith creu heddwch a chyfiawnder cymdeithasol yn ceisio diffinio gweledigaeth o heddwch a chyfiawnder cymdeithasol, datblygu strategaethau ar gyfer cyfleoedd cymdeithasol, a defnyddio dulliau addysgu sy'n rhoi egwyddorion y maent yn eu harddel ar waith.¹²¹

Mae natur anffurfiol, llawr gwlad llawer o addysg heddwch o fewn dysgu gydol oes yn ei gwneud hi'n anodd ei adolygu. Mae ymchwil desg yn awgrymu bod y mentrau sydd wedi'u dogfennu, eu hadrodd a'u hastudio orau ym maes addysg heddwch yn canolbwyntio ar ddysgwyr ifanc mewn cymdeithasau yn dilyn gwrthdaro

¹¹⁸Strategaeth Ryngwladol Cymru, Llywodraeth Cymru <https://www.llyw.cymru/strategaeth-ryngwladol-i-gymru-html>, cyrchwyd 1 Mai 2024

¹¹⁹ Helena Kekkonen, 'Peace Education Is Integral to Adult Education', *Convergence: An International Journal of Adult Education*, v14 n4 t 53-58 1981 t 56

¹²⁰ Gweler John D. Holst a Stephen D. Brookfield *Radicalizing Learning: Adult Education for a Just World*, Wiley, 2010

¹²¹ Robin Neustaeter a Jessica Senehi, 'Peace-Building and Conflict Resolution Education', *The Handbook Of Adult And Continuing Education*, Argraffiad 2020, gol Tonette S. Rocco, M Cecil Smith, Robert C. Mizzi, Lisa R. Merriweather, a Joshua D. Hawley. 2021. Pp330-338, p.333

neu gymdeithasau yr effeithir arnynt gan wrthdaro. Mae'r rhain yn astudiaethau achos manwl o raglenni byd-eang dan arweiniad UNICEF, megis y rhaglen Dysgu dros Heddwch, a weithredwyd mewn 14 gwlad – Burundi, Chad, Côte d'Ivoire, Gweriniaeth Ddemocrataidd Congo, Ethiopia, Liberia, Myanmar, Sierra Leone, Somalia, De Swdan, Gwladwriaeth Palesteina, Uganda, Pakistan ac Yemen – ac a gynorthwyir gan y Llywodraethau partner ym mhob gwlad, UNICEF a Llywodraeth yr Iseldiroedd.¹²² Mae'r rhaglen wedi'i dylunio i weithio drwy'r system addysg i gryfhau cydlyniant a gwynnwch cymdeithasol. Er bod y ffocws yn bennaf ar blant a phobl ifanc, roedd oedolion yn cymryd rhan mewn llawer o'r rhaglenni, o ran torri'r berthynas gylchol rhwng achosion gwrthdaro treisgar a dechrau gwrthdaro, nod y prosiectau *Dysgu dros Heddwch* oedd cryfhau'r cysylltiadau rhwng dinasyddion sy'n gweithio ar wahanol lefelau, o ddiwygio'r cwrwclwm i ddarparu cyfleoedd addysgol anffurfiol ar gyfer plant ac ieuenctid ar y cyrion, a'u rhieni.¹²³ Mae rhai gwersi i'w cario o raglenni a weithredwyd mewn cymdeithasau a chymunedau yn dilyn gwrthdaro a chymunedau sy'n profi gwrthdaro a thrais ar hyn o bryd, i gymdeithasau eraill, gan gynnwys pwysigrwydd dull 'cydgyfeiriol' o greu heddwch – ymdrechion sy'n cryfhau cydlyniant fertigol (trwy bolisi a datblygiad sefydliadol); cydlyniant cymdeithasol llorweddol (trwy ymyriadau sy'n meithrin perthnasoedd adeiladol o fewn cymunedau ac ymhlith grwpiau cymunedol); a galluoedd unigol (gwybodaeth, agweddau a sgiliau ar gyfer heddwch) plant, ieuenctid a gofalwyr.¹²⁴

Wrth gwrs, mae llawer o enghreifftiau ledled byd o sefydliadau cymdeithas sifil sy'n darparu hyfforddiant ar gyfer hwyluso deialog ynghylch materion cymdeithasol, gan gynnwys heddwch. Mae sefydliadau heddwch ledled Ewrop yn darparu cyfleoedd ymgysylltu cymunedol, drwy raglenni digwyddiadau, ac maent yn darparu lle sydd gwir ei angen ar gyfer deialog fyfyrion. Mae gan y cenhedloedd Nordig draddodiad cryf o hyrwyddo heddwch, hawliau dynol, deialog a chymod. Cyflwynir hyn gan nifer o wahanol sefydliadau, yn cynnwys Canolfan Nansen dros Heddwch a Deialog yn Norwy, un o saith canolfan heddwch a hawliau dynol a ariennir gan weinyddiaeth addysg llywodraeth Norwy. Mae'r ganolfan yn datblygu ac yn cynnal cyrsiau yn seiliedig ar egwyddorion a dulliau deialogaidd, dadansoddi gwrthdaro, a sgiliau ymarferol wrth hwyluso deialog.¹²⁵ Mae gan Sefydliad Addysg Heddwch y Ffindir (Rauhankasvatusinstituutti RKI ry) bartneriaeth ag UNESCO, ac mae'n darparu hyfforddiant a phrosiectau ar gynyddu tegwch, cynhwysiant a gwrth-hiliaeth, gan ymgysylltu addysgwyr mewn lleoliadau addysgol ffurfiol ac anffurfiol.¹²⁶ Mae'r Fforwm Rhyng-ddiwylliannol Ewropeaidd wedi cyhoeddi canllaw wedi'i lywio gan dystiolaeth i fethodolegau ar gyfer prif ffrydio addysg heddwch mewn addysg oedolion. Mae'r adroddiad yn cynnig mai nod y dull hwn yw

prif ffrydio heddwch o fewn unigolion, mewn rhyngweithiadau rhyngbersonol a rhyng-grŵp ac o fewn cyd-destun byd cymhleth. Mae'n ymwneud â chydabod bod addysgu pobl am heddwch a

¹²² UNICEF, *Peacebuilding, Education and Advocacy Final Global Report*, 2016
<https://www.unicef.org/media/96556/file/UNICEF-PBEA-Final-Report.pdf>

¹²³ Ibid, t 17

¹²⁴ Ibid, t 25

¹²⁵ Canolfan Nansen dros Heddwch a Deialog <https://peace.no/>, cyrchwyd 27 Mai 2024

¹²⁶ Sefydliad Addysg Heddwch y Ffindir (Rauhankasvatusinstituutti RKI ry), <https://rauhankasvatus.fi/en/about-us/>, cyrchwyd 27 Mai 2024

thuag at heddwch yn broses sy'n gysylltiedig â'n rhyngweithio a'n gweithgareddau o ddydd i ddydd. [...] [Mae'n] offeryn ar gyfer gwneud addysg heddwch yn gyffredin, yn normal ac yn rhywbeth sy'n cael ei dderbyn yn eang mewn addysg er mwyn meithrin heddwch ar lefel unigol, cymdeithasol ac amgylcheddol.¹²⁷

Mae'r canllaw yn edrych yn bennaf ar sut mae angen i sefydliadau sy'n gweithio i hyrwyddo addysg heddwch o fewn addysg oedolion brif ffrydio'r dull yn gyntaf drwy gyfathrebu gwladwy yn fewnol o fewn y sefydliad a'i staff a'i gontractwyr, ac yn allanol gyda phartneriaid a rhanddeiliaid. Mae'n gwneud defnydd cadarn o'r 'dull ysgol gyfan' sy'n cael ei argymhell ar gyfer ymgorffori addysg heddwch mewn lleoliadau addysg ffurfiol, ac yn hyrwyddo datblygiad cymhwysedd heddwch ledled y sefydliad, gan fod angen arwain trwy esiampl.

Y trosolwg mwyaf datblygedig o addysg heddwch mewn addysg oedolion a geir yn yr ymchwil desg yw pennod mewn casgliad o draethodau ar addysg oedolion yng Nghanada. Mae Robin Neustaeter yn amlinellu sut mae addysg oedolion a dysgu yng Nghanada yn ystyried addysg heddwch yn "destun ysbeidiol" ers amser maith, ond mai "anaml y caiff ei alw'n addysg heddwch yn benodol", a bod y pwyslais cryf ar gyfiawnder cymdeithasol yn addysg oedolion Canada yn awgrymu "arfer addysg heddwch achlysurol a chuddiedig".¹²⁸ Mae ei hadolygiad yn dweud bod

Addysg anffurfiol am heddwch yn canolbwyntio ar bynciau amrywiol yn cynnwys rheoli neu ddatrys neu drawsnewid gwrthdaro, cyfiawnder cymdeithasol, cyfiawnder adferol, cyfathrebu di-drais, cydraddoldeb rhywedd, gweithredoedd di-drais, diogelwch dynol, yr amgylchedd, cynaliadwyedd a mwy. Mae busnesau, llywodraeth a gwasanaethau cymdeithasol, sefydliadau cymunedol a chymdeithasau yn cynnig cyfleoedd i ddysgu am agweddau ar heddwch.¹²⁹

Mae'r trosolwg hefyd yn amlinellu'r twf mewn dysgu datrys gwrthdaro mewn dysgu yn y gweithle, fel ymateb i fynd i'r afael â gwrthdaro yn y gweithle. Mae hyn yn awgrymu potensial o fewn addysg alwedigaethol a hyfforddiant i archwilio agweddau ar addysg heddwch i helpu i fynd i'r afael â materion cyfathrebu, arweinyddiaeth, prosesau gwneud penderfyniadau amrywiol a thrin sgysiau anodd, materion sy'n arwyddocaol ac yn berthnasol yn eang i lawer o oedolion yn eu gweithleoedd.¹³⁰

Mae hyn yn dangos cynnig addysg heddwch ôl-orfodol bras a gwasgarog, sydd wedi'i ymgorffori mewn amrywiaeth o bynciau a chyd-destunau. Mae hyn ar yr un pryd yn dangos ehangder posibl cymhwyso addysg heddwch mewn dysgu gydol oes, ac yn cyfeirio at pam y gall fod yn anodd categoreiddio a chynnwys cwricwlwm heddwch penodedig o fewn dysgu anffurfiol. Mae hyn yn awgrymu y gallai eiriolaeth dros

¹²⁷ Fforwm Rhyng-ddiwylliannol Ewropeaidd, *Mainstreaming Peace Education: Methodologies, Approaches and Visions*, t 51, t 55

¹²⁸ Robin Neustaeter, 'Adult and Peace Education and Canada – Learning to Imagine', *Adult Education and Lifelong Learning in Canada: Advancing a Critical Legacy*, 2021 tt 168-177, t 168

¹²⁹ Ibid, t.17

¹³⁰ Ibid, t 172

addysg heddwch, a chodi proffil y dull o ymdrin â thema ehangach ADCDF fod y ffordd fwyaf effeithiol o hyrwyddo perthnasedd addysg heddwch ar draws dysgu gydol oes.

Addysg Oedolion yng Nghymru

Mae gan addysg oedolion hanes hir yng Nghymru, wedi'i wreiddio mewn cydberchnogaeth, dysgu anffurfiol, a dysgu seiliedig ar waith. Mae map ffordd diweddar Llywodraeth Cymru ar gyfer y system addysg (Mawrth 2023) yn amlinellu chwe amcan i gyflawni'r nod bod "pob dysgwr, beth bynnag fo'i gefndir, yn cael ei gefnogi i fod yn ddinesydd iach, sy'n ymgysylltu, sy'n fentrus ac sy'n foesebol, yn barod i chwarae rhan lawn mewn bywyd a gwaith."¹³¹ Mae'r ymrwymadau o fewn yr amcanion dysgu am oes yn cynnwys datblygu siarter genedlaethol newydd ar gyfer dysgu gydol oes a chynlluniau peilot cwricwlwm dinasyddion. Mae'r pwyslais ar bwysigrwydd llesiant a gwynnwch y dysgwr a'r staff wrth ymrwymo i sicrhau amcan o 'brofiad dysgu cadarnhaol i bawb', yn cadarnhau'r pwysigrwydd o lefydd cefnogol, diogel a chynhwysol i ddysgu, yn rhydd rhag gwahaniaethu a bwlio, ynghyd â chanllaw fframwaith statudol Llywodraeth Cymru wrth sefydlu dull ysgol-gyfan ar gyfer llesiant emosiynol a meddyliol.¹³² Mae yna ymrwymiad hefyd i gefnogi llesiant mewn dysgu i oedolion, gan adeiladu ar waith presennol ac ymateb y llywodraeth i adroddiad 2021 Estyn ar gefnogi iechyd meddwl a llesiant emosiynol y dysgwr mewn addysg a hyfforddiant ôl-16, gan gynnwys dysgu i oedolion. Mae'r amcan ar ddysgu yn y gymuned yn pwysleisio natur ddwyochrog y dull hwn, gyda gweledigaeth y bydd sefydliadau yn 'ymgysylltu, integreiddio ac yn cael eu grymuso' gan eu cymunedau. Mae hyn yn adeiladu ar yr ymagwedd leol, genedlaethol a rhyngwladol o ran cyd-destun y cwricwlwm, ac yn tanlinellu'r pwysigrwydd o ddysgu gydol oes drwy gydnabod swyddogaeth addysg i gefnogi dysgwyr, teuluoedd a chymunedau. O ddiddordeb neilltuol i hyd a lled yr adroddiad hwn yw ymrwymiad y llywodraeth i "weithio gyda'r sector addysg drydyddol, gan gychwyn gyda phrifysgolion, i ddatblygu cynnig a chydabyddiaeth Cymru gyfan o 'fyfyrwr fel dinesydd'."¹³³

Argymhellwyd y dylai Llywodraeth Cymru ddatblygu strategaeth hyfforddiant a galwedigaethol trosfwaol, a sicrhau bod gan y Comisiwn dros Addysg ac Ymchwil Trydyddol newydd ddigon o gyfarwyddyd ac adnoddau i yrru'r diwygiadau mewn addysg alwedigaethol yn eu blaenau.¹³⁴ O'r un adolygiad argymhellwyd y dylid cynnig rhagor o gyfleoedd i gyfoethogi ar gyfer dysgwyr galwedigaethol yn y grŵp oedran 16-24, gan adlewyrchu'r ymagwedd gyffannol Cwricwlwm i Gymru.¹³⁵ Gallai cynnig ESDGC, gan gynnwys addysg heddwch, fod yn werthfawr yn hyn o beth, gan gefnogi cyfleoedd ar gyfer cyfranogiad y gymuned,

¹³¹ *Ein Cenhadaeth Genedlaethol: safonau uchel a dyheadau i bawb*, Llywodraeth Cymru 21 Mawrth 2023; <https://www.gov.wales/our-national-mission-high-standards-and-aspirations-all-html> cyrchwyd 18 Rhagfyr 2023

¹³² *ibid*; gweler hefyd <https://www.llyw.cymru/sites/default/files/publications/2021-03/fframwaith-ar-sefydlu-dull-ysgol-gyfan-ar-gyfer-llesiant-emosiynol-a-meddyliol.pdf>

¹³³ *Ein Cenhadaeth Genedlaethol: safonau uchel a dyheadau i bawb*, Llywodraeth Cymru 21 Mawrth 2023; <https://www.llyw.cymru/cenhadaeth-ein-cenedl-safonau-dyheadau-uchel-i-bawb-html>

¹³⁴ *Y Sefydliad Dysgu a Gwaith, Adolygiad o'r System Sgiliau yng Nghymru: Rhaglenni addysg a hyfforddiant galwedigaethol cychwynnol a pharhaus* 2023 <https://www.llyw.cymru/sites/default/files/statistics-and-research/2023-11/adolygiad-or-system-sgiliau-yng-nghymru-rhaglenni-addysg-a-hyfforddiant-galwedigaethol-cychwynnol-a-pharhaus-080.pdf>

¹³⁵ *ibid*

dinasyddiaeth weithgar a gwella llesiant y dysgwr. Fodd bynnag, o astudiaeth achos fanwl o roi strategaeth 2008 ar gyfer y sector ESDGC Dysgu Oedolion a'r Gymuned yng Nghymru ar waith, gwelwyd

ystod o nodweddion sy'n cyfrannu at weithredu anghyson ac ad hoc, gan gynnwys anawsterau drwy'r seilwaith Dysgu Oedolion a'r Gymuned; ynysu'r sector; a bwlch rhwng polisi a gweithredu a achosir gan ddiffyg buddsoddi. Nid oedd ESDGC wedi'i gysylltu â blaenoriaethau ehangach y llywodraeth, fel datblygiad cymunedol. Oherwydd hynny, ni lwyddwyd i weithredu'n llawn y synergeddau rhwng theori ac ymarfer Dysgu Oedolion a'r Gymuned ac ESDGC.¹³⁶

Roedd yr argymhellion a wnaed gan yr astudiaeth yn cynnwys cyngor y dylid ymgynghori ag ymarferwyr y sector gwirfoddol ynghylch unrhyw ddatblygiadau i'r dyfodol ar strategaethau addysg, er mwyn iddynt allu rhannu eu harbenigedd, oherwydd "byddai eu mewnbwn a mewnbwn eraill gyda'r profiad perthnasol yn ychwanegu at y perthnasedd a dilysrwydd cynnwys y strategaeth"¹³⁷ Mae'r astudiaeth hefyd yn argymhell bod parhad ESDGC yn "dibynnu ar ail-ffurfio ac ail-gysyniadu clir, gyda disgrifiadau clir o beth ydyw, beth nad ydyw, a sut all addysgwyr ei yrru ymlaen fel rhan o'u gwaith. Mae hyn yn cynnwys codi ymwybyddiaeth drwy egluro beth yw'r pwrpas a buddion a disgrifio deilliannau dysgu a'r cwricwlwm a'r addysgeg berthnasol."¹³⁸ Mae hwn yn ffactor sydd angen ei ystyried wrth ddatblygu'r cynnig addysg heddwch, ynghyd â chyllido digonol a pharhaus er mwyn gwireddu effeithiau hirdymor.

Cynllun Peilot Addysg Heddwch Cwricwlwm Dinasyddion

Fel rhan o gynllun peilot Cwricwlwm Dinasyddion Llywodraeth Cymru, cafwyd partneriaeth rhwng Addysg Oedolion Cymru a'r WCIA i ddatblygu rhaglen o Ddysgu Byd-eang sy'n gwneud defnydd o arbenigedd a chymunedau'r ddau sefydliad.¹³⁹ Bu i Addysg Oedolion Cymru a Chynllun Ysgolion Heddwch y WCIA gydweithio i greu a pheilotu cwrs addysg heddwch ar gyfer addysg ôl-orfodol, a ddatblygwyd yn ystod gaeaf 2022-23, a'i roi ar waith yn ystod hydref 2023. Daeth y weledigaeth ar gyfer y cwrs gan grŵp y Crynwyr yng nghanolbarth Cymru a ddangosodd ddiddordeb mewn addysg heddwch a'r potensial ar gyfer datblygu rhaglen fer.

Prif amcanion y cynllun peilot oedd:

- datblygu a darparu rhaglen Dysgu Byd-eang/Addysg Heddwch ôl-16 o weithgareddau ledled Cymru.
- rhoi'r cyfle i ddysgwyr sy'n oedolion roi mewnbwn a llywio datblygiad, darpariaeth, hyrwyddo a gwerthuso'r cynllun peilot.
- codi ymwybyddiaeth o Ddysgu Byd-eang ar draws y sectorau ôl-16.
- Bod yn gyson â rhai o ddibenion allweddol y Cwricwlwm i Gymru

¹³⁶ Alyson Jenkins, *Addysg ar gyfer Datblygiad Cynaliadwy a Dinasyddiaeth Fyd-eang yn y Sector Addysg Bellach yng Nghymru - O Bolisi i Addysgeg*, Traethawd Doethuriaeth, Prifysgol Abertawe, 2018 t 2

¹³⁷ Ibid, t 284

¹³⁸ Ibid

¹³⁹ Llywodraeth Cymru, 'Cenedl o Ail Gyfle: Lle nad yw byth yn rhy hwyr i ddysgu' <https://www.gov.wales/second-chance-nation-where-its-never-too-late-learn>, cyrchwyd 5 Ionawr 2024

- rhoi cyfle i ddatblygu Fframwaith Galluogrwydd Dinesig ar gyfer darparwyr dysgu i oedolion.¹⁴⁰

Gwerthuswyd y cwrs pan ddaeth i ben ym mis Rhagfyr, gydag adborth gan ddysgwyr a myfyrdodau gan arweinwyr y cwrs, er mwyn gallu dysgu o'r broses ac i ddatblygu'r cwrs ymhellach cyn ei newid yn amgylchedd addysgu ar-lein yn gynnar yn 2024. Yn cynnwys 10 sesiwn tair awr, bu i'r cwrs ystyried dull cyfannol o ystyried heddwch, yn unol â llwybrau Loreta Navarro-Castro a Jasmin Nario-Galace tuag at heddwch, o heddwch mewnol i heddwch byd-eang a phlanedol.¹⁴¹ Roedd hefyd yn cynnwys dwy sesiwn ar ddulliau o ymdrin â gwrthdaro. Yn ogystal, roedd y cwrs hefyd yn ystyried treftadaeth heddwch Cymru, y syniad o Gymru fel cenedl heddwch, a gwahoddwyd y dysgwyr i feddwl am gamau y gallent eu cymryd, gan danlinellu'r broses weithredol a chyfranogol o adeiladu heddwch.¹⁴²

Roedd ymateb atebion y cyfranogwyr i'r cwrs yn gadarnhaol. Yn ogystal â rhannu sut roedd y cwrs wedi eu helpu i ddeall yr heriau sy'n wynebu cymunedau ledled y byd sy'n cael eu heffeithio gan wrthdaro treisgar yn well, roedd gwerthfawrogiad clir hefyd o'r sesiynau a oedd yn edrych ar agweddau ar berthnasoddd rhyngpersonol a heddwch mewnol.¹⁴³ Roedd llawer o'r sylwadau a dderbyniwyd yn cyfleu pwysigrwydd y cyfleoedd a ddarperir i fyfyrion ar eu hymddygiad eu hunain a'r hyn a gawsant wrth ddysgu sut i ddelio â gwrthdaro ac anghytundebau. Roedd un dysgwr wedi sylweddoli bod yr hyn yr oedd wedi'i ystyried yn "ddull gonest eu hunain, ynddo'i hun, yn wrthdrawiadol ac yn gallu achosi gwrthdaro", a rhoddodd y cwrs gyngor iddynt a ffyrdd o fynd i'r afael â hyn ar ôl blynyddoedd lawer o geisio atebion.¹⁴⁴ Roedd y dysgwyr yn gwerthfawrogi'r rhyngweithio personol yn ystod y sesiynau, ac mae arweinydd y cwrs wedi cydnabod y gellid rhoi mwy o amser i ymarfer sgiliau mwy rhyngpersonol yn y dyfodol.¹⁴⁵ Fodd bynnag, maent hefyd yn ymwybodol y gall rhyngweithio rhyngpersonol ddod â heriau, felly mae angen rhoi sylw i sut y gellid defnyddio gwahaniaethau barn ac ymddygiadau, y gall pobl eu cael yn anodd, yn ddiogel i ddatblygu sgiliau. Amlygodd yr adborth gan ddysgwyr ynghylch ffurf y cwrs bwysigrwydd i gyfranogwyr brofi cymaint o'r cwrs, er mwyn deall yn well yr agweddau cydgysylltiedig o heddwch a'r sgiliau cysylltiedig. Mae hyn wedi ysgogi datblygwyr y cwrs i ystyried creu adnoddau ychwanegol i gynorthwyo'r cwrs, a allai gynnwys darllen pellach, gwybodaeth am fentrau lleol neu genedlaethol, a thaflenni gweithgareddau i gynorthwyo gwaith y tu allan i'r sesiynau.¹⁴⁶

Datblygiadau eraill y dyfodol

Mae'r gwerthusiad o'r cwrs yn ystyried a fyddai "modd gwneud mwy o gyswllt gyda'r Cynllun Ysgolion Heddwch a dulliau rhyng-genhedlaeth posib".¹⁴⁷ Byddai ystyriaeth bellach o'r potensial ar gyfer dulliau

¹⁴⁰ WCIA Cynllun Ysgolion Heddwch, 'Cwricwlwm Addysg Heddwch (Oedolion): Gwerthusiad o raglen beilot a gynhaliwyd yn 2023'

¹⁴¹ Navarro-Castro, L., & Nario-Galace, J. (2019) *Peace education: A pathway to a culture of peace* (3rd ed.), t 20

¹⁴² WCIA Cynllun Ysgolion Heddwch, 'Cwricwlwm Addysg Heddwch (Oedolion): Adolygiad o raglen beilot a gynhaliwyd yn 2023', t 2-3

¹⁴³ WCIA Cynllun Ysgolion Heddwch, *ibid*, t 7

¹⁴⁴ WCIA Cynllun Ysgolion Heddwch, *ibid*, t 6

¹⁴⁵ WCIA Cynllun Ysgolion Heddwch, *ibid*, t 8

¹⁴⁶ WCIA Cynllun Ysgolion Heddwch, *ibid*, t 11, t 12

¹⁴⁷ *ibid*

rhyng-genhedlaeth tuag ar gyfer addysg heddwch yn ymarfer gwerthfawr. Mae ysgolion yng Nghymru yn archwilio mwy a mwy o weithgareddau sy'n cyd-fynd â buddsoddiad Llywodraeth Cymru mewn amgylcheddau dysgu ysgolion bro, gan ddarparu cyfleoedd i feithrin gallu yn y gymuned leol.¹⁴⁸ Gofynnir cwestiwn tebyg hefyd yn yr adroddiad mewn perthynas ag addysg bellach: "A ellid addasu'r cwrs ychydig a'i gynnal mewn coleg (a allai wedyn anelu at ddod yn Goleg Heddwch, gyda chefnogaeth)?"¹⁴⁹ Mae potensial sylweddol hefyd i gynnal y cwrs o fewn colegau addysg bellach fel addysg gymunedol dysgu oedolion, ac o bosibl o fewn prifysgolion ac addysg bellach fel cwrs byr dewisol i'r rhai sydd wedi cofrestru fel myfyrwyr ar gyrsiau ffurfiol yn seiliedig ar gymwysterau. Gallai'r ddau ddatblygiad hefyd gynnwys cydweithio rhwng sefydliadau ar draws y sectorau addysg gorfodol ac ôl-orfodol, a byddent yn cyfrannu at eu gwaith yn y genhadaeth ddinesig ac wrth ddarparu profiadau dinasyddiaeth i fyfyrwyr a'r cyfle i chwarae rhan fwy gweithredol yn eu cymuned.

Yn ein cyfweiliad, gofynnais i ddatblygwyr y cwrs lle hoffent fynd â'r cwrs addysg heddwch nesaf:

"Symud oddi wrth yr ardal lle'r aethom â fo a'r dysgwyr oedd gyda ni, a oedd â diddordeb o'r dechrau ac yn rhan o'r gymuned honno beth bynnag. Gweld sut y byddai'n ymateb mewn amgylchedd hollol wahanol, mewn ardal hollol wahanol lle nad oes gan bobl y cefndir hwnnw o wybodaeth heddwch oedd gan y Crynwyr. Byddai gallu mynd ag o i rywle lle nad oes gan neb y cefndir hwnnw, a neb y wybodaeth honno, yn ddiddorol iawn, i weld sut mae pobl yn cysylltu ag o." (Cyfweiliad gyda datblygwyr y cwrs)

Mae cryn botensial i fframio'r cwrs o fewn addysg ar gyfer datblygu cynaliadwy a dysgu byd-eang a fyddai'n berthnasol iawn o fewn y sector PCET, a gallai gyfrannu at y ddarpariaeth lai ffurfiol ac ychwanegol y mae sefydliadau bellach yn ei darparu i ddysgwyr gyfoethogi eu profiad ac ehangu eu harbenigedd a'u cymwyseddau. Fodd bynnag, wrth fynd â'r cwrs hwn i wahanol leoliadau cymunedol, gall fframio yn y termau hyn fod yn rhwystr i ddealltwriaeth a chyfranogiad - gallai fod lle i bwysleisio agweddau rhyngbersonol y cwrs a sut y gall gyfrannu at reoli gwrthdaro. Mae datblygwyr y cwrs yn ymwybodol o'r heriau a all godi o fynd i'r afael â rhyngweithiadau rhyngbersonol, a'r angen i ystyried diogelwch a niwed posibl mewn sefyllfaoedd o'r fath; byddai technegau cyfryngu cymheiriaid yn ddefnyddiol yn hyn o beth, ac mae gan y Cynllun Ysgolion Heddwch berthynas sefydledig â hyfforddwyr cyfryngu cymheiriaid. Mae'r cwrs ar-lein yn dod â'r potensial i ddatblygu agweddau ar y cwrs yn sesiynau byrrach ar-lein, ac o bosibl rhai adnoddau hunangyfeiriedig.

Gallai fod potensial i ddefnyddio'r gweithgaredd hwn i lywio cyfleoedd cyfoethogi o fewn addysg bellach ac uwch, ac o fewn addysg undebau llafur ac addysg alwedigaethol ehangach, fel rhan o gynnig yn y gweithle i helpu i fynd i'r afael â gwrthdaro yn y gweithle. Efallai y bydd cyfle hefyd i weithio gyda Swyddfa Comisiynydd Cenedlaethau'r Dyfodol Cymru i ddatblygu hyfforddiant heddwch perthnasol ar gyfer Academi Arweinyddiaeth Cenedlaethau'r Dyfodol. Fodd bynnag, mae angen ystyried graddadwyedd y cwrs, a'r

¹⁴⁸ 'Ysgolion Bro', Llywodraeth Cymru <https://www.llyw.cymru/ysgolion-bro-html>, cyrchwyd 10 Chwefror 2024

¹⁴⁹ WCIA Cynllun Ysgolion Heddwch, *ibid*, t 12

potensial ar gyfer cyflwyno ehangach yn ofalus. Mae gan y cwrs berthnasedd amlwg i ystod o gymunedau dysgwyr ond gall fod wedi'i gyfyngu gan gapasiti hyfforddwyr. Er mwyn ehangu'r rhaglen yn gynaliadwy, i gynyddu ei gwydnwch, a gwneud y mwyaf o'i chyrhaeddiad a'i effaith posibl, mae angen rhagor o gyllid tymor hwy i adeiladu ar y dysgu o'r cynllun peilot, ac i gynyddu mewn ffordd gynaliadwy, gan gynnwys buddsoddiad y mae gwir ei angen i ddatblygu gallu ychwanegol i gyflwyno cyrsiau a darparu hyfforddiant i diwtoriaid.

Casgliad

Mae ymrwymiad clir Llywodraeth Cymru i lesiant dysgwyr a'r cysyniad o ddinasyddiaeth weithgar yn darparu cyfleoedd posibl i addysg heddwch gael ei hintegreiddio'n ehangach ar ystod o wahanol lefelau yn y system addysg yng Nghymru.

Mae papur UNESCO 2024, *Peace education in the 21st century: an essential strategy for lasting peace* yn argymhell bod "dulliau ysgol gyfan, ac integreiddio ymyriadau addysgol yn gynhwysfawr a pharhaus i gymdeithas gyfan, trwy ymdrechion dysgu ffurfiol, anffurfiol a gydol oes yn fwy tebygol o esgor ar ganlyniadau mwy trawsnewidiol".¹⁵⁰ Mae'r diwygiadau diweddar o fewn y system addysg yng Nghymru, ynghyd â Deddf Llesiant Cenedlaethau'r Dyfodol, yn darparu cyd-destun a allai fod yn dderbyngar i gyflwyno'r dull addysg heddwch, wedi'i wreiddio mewn profiad Cymreig gydag agwedd ryngwladol.

O fewn addysg gynradd ac uwchradd yng Nghymru, mae'r dull ysgol gyfan o ymdrin ag iechyd meddwl a llesiant yn darparu mecanwaith sy'n bodoli eisoes i ystyried cymuned yr ysgol a'r cyfraniad y gallai dull heddychlun ei wneud i gefnogi llesiant cyfannol. Mae'n ymddangos bod darparu cyfleoedd i ystyried y ddeinameg rhwng heddwch mewnol, heddwch rhyngpersonol a heddwch cymdeithasol yn briodol. Mae dealltwriaeth o ddysgwyr gydol oes ar bob lefel fel dinasyddion gweithgar, egwyddorol a gwybodus hefyd yn darparu lle ar gyfer dysgu trawsnewidiol a gweithredu cymdeithasol. Mae gwybodaeth gyfredol o ADCDF ac Addysg Hawliau Dynol yn darparu llwyfan i ddatblygu ymwybyddiaeth o berthnasedd addysg ar gyfer heddwch ac adeiladu ar arferion presennol.

Gyda'i hanes cyfoethog o hyrwyddo heddwch a'i hymrwymiad a gydnabyddir yn rhyngwladol i'r nodau datblygu cynaliadwy, mae gan Gymru gyfle unigryw i feithrin llythrennedd moesegol a meithrin dinasyddion sy'n ymwybodol yn fyd-eang o fewn ei system addysg. Wrth ddefnyddio'r traddodiad hwn, gall Cymru wella cymwyseddau ei ddinasyddion mewn perthynas â heddwch, datrys gwrthdaro, a chydlyniant cymunedol gartref ac yn rhyngwladol. Wrth wneud hynny, gall Cymru ddatblygu ei henw da ymhellach fel cenedl sy'n gyfrifol yn fyd-eang, sydd wedi ymrwymo i arfogi cenedlaethau'r dyfodol â'r sgiliau, y wybodaeth a'r empathi i gynnal heddwch.

¹⁵⁰ UNESCO, *Peace education in the 21st century: an essential strategy for lasting peace*, t 19

Llyfryddiaeth

Mapio'r Nodau Datblygu Cynaliadwy (NDC) o fewn Cwricwlwm Prifysgol Bangor, Prifysgol Brifysgol Bangor
<https://www.bangor.ac.uk/sustainability/curriculum-teams.php.cy>

Bar-Tal, D. The Elusive Nature of Peace Education. In G. Salomon & B. Nevo (Eds.), *Peace Education: The Concept, Principles, and Practices Around the World*, Taylor and Francis. 2002. (t 27–36).

Bar-Tal, D., & Rosen, Y. 'Peace Education in Societies Involved in Intractable Conflicts: Direct and Indirect Models'. *Handbook on Peace Education*, Routledge 2009, (tt 21-42)

Gweithgor Cymunedau, Cyfraniadau a Chynefin Pobl Dduon, Asiaidd a Lleiafrifoedd Ethnig yn y Cwricwlwm Newydd: adroddiad terfynol <https://www.llyw.cymru/adroddiad-terfynol-gweithgor-cymunedau-cyfraniadau-chynefin-pobl-dduon-asiaidd-lleiafrifoedd-ethnig-yn-y-cwricwlwm>

Coleg Penybont, 'Ein Gweledigaeth a'n Gwerthoedd'; <https://www.bridgend.ac.uk/am-coleg-penybont/ein-gweledigaeth-an-gwerthoedd/?lang=cy>

Cod Dinasyddiaeth, Coleg Penybont <https://www.bridgend.ac.uk/wp-content/uploads/2023/03/Citizenship-Code-December-23-Cymraeg.pdf>

Coleg Penybont, Cynaliadwyedd, <https://www.bridgend.ac.uk/arweinyddiaeth-yng-hylch-cynaliadwyedd-yng-ngholeg-penybont/y-nodau-datblygu-cynaliadwy-ar-nodau-llesiant/?lang=cy>

Campaign for Peace Education, What is Peace Education? <https://map.peace-ed-campaign.org/what-is-peace-ed/>

Targedau ac Amcanion Cynaliadwyedd 2023-24, Prifysgol Metropolitan Caerdydd
<https://www.cardiffmet.ac.uk/about/sustainability/Documents/Section%201/Targets%20and%20Objectives%202023%2024.pdf>

Chapman, S., Ellis, R., Beauchamp, G., Sheriff, L., Stacey, D., Waters-Davies, J., Lewis, A., Jones, C., Griffiths, M., Chapman, Sammy, Wallis, R., Sheen, E., Crick, T., Lewis, H., French, G., & Atherton, S., 'My picture is not in Wales': pupils' perceptions of cynefin (Belonging) in primary school curriculum development in Wales, *Education* 3-13, 51: 8, tt 1214-1228, 2023
<https://www.tandfonline.com/doi/full/10.1080/03004279.2023.2229861>

Creating Safer Space, <https://creating-safer-space.com/>

EdJAM, <https://edjam.network/>

EduCATE, 'Teachers Are Key: Training Teachers in Nonviolent Conflict Transformation' Position Paper, 2018
https://eu.metododanielenovara.it/wp-content/uploads/2015/10/EduCATE_Position-Paper_EN.pdf

Education Institute Scotland (EIS), Education for Peace Policy

<https://www.eis.org.uk/policiesandguidance/educationforpeace>

EIPLab (Educating Inspiring Peace Laboratory), Good Practices, <https://eiplab.eu/good-practices>

Estyn, ADCDF: Cynnydd mewn addysg ar gyfer datblygu cynaliadwy a dinasyddiaeth fyd-eang,

[https://www.estyn.llyw.cymru/system/files/2020-](https://www.estyn.llyw.cymru/system/files/2020-07/ESDGC%253A%2520Progress%2520in%2520education%2520for%2520sustainable%2520development%2520and%2520global%2520citizenship%2520-%2520June%25202014.pdf)

[07/ESDGC%253A%2520Progress%2520in%2520education%2520for%2520sustainable%2520development%2520and%2520global%2520citizenship%2520-%2520June%25202014.pdf](https://www.estyn.llyw.cymru/system/files/2020-07/ESDGC%253A%2520Progress%2520in%2520education%2520for%2520sustainable%2520development%2520and%2520global%2520citizenship%2520-%2520June%25202014.pdf)

European Intercultural Forum, *Mainstreaming Peace Education: Methodologies, Approaches and Visions*,

<http://unoy.org/wp-content/uploads/Mainstreaming-Peace-Education.pdf>

Future Learn, Achieving Sustainable Development, www.futurelearn.com/courses/achieving-sustainable-development

Galtung, J., Violence, Peace, and Peace Research. *Journal of Peace Research*, 6(3), 1969, tt167–191.

<https://doi.org/10.1177/002234336900600301>

Galtung, J., 'Three realistic approaches to peace: peacekeeping, peacemaking, *peacebuilding*', *Impact of science on society*, XXV ½ 1976, t 103-115

Guest, M., 'The diversity of the university experience helps students become good citizens'

<https://wonkhe.com/blogs/the-diversity-of-the-university-experience-helps-students-become-good-citizens/>

Holst J. D. and S. D. Brookfield *Radicalizing Learning: Adult Education for a Just World*, Wiley, 2010

HotcoursesAbroad, <https://www.hotcoursesabroad.com/study/training-degrees/uk/postgraduate/peace-studies-courses/loc/210/slevel/3/cgory/ea.71-4/sin/ct/page/2/programs.html?#search&catCode=EA.71-4&countryId=210&parentQualId=3&nationCode=210&nationCntryCode=210&studyAbroad=N&studyOnline=N&studyCross=N&studyDomestic=N&studyPartTime=N&startOnlineCampusLater=N&manStdYAbrdFlg=N&parentCatEngName=Social%20Studies%20and%20Communications&childCatEngName=Politics&ldcsCatEngName=Peace%20Studies&fastlane=N>

Jenkins, A., Education for Sustainable Development and Global Citizenship Adult and Community Learning in Wales – from Policy to Pedagogy. Traethawd doethuriaeth, Prifysgol Abertawe. 2018

<http://cronfa.swan.ac.uk/Record/cronfa48775>

Kekkonen, H. 'Peace Education Is Integral to Adult Education', *Convergence: An International Journal of Adult Education*, v14 n4 t 53-58 1981

Kools, M. a L. Stoll, "What Makes a School a Learning Organisation?", OECD Education Working Papers, No. 137, OECD Publishing, 2016 <https://doi.org/10.1787/5jlwm62b3bvh-en>

<https://maaddysgcenedlaethol.cymru/ma-genedlaethol-mewn-addysg-cymru/>

Nansen Center for Peace and Dialogue, <https://peace.no/>

Navarro-Castro, L., & Nario-Galace, J. Peace education: A pathway to a culture of peace (3rd ed.) 2019

https://www.peace-ed-campaign.org/wp-content/uploads/2019/07/PeaceEducation_3rdEdition_2019.pdf

Neustaeter, R. 'Adult and Peace Education and Canada – Learning to Imagine', *Adult Education and Lifelong Learning in Canada: Advancing a Critical Legacy*, 2021 tt 168-177

Neustaeter R. and J. Senehi, 'Peace-Building and Conflict Resolution Education', *The Handbook Of Adult And Continuing Education*, 2020 Edition, eds Tonette S. Rocco, M Cecil Smith, Robert C. Mizzi, Lisa R. Merriweather, and Joshua D. Hawley. 2021. Tt330-338, t 333

Peace Education Institute (Rauhankasvatusinstituutti RKI ry), <https://rauhankasvatus.fi/en/about-us/>

Quakers of Britain, Peace at the heart: A relational approach to education in British schools, 2022

<https://www.quaker.org.uk/documents/peace-at-the-heart>

Cymwysterau Cymru, Deilliannau'r Ymgynghorid fesul Pwnc, Mehefin 2023

<https://qualifications.wales/media/knaphlc0/consultation-outcomes-by-subject.pdf>

Cymwysterau Cymru, Meini Prawf Cymeradwyo Astudiaethau Cymdeithasol TGAU, 2023

<https://qualifications.wales/media/lsqe0irb/gcse-social-studies-approval-criteria.pdf>

Cymwysterau Cymru, Cynnig TGAU Astudiaethau Cymdeithasol, 2022

<https://haveyoursay.qualifications.wales/18682/widgets/54667/documents/32075>

Cymwysterau Cymru, TGAU Gwneud-i-Gymru, <https://cymwysterau.cymru/rheoleiddio-a-diwygio/diwygio/cymwys-ar-gyfer-y-dyfodol/gwneud-i-gymru-tgau/>

Cymwysterau Cymru, Y Cynnig Llawn o Gymwysterau 14-16: Adroddiad Penderfyniadau, 2024

<https://qualifications.wales/media/3xfbmd0o/the-full-14-16-qualifications-offer-decisions-report.pdf>

Radosavljević, N., 'Renewal of education for peace and why it is important?!' Coyote Issue 33, 2023 Council of Europe <https://pjp-eu.coe.int/en/web/coyote-magazine/renewal-of-education-for-peace-and-why-is-it-important>

Solidar Foundation, *A Sustainable Journey to Peace: Peace Education in The Context Of Global Citizenship Education*, Solidar Foundation, November 2022

https://www.solidar.org/system/downloads/attachments/000/001/648/original/Policy_Paper_Peace_Education_Final_Version.pdf?1671711993

Prifysgol Abertawe, Addysg ar gyfer Datblygu Cynaliadwy,

<https://www.swansea.ac.uk/cy/cynaliadwyedd/strategaeth-a-pholisi/#addysg-ar-gyfer-datblygu-cynaliadwy-rhan-1-is-expanded>

Deddf Addysg Drydyddol ac Ymchwil (Cymru) 2022,

<https://business.senedd.wales/documents/s126867/Tertiary%20Education%20and%20Research%20Wales%20Bill,%20as%20passed.pdf>

UNESCO Recommendation on Education for Peace and Human Rights, International Understanding, Cooperation, Fundamental Freedoms, Global Citizenship and Sustainable Development, ED/REV-1974REC/2023/6, <https://unesdoc.unesco.org/ark:/48223/pf0000386653>

UNESCO, New Understandings of Education's Contributions to Peace UNESCO Technical note, 2022 <https://unesdoc.unesco.org/ark:/48223/pf0000381530>

UNESCO, *Peace education in the 21st century: an essential strategy for lasting peace* <https://unesdoc.unesco.org/ark:/48223/pf0000388385>

UNICEF, *Peacebuilding, Education and Advocacy Final Global Report*, 2016 <https://www.unicef.org/media/96556/file/UNICEF-PBEA-Final-Report.pdf>

University of Bradford, <https://www.bradford.ac.uk/courses/ug/international-relations-politics-security-ba/>

Prifysgol De Cymru, Addysg ar gyfer Datblygu Cynaliadwy, <https://www.southwales.ac.uk/about/sustainability/our-priorities/education-for-sustainable-development/>

University of St Andrews, Vertically Integrated Projects, <https://www.st-andrews.ac.uk/education/vip/>

University of St Andrews, Visualising Peace, <https://arts.st-andrews.ac.uk/visualising-war/visualising-peace/>

UCHAF: Systemic Upscaling of Peace Education Practices, Collection of Good Practices, 2018 https://eiplab.eu/wp-content/uploads/2019/11/UPPER.IO1_Report-on-the-collection-of-good-practices.pdf

WCIA 'Cynllun Ysgolion Heddwch Cymru' - Lefelau, Gofynion a Chynnydd' <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823894285>

WCIA, 'Dod yn Ysgol Heddwch Prosiect Erasmus: Adroddiad Gwerthuso Terfynol, Rhagfyr 2023' (heb ei chyhoeddi)

WCIA, 'Sut i ddod yn Ysgol Heddwch' Pecyn Cymorth i Ymarferwyr' (heb ei gyhoeddi) Wedi'i ddatblygu fe rhan o'r prosiect Erasmus+ 2020-23

WCIA, Sut i ddod yn Ysgol Heddwch, <https://padlet.com/ejharries/ysgolion-heddwch-cymru-wales-peace-schools-uct30df9k5o0gmw6/wish/1823890587>

WCIA, Addysg Heddwch wedi'i Fapio i'r Cwricwlwm Newydd, 2022 <https://www.wcia.org.uk/wp-content/uploads/2022/05/Peace-Education-mapped-to-the-new-curriculum.pdf>

WCIA Cynllun Ysgolion Heddwch, 'Cwricwlwm Addysg Heddwch (Oedolion): Gwerthusiad o raglen beilot a gynhaliwyd yn 2023'

WCIA, Cofnod Prosiect Cymru dros Heddwch 2014-19, <https://www.wcia.org.uk/wp-content/uploads/2019/11/Project-Record-Wales-for-Peace-2014-19-Final-Draft-Nov-2019.pdf>

Llywodraeth Cymru, 'Safonau proffesiynol ar gyfer addysgu ac arweinyddiaeth a'r safonau proffesiynol drafft ar gyfer cynorthwyo addysgu (ar gyfer ymgynghori) Cwestiynau Cyffredin', 2017

Llywodraeth Cymru, Ysgolion Bro, <https://www.llyw.cymru/ysgolion-bro-html> |

Llywodraeth Cymru, Canllaw Cwricwlwm i Gymru, Dylunio eich Cwricwlwm, <https://hwb.gov.wales/cwricwlwm-i-gymru/cynllunio-eich-cwricwlwm/datblygu-gweledigaeth-ar-gyfer-cynllunio-cwricwlwm/>

Llywodraeth Cymru, Cwricwlwm i Gymru, Dylunio eich Cwricwlwm, Themâu Trawsbynciol, Cyd-destunau Lleol, Cenedlaethol a Rhyngwladol <https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/>

Llywodraeth Cymru, Cwricwlwm i Gymru, Dylunio eich Cwricwlwm: y Pedwar Diben <https://hwb.gov.wales/cwricwlwm-i-gymru/cynllunio-eich-cwricwlwm/datblygu-gweledigaeth-ar-gyfer-cynllunio-cwricwlwm/#curriculum-design-and-the-four-purposes>

Canllaw Statudol, Addysg Cydberthynas a Rhywioldeb, Cwricwlwm i Gymru, Llywodraeth Cymru [https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/#relationships-and-sexuality-education-\(rse\):-statutory-guidance](https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/#relationships-and-sexuality-education-(rse):-statutory-guidance)

Llywodraeth Cymru, Cwricwlwm i Gymru: Crynodeb o Ddeddfwriaeth <https://hwb.gov.wales/cwricwlwm-i-gymru/crynodeb-o-r-ddeddfwriaeth/#religion,-values-and-ethics>

Llywodraeth Cymru, Dylunio eich Cwricwlwm, Themâu Trawsbynciol, Addysg Cydberthynas a Rhywioldeb, <https://hwb.gov.wales/cwricwlwm-i-gymru/cynllunio-eich-cwricwlwm/themau-trawsgwricwlaidd-ar-gyfer-cynllunio-eich-cwricwlwm/>

Llywodraeth Cymru, Dylunio eich Cwricwlwm, Canllaw Cwricwlwm i Gymru, <https://hwb.gov.wales/cwricwlwm-i-gymru/cynllunio-eich-cwricwlwm/datblygu-gweledigaeth-ar-gyfer-cynllunio-cwricwlwm/#designing-a-curriculum-in-wales-and-for-wales>

Llywodraeth Cymru, Cwricwlwm i Gymru: Canllaw Crefydd, Gwerthoedd a Moeseg <https://hwb.gov.wales/cwricwlwm-i-gymru/y-dyniaethau/cynllunio-eich-cwricwlwm/#canllawiau-ar-grefydd,-gwerthoedd-a-moeseg>

Llywodraeth Cymru, *Addysg ar gyfer Datblygu Cynaliadwy a Dinasyddiaeth Fyd-eang Dealltwriaeth Gyffredin i Ysgolion*, <https://www.llyw.cymru/sites/default/files/publications/2018-02/addysg-ar-gyfer->

[datblygu-cynaliadwy-a-dinasyddiaeth-fyd-eang-dealltwriaeth-gyffredin-ar-gyfer-y-sector-dysgu-oedolion-ar-gymuned.pdf](#)

Llywodraeth Cymru, Fframwaith ar Sefydlu Dull Ysgol Gyfan ar Gyfer Llesiant Emosiynol a Meddyliol, 2021
<https://www.llyw.cymru/sites/default/files/publications/2021-03/fframwaith-ar-sefydlu-dull-ysgol-gyfan-ar-gyfer-llesiant-emosiynol-a-meddyliol.pdf>

Strategaeth Ryngwladol Cymru, Llywodraeth Cymru <https://www.llyw.cymru/strategaeth-ryngwladol-i-gymru-html>

Llywodraeth Cymru, Y Dull Cenedlaethol ar gyfer Dysgu Proffesiynol, <https://hwb.gov.wales/dysgu-proffesiynol/cynllunio-a-dylunio-dysgu-proffesiynol/>

Llywodraeth Cymru, Ein Cenhadaeth Genedlaethol: safonau a dyheadau uchel i bawb, 21 Mawrth 2023;
<https://www.llyw.cymru/cenhadaeth-ein-cenedl-safonau-dyheadau-uchel-i-bawb-html>

Llywodraeth Cymru, Datganiad i'r Wasg, 'Cwricwlwm Dinasyddon: Grymuso dysgwyr sy'n oedolion yng Nghymru', 4 Ionawr 2024. <https://www.llyw.cymru/cwricwlwm-dinasyddion-grymuso-dysgwyr-syn-oedolion-yng-nghymru>

Llywodraeth Cymru, 'Ysgolion fel Sefydliadau sy'n Dysgu', <https://hwb.gov.wales/dysgu-proffesiynol/arwain-dysgu-proffesiynol/ysgolion-fel-sefydliadau-sy-n-dysgu/>

Llywodraeth Cymru, Crynodeb o Ddeddf Addysg Drydyddol ac Ymchwil (Cymru) 2022,
<https://www.llyw.cymru/sites/default/files/publications/2022-09/crynodeb-o-ddeddf-addysg-drydyddol-ac-ymchwil-cymru.pdf>

Llywodraeth Cymru, Llesiant Cymru 2023, www.llyw.cymru/llesiant-cymru-2023

www.cperg.org/programmes

www.globalgoals.org/goals/4-quality-education/

www.grainesdepaix.org/en/resources/peace-dictionary/peace-education-unicef-susan-fountain-et-al-1999

www.ideas-forum.org.uk/

www.peace-education.org.uk/home

www.signpostsglobalcitizenship.org/

www.taith.wales/about/what-we-do/

Zwart, D. Peace Education: Making the Case, Quaker Council for European Affairs, 2019,
<https://www.qcea.org/wp-content/uploads/2019/01/Peace-Education-report.pdf>